

GÉNESIS

Diosun mai damiwakin bawakin taewaken yudabu jiwei eskai taekubainibukiaki

Jawen unanmati janchaki

Na Diosun dasibi dami waniwen taexun na una “Génesis” kenenibuki, nukun janchawen yuiadan, “Eska wakin taewanidan.” Jaska yudabu nukun xenipabu jiwei taeni inun chipu jaska Jesúsun xenipabu taeni uinkin tapintidubuki. Dasibi dami wakin jiwemaniwen taea Dios nukuwen nuikunkainikiki.

Egipto anua jatun xenipabu taxnimabainkin jatu paxawani jatun xenipabu miyui unankin jaska dasibi taewani Moisin Dios yuka jawada inun jadatuda xenipabu chanima miyui kayabi Diosun unanmakubaina Moisin jatu kenemanikiaki, ja añotian 1450-1440 Cristo judiamadan.

Diosun mai jidabi damiwanikiaki, na janchadan

1 ¹Diosun nai inun mai dami wakin eska wakin taewanikiaki. ²Mai jayadiama jawa jayamajaidaken Diosun uian dasibi jenewans uke medan dasibi meshui keyua dakaken jabatiandi Diosun Yushin Pepa jene mamakixun tunkax akaya

³Diosun shinankin yuikin:

“Jau xabanunwen”, aka ma jawaida xaba inikiaki. ⁴⁻⁵Jaska watan Diosun uian xaba pejaida dakaken januxun meshudi paxkatan ja dabe kenakin: “Xabaki”, axun meshudi kenakin: “Yameki”, atan ja dukun 1 día xabatian jati Diosun damiwakin taewanikiaki.

⁶⁻⁷Ja kachu Diosun damiwakin ana yuikin:

“Natukan watan jene paxkakin medibi watan jau jaskanunwen”, anikiaki. Diosun jaska watan natukan wakin jenedi paxkatan jaska

waxun medibi natukan naman jene waxun manaundiadi nai anudi jene wadianikiaki. ⁸Jaska waxun natukan Diosun kenakin:

“Naiki”, atan jaska wakín 2 día xaba Diosun damiwakin taewanikiaki.

⁹Jaska washinxun Diosun ana yuikin:

“Nai namanu jau jenen ichayununwen, mai metui uinubisidan”, aka nai namanua jene janus ichai keyuken ¹⁰mai metu yenken dakaken Diosun ja kenakin:

“Maiki”, axun jenedi icha Diosun kenakin: “Ianenwanki”, axun uian peken ¹¹Diosun ana yuikin:

“Basi inun yunu jexeya inun ji jawen bimi jexeya ja mai metu anu jau dasibi benei keyununwen”, axun ¹²jaska wa main basi benemakin yunu jexeya bestibu benemakin ji bestibu bimi jexeya benemakin dasibi ma benemaken Diosun uian peken ¹³jaska wakín 3 día xaba Diosun damiwakin taewanikiaki.

¹⁴Jaska dayakunkainkin Diosun ana yuikin:

“Xaba inun meshu tadi medibi paxkakin nai anu jau chaxati inunwen, xaba inun, yame inun, badi inun, betsa betsapatian tanakin unanmatidan. ¹⁵Nai anua mai jidabi anu chaxapakexankanikiki”, ixun ¹⁶Diosun chaxati ewapajaida dabe, badi inun, uxe inun, bishi ichapa damiwaxun ewapatun jau xaba duawanunan, jatiumatun jau yame duawanunan, ¹⁷⁻¹⁸mai jidabi anu chaxapakemakin xaba duawamakin yame duawamakin xaba inun yame tadi xekakin medibi wakín nai anu Diosun jaska janakeakexun uian peken ¹⁹jaska wakín 4 día xaba Diosun damiwakin taewanikiaki.

²⁰Jaska dayakunkainkin Diosun jene yunukin:

“Jabu jene medan jiweabun dasibi damiwakin ja jamen imaxanunwen”, iwanan, “Nai natukan anuadi manaundiabu peiyabudi jau nuyabaununbunwen”, ixun ²¹jene medan jiweabudi ewapabu bestibu damiwakin baka betsa betsapa bestibu damiwakin peiyabu betsa betsapa bestibu damiwakin jaska waxun uian peken ²²pepawakin Diosun jatu yunukin:

“Bake wakín jau pa wapakexanunbunwen. Jene tibi medan jau mataxanunbunwen. Mai jidabi anu peiyabu betsa betsapadi jau papakexanunbunwen”, jatu watan ²³5 día xaba damiwai dayanikiaki, Diosdan.

²⁴Jaska wabaishinxun Diosun mai yunukin:

“Jamapai betsa betsapa bestibu main jau jabu damiwayununwen, piti yuinaka inun, pitibuma yuinaka inun, ina wati yuinaka inun, ina watima yuinaka inun, taeyabu inun, tae jayabumadan”, ²⁵jaska piti yuinaka inun pitibuma yuinaka Diosun damiwaxun dasibi uian peken ²⁶Diosun ana yuikin: “Yudabu damiwananwen, nuku itsadan, nukun yushin keska wakínan, mai jidabi anu baka inun, piti yuinaka inun, pitibuma

yuinaka jau jatun ibu waxanunbunan”, ixun ²⁷ja itsa juni inun ainbu jatu damiwaxun ²⁸jatu duawakin yunukin yuikin: “Matun bakebu bawakin jatu pa wapakexankanwen. Jiweakeakebaunkin mai jidabi anu matuna wakin ibu wai xanen ibupakexankanwen, jene anu baka inun, manaundia peiyabu inun, yuinaka dasibi main xadaibu dikabi ibu wakinan”, iwanan, ²⁹“Uian, yunu jexeya inun ji bimi jexeya mai jidabi anu en matu inaiin, matun pitidan. ³⁰Jamen yuinaka dasibi jiweaibu puben inun pubenbumadan, peiyabu inun main xadaibu dasibi ni maxu inun ni bimi en jatu inaiin, dasibi yuinakapan pitidan”, jaska waxun ³¹dasibi ma damiwa uian pejaidaken 6 día xaba dayanikiaki, Diosdan.

2 ¹⁻³Jaska dayakin nai inun, mai inun, jiweabu dasibi damiwakin keyutan jawen dami daya menetan ana damiwama 7 día xaba keyutan Dios juindakunikiaki. Jaskawen taexun Diosun jawen jenea 7 día xaba jawena wakin medibi wanikiaki, juindakunti wakinan.

Mae Edén anu juni jiwei taenikiaki, na janchadan

⁴⁻⁵Nai inun mai jidabi Dios, jawen kena kayabi Jehován, jatun damiwaken eskakubainibukiaki. Jabun bai uduti juni jayadiamaken mai anu Diosun ui imadiamawen taea piti yunubu benediamaken ⁶janunkain basnun mai anua kainkin mai bemecha waya ⁷Jehová Diosun mai mishpu bitan damiwakin ja keska wakin juni jiwemanun ixun jawen dekin anu xun aka juni jaskai jiwei taenikiaki.

⁸⁻⁹Jadidia badi juaikidi estekidia Edén anu Jehová Diosun bai banakin mai anua ji jawenduabu inun ji piti bimiyabu benemaxun, bai nekia miban ji bimiyaya ja pia jiwepakemati pepa inun chakabu unanti ji benemadiaxun ma juni damiwa iyuxun jadi jiwemanikiaki. ¹⁰Bai mecha wai Edén anua jene taxni jabai taei jene tibi texexai 4 jene jabai taenikiaki, jeneidan. ¹¹⁻¹²Jene ja dukun jawen kenadan, Pisón inikiaki. Janua Havilá jidabi datanbauna janu oro mane tashipa pepajaida inun, bedelio mane inun, ónice meshupa jayanibukiaki. ¹³Jene xexa betsa jawen kenadan, Guihónki Cus jidabi datanbauna inikiaki. ¹⁴Jene ja dabe inun besti jawen kenadan, Tigris inikiaki. Janua badi juaikidia Asiria datanbaina inikiaki. Janua jawen jenei jene dabe inun dabe Éufrates inikiaki.

¹⁵⁻¹⁷Edén bai anu Jehová Diosun juni iyuxun bai ibu wamakin mekemakin yuikin: “Na bai anu ji betsa betsapa bimi min pitiki. Jakia pepa inun chakabu unanti ji bimi betsa mepakeyamaxanwen. Jamen min kemukin piadan, min mawaxanaii”, iwanan, yuitan ¹⁸ana shinankin: “Juni ja mesti jiweadan, pemaki”, ixun, “Jau jatun medabewapakexanun, en damiwaxuaiin, ja itsadan”, ixun ¹⁹janua mai anua yuinaka daniyabu inun peiyabu damiwashinxun: “Jau junin jadakidida jatu kenanun”, ixun Jehová Diosun uinmakin iwea jamapai yuinaka shadabu bestibu ja junin

jatu kenakin keyua jadidi jatun kena inibukiaki, ikibi ikidan. ²⁰Jaska inabu yuinaka inun peiyabu inun inabuma yuinaka junin kenakin keyutan jakia ja keska jatun medabewapakexanai jayamaken ²¹Jehová Diosun jawen kushipawen juni uxan uxajaidaken jawen pishi bestichai tsekaxun namiwen xui buatan ²²Ja pishi ainbu wakin damiwaxun juni uxanu iyua juni bestentan ²³yuikin: “Nadan, jawen nami en namiki. Jawen xau en xaudiki”, iwanan, “Juni anua tsekawen taexun kenakin: Ainbuki”, anikiaki. ²⁴Jaskawen taea junin jawen ibubu dapaxkabain ainyainan, jawen ainbe jiwei yuda bestichai keskati waniki. ²⁵Janua juni inun jawen ain tadiuma dakeama jiwei taenibukiaki.

**Adán inun Evan Jehová Diosun jancha
ninkama inibukiaki, na janchadan**

3 ¹Jehová Diosun yuinaka betsa betsapabu damiwanidan, dunun jawenabu binumai unanepajaidakin ainbu padankin yukakin:

—Uian. “Bai ji bimi betsa betsapa tibi piyamaxankanwen”, akin ¿Diosun matu nemashinamen?— aka ²⁻³ainbun yuikin:

—Bai ji bimi nun pitiduki. Jakia Diosun nuku nemakin: “Bai nekia ji bimi betsa kemukin piyamaxankanwen. Meyamakanwen. Piadan, man mawaxanai”, nuku ashianki— aka ⁴⁻⁵dunun ana yuikin:

—Jaskamaki. Man mawama ixanai. Diosunan, chanima unan keyuikiki. Man ja keska iyananun ja ji bimi pepa inun chakabu unanti man piyamanun matu nemashinaki, man ja keska itidukenan— aka ⁶ainbun shinankin:

—Ja ji bimi piti shadabuki. Jawenduaki. Jawen unantikiaki— ixun tsekaxun pixun jawen benedi ma jua inan jatundi pitan ⁷xabakabi unankin tadiuma unantan yuinamei:

—Nun jawawen juneamaki, nukun yudadan— ixun dakekin ni higuera pei kexea jawen chiabukutan ⁸badi matsiaya mapuabun Jehová Dios bai neki juai jawen bana ninkatan bai chaka medan juneabun ⁹Jehová Diosun juni kenakin:

—¿Min janimen?— aka ¹⁰taxnibidan kemakin:

—Bai nekia min juai ninkatan tadiuma datejaidai en junexuki— aka

¹¹—¿Min tadiumadan, tsuan mia yuixumen?— atan —¿Ji bimidan, “Piyamawe”, en mia ashian min pixumen?— aka ¹²junin yuikin:

—Jatun ea medabewati ainbu min ea inanshinatun ji bimi ea inan en pixuki— aka ¹³Jehová Diosun ainbu yukakin:

—¿Min jaskakin jaska waxumen?— aka ainbun yuikin

—Dunun ea padan en pixuki— aka ¹⁴⁻¹⁵Jehová Diosun dunu yuikin:

—Min jatu padanxunwen taexun yuinaka dasibi medanua en mia chakabuwaii. Na jabiatian badi tibi jiwei nutawen kakin min mai putu

pipakexanaii— atan —Mia inun ainbu, min bababu inun jawen bababu en sinatanamemapakexanaii— jatu watan Satanás dunu medan jiwea yuikin:

—Min jawen tae chichuku keyukin isin wanbia maemakin ainbun baban binukin min buxka buchushkin xepa wanun badikiki— atan ¹⁶ainbudi Diosun yuikin:

—Min bake kaiain tibi isinjaidawakin ana en mia tenemapakexanaii. Jakia: “Isinjaidaki”, min ibiakin min bene bechipai min jabe chutanamepakexanaii, min benen mia mekekin ibu wadan— iwanan, ¹⁷⁻¹⁹junidi yuikin:

—“Ji bimidan, piyamaxanwen”, en mia wabiashina min ainen jancha ninkatan min pixuki. Jaskawen taexun mai ichakanika en mia waxuaiin. Badi tibi jiwea min piti mai anua bixun pi min dayajaidapakexanaii. Min yunu banabia muxa inun chaka main mia benemaxunpakexanikiki. Min mai putudiana min piti pi dayajaidai min niskanpakexanaii. Mai en mia damiwa min mawadan, min ana jawendi maixanaii— akaya

²⁰—Januxun na yudabu dasibi jau jawen jiwexanunbun, iwanan, shinankin junin jawen ain kenakin: “Evaki”— anikiaki, nukun janchadan: “Dasibi jiwexanaibun jatun ewa wakinan.” ²¹Jehová Diosun juni inun jawen ain bichi tadi waxuntan jatu sawematan ²²janua Dios jamebi yuinamekin:

—Uian, junidan, nuku keskatanan, pepa inun chakabu unantan jiwepakemati ji bimi bixun pitiduki. Jaskai juni inun jawen ain jiwepakexankanikiki, mawamadan— itan ²³Edén bai ewapa anua jatu kainmatan januxun ja janua mai juni dami waima anua taxnimakin nichinkin jamebi jau bai wanun nanta yununikiaki. ²⁴Diosun juni kainmatan janua jiwepakemati ji bimi janu kati bai anu jau jadi ana tsua kayamanun mekemakin yunukin badi juaikidia Edén bai jikiti xui anu jawen nai tsuma punyan peiyabu nichintan jawen meketi nupe chaipa chi jedeya dabekekaunkin chaxakaunkin jau mekenunbun jawen nemakin Jehová Diosun jatu mekemanikiaki.

Caín inun jawen betsa Abelkidi eskai jiwenibukiaki, na janchadan

4 ¹Edén bai anua jatu kainma kaxun junin jawen ain Eva chutakin bakewa jawen bake tue bena kaian ja dukun bake nanea juni bake kainxun kenakin: —Caínki— iwanan shinankin: —Diosun ea medabewaiwen taexun juni bake en kainxuki— inikiaki. ²⁻³Janua chipu ana jawen benen bake betsa wa juni bakedi kaian kenakin: “Abelki”, anikiaki. Ja dabe yumewabu ewatan Abel chaxuwan yumewanika ikaya Caín bai wanika inikiaki. Janua betsatian janu Jehová Dios kenwainbutian inankuinkatsi ikin Caínen jawen bai anua yunu bexun inanyan ⁴⁻⁵jabiaskadi wakin inankuinkatsi ikin Abelin chaxuwan bake

xua pejaida bexun Dios inan Diosun Abel inun jawen inankuin jatuna besti bechipajaidakin jakia Caínena dananyan Caín benimama amua sinatajaidaya

⁶Januxun Jehová Caín yukakin:

—¿Min jaskai sinatai amuamen?— iwanan, ⁷yuikin:

—En mia yusian ninkai min benimaxanai— atan ana yuikin:

—En yusian danain min pepamaken chakabu miki jikia sinata paen mia achitan kanemakatsis ikikiki, inu pubein keskaidan. Jakia min chakabun mia maemapaya min chakabudan, nemaxanwen— aka

⁸ja ninkabiashina chipu xaba betsatian Caínen jawen betsa Abel yuikin:

—Unu kayunuwe— abaina jabe ka bai anu jikixun Caínen jawen betsa kushakin tenanken ⁹Jehová Diosun unantan chipu Caín yukakin:

—Min betsadan, ¿jania?— aka

—¿Eadan, en jawen mekenikamen? En unanmaki— aka ¹⁰Jehová Diosun yuikin:

—¿Min jaska washinamen?— iwanan —Min betsan jimi mai anu jabai sai ikin jau en mia kupinun ea yuikiki. Min betsadan, min tenanshinaki— iwanan ¹¹⁻¹²—Maiwen en mia yupuaii. Min betsan jimi maiki jabai mechashinawen taexun en mia chakabuwaya min yunu banabia min miban ana jukuanma ipakexanikiki. Jaskaken mai jidabi anu datei min jiweakeakexanai— aka ¹³⁻¹⁴Caínen yuikin:

—Mia anua ea nichinkin en mae anuadi min ma ea kainmadiaxuki— iwanan, ana yuikin: —Mai jidabi anu en jawauma kakunkaini kauanaya min ea datepaketi waxuki. Enabu tibi eki nukua en dateaya ea debu waxankanikiki. Min ea kupia bikajaidadan, jaska tenei en jiwetidumaki— aka

¹⁵—Jaskamaki— iwanan, Jehová Diosun yuda dasibi unanmakin yuikin:

—Tsuanda Caín tenanyanan en kupijaidaxanai— atan, jau ja uintan jau deteyamanunbun Jehová Diosun unanti wakin Caínen betunkuki kene netanikiaki.

Caín jawenabuya eskai jiwenibukiaki, na janchadan

¹⁶Jehová Dios anua Caín taxnia Edén anua badi juaikidi ka Nod mai pakea betsa anu jiwexun ¹⁷Caínen ainbu bitan jabe jiwexun chutanamekin bakewaima juni bake kaian kenakin: “Henocki”, atan janua jawenabu pai mae ewapajaidaibun kenakin jawen baken kenakidi kenakin: “Henocki”, adianikiaki.

¹⁸Henocin bake betsadan, Irad inikiaki. Iradin bake betsadan, Mehujael inikiaki. Mehujaelin bake betsadan, Metusael inikiaki. Metusaelin bake betsadan, Lámeccin inikiaki. ¹⁹Lámeccin ainbu dabe ainwan jatun kena Adá

inun Silá inikiaki. ²⁰Adáki bake wa juni bake kaian kenakin: “Jabalki”, anibukiaki. Jabalin bababun bichi jiwe watan jawen jiwebaunkin ina awa yumewapaunibukiaki. ²¹Adán ja kachu bake bia juni bake kaian kenakin: “Jubalki”, anibukiaki. Jubalin bababun arpa mimawati dispiya inun tepedewe mawanika ipaunibukiaki. ²²Silá dikabitun bake bia juni bake kaian kenakin: “Tubal-caínki”, anibukiaki. Tubal-caínen bababun mane bronce inun hierro mabu betsa betsapa chaxa bexmas wamisbu ipaunibukiaki. Tubal-caínen pui kaian kenakin: “Naamáki”, anibukiaki.

²³⁻²⁴Xaba betsatian Lámečin jawen ain dabe jatu yuikin: “Adáan, Siláan, man en ain dabeki. En jancha ninkakanwen. Juni bedunantun ea kushakin ea tenanpanan ean en tenanxuki. Juni betsan Caín deteaya 7ki kupitidubuki. Jamen, eadan, juni betsan ea deteadan, 77ki kupixankanikiki”, jatu anikiaki.

Adánen bake betsa Set kainikiaki, na janchadan

²⁵Ana Adánen jawen ain Eva chutakin bakewaima ana juni bake kaianyan kenakin: “Setki”, iwanan, shinankin yuikin: “Caínen Abel debu waimawen taexun Diosun juni bake betsa ea inanxuki”, inikiaki. ²⁶Set ewai ainyantan bake bawaima juni bake kainxuna kenakin: “Enóski”, akimaxun jabiatandi Jehová nukun mekenika Dios ea akin kenwankin taewakubainibukiaki.

Adánen enabu pai jiwei eskanibukiaki, na janchadan

5 ¹⁻²Ja dukun juni Adán inun jawenabu jiwei taei eskakubainibukiaki. Diosun yudabu damiwakin jawen yushin itsa ja keska juni inun ainbu jatu damiwanikiaki. Jaska waxun jatu kenakin yuikin: “Yudabuki, juni inun ainbudan”, akimaxun jatu medabewakubainikiaki, duawakinan. ³Ja dukun juni Adán jiwekunkaini 130 badiyatun juni bake betsa bawa jawen yuda keska ja itsa kaian kenakin: “Setki”, anixun ⁴ana 800 badi Adán jiwekunkainkin juni bakebu inun ainbu bakebu bawakubaini ⁵930 badiya mawanikiaki.

⁶Set 105 badiyatun juni bake bawaima kaian kenakin: “Enóski”, anixun ⁷ana 807 badi jiwekunkainkin juni bakebu inun ainbu bakebu bawakubaini ⁸912 badiya mawanikiaki.

⁹Enós 90 badiyatun juni bake bawaima kaian kenakin: “Cainánki”, anixun ¹⁰ana 815 badi jiwekunkaini juni bakebu inun ainbu bakebu bawakubaini ¹¹905 badiya mawanikiaki.

¹²Cainán 70 badiyatun juni bake bawaima kaian kenakin: “Mahalalelki”, anixun ¹³ana 840 badi jiwekunkainkin juni bakebu inun ainbu bakebu bawakubaini ¹⁴910 badiya mawanikiaki.

¹⁵Mahalalel 65 badiyatun juni bake bawaima kaian kenakin: “Jéredki”, anixun ¹⁶ana 830 badi jiwekunkainkin juni bakebu inun ainbu bakebu bawakubaini ¹⁷895 badiya mawanikiaki.

¹⁸Jéred 162 badiyatun juni bake bawaima kaian kenakin: “Henocki”, anixun ¹⁹ana 800 badi Jéred jiwekunkainkin juni bakebu inun ainbu bakebu bawakubaini ²⁰962 badiya mawanikiaki.

²¹Henoc 65 badiyatun juni bake bawaima kaian kenakin: “Musalénki”, anixun ²²ana Henoc 300 badi jiwei Diosun yunua axuin jabe jaibunamekunkainkin juni bakebu inun ainbu bakebu bawakubaini ²³⁻²⁴Diosbe jaibui jabe nia 365 badiya mawama jau jabe jiwei kanun nai anu Diosun iyuken jawenabun benabu mai anu yamanikiaki.

²⁵Musalén 187 badiyatun juni bake bawaima kaian kenakin: “Lámecki”, anixun ²⁶ana 782 badi jiwekunkainkin juni bakebu inun ainbu bakebu bawakubaini ²⁷969 badiya mawanikiaki.

²⁸Lámec 182 badiyatun juni bake bawaima kaian ²⁹kenakin: “Noéki”, iwanan, “Ja dukun juni damiwa ninkamaken Diosun mai yupumaniwen taea nukun daya bikajaidaken nuku jatun daya meputakamakin juindukunmakin nuku medabewaxanikiki”, ani ³⁰ana 595 badi jiwekunkainkin juni bakebu inun ainbu bakebu bawakubaini ³¹Lámec 777 badiya mawanikiaki.

³²Noé ma 500 badiya jawen bakebu jawa ainbu bakebu bikin jusiama juni bake dabe inun besti jayanikiaki, jatun kenadan, Sem inun Cam inun Jafetdan.

Yudabun Diosun jancha ninkama chakabui eskai jiwenibukiaki, na janchadan

6 ¹Yudabu jiwei pai mai anu nati iki taekin ainbuaibu yumei ewaibu ²Dios kenwainbun Dios kenwanbuman ainbu bake uinkin shinankin: “Ainbuaibu jawenduabuki”, ikin betsa betsapa shadabu katuxun ainwanibukiaki.

³Januxun Jehová Diosun jatukidi shinankin: “En yushinen jatu medabewapaibia yudabun ea shinanma chakabukubainkin jatun yuda besti shinain jiwekanikiki. Jaskaibuwen taea ana jatixuinda junibu jiwetidubumaki. Jaskakubainaibu ana 120 badi besti yudabu jiwetan debuxankanikiki”, inikiaki.

⁴Jabiatiandi yudabu keyatapa kushipa ewapajaida jiwedianibukiaki. Jabunan, Dios kenwanikabun ainbuaibu jabun Dios kenwanbuma jatu ainwantan chutanameakeakekin jatu bake wa bake ichapa kaian ewatan janua jabu dukun xenipabui bebunkidijaida xanen ibu kushipabu unanepa jidabibun unankin jatu kenwainbu jiwepaunibukiaki.

⁵Jehová Diosun jatu unankin: “Mai anu yudabu chakabujaidakin jatun shinan chakabu jawa jeneabumajaidaki. ⁶Mai anu yudabu en jatu damiwabiani jatun chakabuwen taea en juntinin en bika tenejaidaii”, ixun ana shinan chankanma ⁷yuikin: “Yudabu en jatu damiwabiani ea sinatamakanikiki. Yudabu jatu tenankin yamawakin jabiaskadi yuinaka

betsa betsapa inun, main xadaibu inun, peiyabudi mai anu en jatu damiwani dasibi en jabube tenan keyudixanaxai. En jatu damiwabiani jatukidi en ma shinan betsa jayaki”, inikiaki.

**Diosun Noé yunua xaxu nunuti bau keska
ewapa wanikiaki, na janchadan**

8-9 Jakia Noé pepa jiwekin Dios benimawakubaini eskai jiwekunkainikiaki. Jawenabube jiwea ja bestu pepakin Noé bestitun Dios jaibuwakin jawen jancha chibain jiwekunkainkin 10 juni bake dabe inun bestu bawaxun jatu kenakin: “Sem inun, Cam inun, Jafetki”, anikiaki.

11-13 Mai anu jiweabu chakabui detenamei ichakanikai jatun mae chakabuwapauinukiaki. Jatun chakabu uinkin Diosun Noé yuikin: “Yudabun shinan chakakin akaibu uintan eska jatukidi en shinanshinaki. Mai anu ibubis chakabuwaibuwen taexun yudabu dasibi inun mai anuabu dasibi en jatu tenankin keyuxanaxai, yamawakinan”, iwanan, 14 “Xaxu bau keska nunuti ewapa jene jikitiduma wawe, bau itsa dintuya wakinan. Jawen bexpa tibi buiwen buyakin puxakin keyuwe, pechiudi inun naxpauidan”, atan 15 ana yuikin: “Jatixun waxanwen, 135 metro jawen chaipa wakin inun, 22 metro medio jawen jaxpa wakin inun, 13 metro medio jawen kexa keyatapa wakinan”, iwanan, 16 “Januxun jawen mabe buiwen puxakin keyutan jawen mabexanwen. Jaska watan uke medan tapu dabe wakin nabe dabeya waxanwen. Januxun jawen uinti xui pishta manaundi metro medio waxanwen, januxun janu jikiti xui namakis beputiya wakinan. 17 Min ma jaska wakin keyuken en jene yunukin tueaya yudabu dasibi mai anu jiwebaunabu achi keyua jenen jasai debui keyuxankanikiki. 18 Jakia en mia yubaii. Jawen nunuti min xaxu medan min ain inun, min bakebu inun, min babawanbube nunuti medan min jikia man benuyamanun en matu mekekubainxanaxai”, akin 19 yuitan yuinakabudi jiwemakatsi ikin yuikin: “Jiwemakin bestibu dabe nunuti medan mibe bichixanwen, yuxan inun benedan, mia keskai jau jabudi jiwepakexanunbunan”, atan 20 “Piti inun pitibuma yuinaka betsapa bestibu yuxan inun bene mianu ibubis beaibu en mia jatu mekemaxanaxai. 21 Piti betsapa betsapa bikin midimajaida ichawatan aduxanwen, minabu inun yuinakabubetan min jatubetan pixanaidan”, aka 22 jaska Diosun yunua Noén dasibi ninkashinxun chibankin akin keyunikiaki.

Jenewen Diosun yudabu jatu kupinikiaki, na janchadan

7 1 Januxun Diosun Noé yuikin: “Yuda dasibibube min jiwebia mia bestu min pepaki, en jancha ninkai jiwekunkainidan. Jaskawen taea nunuti medan minabuyas jikidiwe”, atan 2-3 ana yuikin: “Pitibu yuinaka betsapa tibi, 7 yuxan inun 7 bene nanekin jatu bichixanwen. Ja dikabi peiyabu bene 7 inun

yuxan 7 nanekin jatu bichidiaxanwen. Pitibuma yuinaka betsa betsapa tibi yuxan bestichai inun bene bestichai nanekin bichidiaxanwen, jabu mawama mekei jau mai anu mibe ana jiwexanunbunan. ⁴Januxun ana 7 xaba keyuaya mai anu ui en tueaii. Jakia taewakinan, 40 xaba inun 40 yame tanamakin ui nesewama en imaxanaii. Jaska wakin mai anu en damiwani en jawen yamawaxanaii, jiweabu dasibi jasakin tenan keyukinan”, aka ⁵dasibi Diosun jaska yunua Noén akin keyunikiaki.

⁶Noé 600 badiyaken jene matai taenikiaki. ⁷Jeneki datei jawen ainbe inun, jawen juni bakebube inun, jawen babawanbube Noé jawen nunutiki jiki taenikiaki. ⁸⁻⁹Pitibu yuinaka inun pitibuma yuinaka betsa betsapa tibi jatube jikidianibukiaki, yuxan inun benedan. Dasibi jaska Diosun Noé yunua jawen jancha chibain jikinibukiaki.

¹⁰Ana 7 xaba keyuaya jene matai taeaya ¹¹Noé 600 badiya jiweken janua ja baditian ma 2 uxe inun 17 díatian mai anua jene tuekeaya nai udia ui baxnekei tuekediaya ¹²40 xaba inun 40 yame tanamakin mai anu ui imanikiaki, Diosunan.

¹³Jabiatiandi ui iki taeaya Noé inun jawen ain inun jawen bakebu dabe inun besti Sem inun, Cam inun, Jafet inun, jawen babawan dabe inun besti xaxu nunuti medan jikiaibun ¹⁴pitibu yuinaka inun pitibuma yuinaka inun jabu nun ina waisma inun jabu nun ina wamis yuinaka betsa betsapa tibi inun nutawen xadai mapumisbu inun peiyabudan, jati jatube jikinibukiaki. ¹⁵⁻¹⁶Dasibi juinsinamisbu mai anu jiweabu tibi Noébe nunuti medan jikibainbainaibun jaska Diosun yunua yuinaka yuxan inun bene jiki keyuaibun xaxu nunuti medan Jehová Diosun ibubis jatu bepunikiaki. ¹⁷Janua 40 xaba ui iki jenediamaken ana jene ewakin matawakin jawen nunuti nuntankin taewaya ¹⁸janua jene ana matai ewakunkainkin mai dasibi binumaya xaxu nunuti nunukaunaya ¹⁹jenen mai binumajaidakin mati keyatapa dasibi achimakin ²⁰7 metro ana matakini binumakin mati dasibi achikin mabidis akin keyunikiaki. ²¹Jaskaya yuinaka inun yudabu mawai ²²dasibi jamapai shadabu jabu juinsinamisbu mai anu jiweabu mawai keyunibukiaki. ²³Jaska wakin mai anu jiweabu Diosun dasibi keyu tenankin yudabu inun yuinaka yamawaken jakia jatibu Noébe besti nunuti medan jikiabus jawa mawabumaken ²⁴janu ui ma neseken jene netsudiamana dasibi bepukin keyua netsuyuama ana 150 xaba iyunikiaki.

Diosun jenewen jatu kupishina netsui eskanikiaki, na janchadan

8 ¹Janua Noé inun yuinaka betsa betsapa shadabu xaxu nunuti medan Noébe jiweyuabun Diosun jatu shinankin jene tsusin wankin taewakin niwe xunku imaya jene netsui taekainaya ²mai medianua jene ana tueama inun Diosun ui nemakin nai anuadi nese waya ³janua jene unanxubida netsui taekainaya janua 150 xaba binukaini netsukunkaini taei ⁴janu ma uxe 7ken

inun xaba 17tian janu xaxu nunuti Ararat Mati tsauakeakea mamaki dakaken
 5jene ma netsukunkainaya ja uxe tibi taxnikunkaini 10ki niaya jatian jawen
 día ja dukun taeaya ja mati jawen budu keyatapajaida ma taxnia bechitan

6janua ana 40 día xaba binuaya januxun uinti xui waima Noén bepentan
 7yuinaka betsa peiya meshupa nichian nuya atankin jau jene netsutan
 taxkayunun manai ana juamaken 8-9januxun Noén ana shinantan: “Ma
 mai tsusinmenkain, jau jatundi uintanun”, iwanan, Noén deiwan nichian
 nuyakauankin uian dasibi mai anu netsudiamaken jani bututima ana
 chintunkidani xaxu nunuti anu ana juaya Noén jawen meken sananxuna jaki
 tsaua nunuti medan ana bichitan 10januxun ana 7 xaba Noén manatan deiwan
 ana nichian ka 11badi kai meshuaya ana deiwan chintunkidankin ni pei bei
 Noéki nukuaya uinkin yuikin: “¡Jabaa! ¡Ni pei bena tukunbidanibikain!” jatu
 wa jaskawen taea: “Mai tsusinki”, ikin jene ma netsuai Noén unankin 12ana 7
 xaba manatan deiwan ana nichian ka ana juama jadibi niti inikiaki.

13Janua Noé 601 año ma jayaken jatian jene netsui keyuken ja jaskaidan,
 badi bena uxe ja dukun día iki taeaitianan, jawen xaxu nunuti jawen mabepu
 pekakin bepen keyutan mai ma tsusian uintan 14ana jabias badi uxe 2 día
 27 tian mai ma tanki keyuken 15-16jabiatian di Dios Noébe janchakin yuikin:
 “Nunuti anua kaindikanwen, mia inun, min ain inun, min bakebu inun, min
 babawanan. 17Yuinaka pitibu inun, pitibuma inun, jabu man ina waisma
 inun, jabu man ina wamis yuinaka betsa betsapa tibi inun, nutawen xadai
 mapumisbu inun, peiyabudan, dasibi kainmadiwe, jabudi mai jidabi anu
 jau bua jadia bakeyai paditanunbunan”, aka 18Noé jawenabube kaiyanan
 19yuinaka mani betsa tibi xaxu nunuti medanua jabiaskadai kainbainbukiaki.

20Januxun Noén Jehová kenwankin eska wanikiaki. Mishki chi tapu
 wakin mishki ichawakin maspu watan yuinaka pitibu betsa betsapa tibi
 bixun tesenxun chi tapu anuxun menukin kua keyuaya 21jawen kuin nue
 maiai Jehová Diosun xetekin benimakin shinankin: “Junibu ewadiama
 shinan chakabui taemisbuki. Junibu ewatan jabiaskadi ikubainmisbuki.
 Jaskabiaken jatu kupikatsi ikama en ana mai jatu chakabuwaxunama
 ixanaii, kupikinan. Jenewen en jaska waimadan, mai anu jiweabu dasibi
 en ana jatu tenanma ixanaii.

22Janua mai jidabi pe iyuaya eskayukunkainxanikiki.

Miban banati pe inun yunu tsekati pe ipakexanikiki.

Badi kui inun matsi ikunkainxanikiki,

badi pakei inun ui pakeidan.

Xaba jui penai inun meshu jui badi kaidan,

jaskai dasibi ikunkainxanikiki”, inikiaki.

Dios Noébe yubakai eskanikiaki, na janchadan

9 1Diosun Noé inun jawen bakebu duawakin yuikin eska wanikiaki.
 “Bake ichapa bawai ana pai mai anu ana iake iakebaunxankanwen,

jiwebaunidan”, iwanan ana yuikin: 2-3 “Yuinaka pitibu inun pitibuma matuki datei dakenunbadikanikiki. Peiyabu nuyaibu inun, main mapuabu inun, jenen jiweabudan, ja yuinaka dasibi en matu ibu wamaai, dasibi matun piti wakinan. Ja dukun yunu besti en matu inaniki, man pinunan. Janua ikis yuinakadi inun yunu en matu inaiin, matun pitidan, ja pi man jiwepaxexanunbunan. 4 Eska besti en matu nemaii. Yuinaka nami jimi kauanama piyamaxankanwen. Jamen jiminan, yuda jiwemamiswen taexun nami jawen jimiyabi piyamaxankanwen. 5-6 Eadan, en Dios en yushin itsa keska wakin yudabu en matu damiwaniwen taea tsuada pubenkin yuda kasmai yuinakapan yuda betsa tenanken, manakukin juni betsandi jau ea tenanxunxanunwen. Jabun matu tenanbu unankin jakimama en jatu unanti wakubainxanaii”, itan 7 ana jatu yuikin: “Jakia matu jiwekinan, bake ichapa bawakin ana ichai pakunkainkin mai jidabi matakin ibu wapaxankanwen”, iwanan,

8-9 Noé inun jawen bakebu ana yuikin: “Matu inun jabia matuwen pakubainxanaibu chanima en matu yubaii, jawa matu padanma matu jenetima wakinan. Ninkakanwen. 10 Pitibu inun pitibuma yuinaka jabube en matu yubadiai. Na man jabu paxaima en dasibi matu yubaii, matube xaxu nunuti anua kainshinabubedan. 11 Jaska dasibi matu inun jabu yubakin maiwen jiweabu dasibi jenewen en ana matu tenanma ixanai en yubakaii. Jaska en akima keska wakin mai anu jiweabu jenewen en yamawaima keska wakin ana jabiaiwendi en ana akama ixanaii.

12-13 Nawan bai tapinkin en yubaka unanti wakin en nai anu sintanpakekin en kainmapakexanaii. Jaskawen taexun mai anu jiwebaunabu dasibibun uinkin: ‘Nuku yubaniwen taexun jenewen Diosun nuku ana tenankin keyuama ixanikiki’, ikin shinanpaketidubuki. 14-15 Jaska biamawakin nai kuinwen en mai achimaya nai anua butui nawan bai sintanpakeaya en matu inun yuinakabube yubakani jakimama en shinankubainxanaii. ‘Jenewen jiweabu dasibi en ana tenankin keyuamaki’, axun 16 nawan bai sintan tapinxun uinkin mai anu yudabu inun yuinaka jiweabu dasibi en jatu yubani jakimama en shinankubainxanaii. 17 Nawan bai sintan en jatu pakexunaya mai anu jiweabun en jatuki yubakani uinkin yudabun ea shinankubainxankanikiki”, jaskai Dios Noébe yubakai janchanikiaki.

Noé inun jawen bakebu jiwei eskanibukiaki, na janchadan

18 Noén juni bakebu Sem inun, Cam inun, Jafet xaxu nunuti anua kainmabu chipu Camnen juni bake bawaima kaian kenakin: “Canaánki”, anikiaki. 19 Noén juni bake dabe inun besti mai anu pakunkaini ana ichai iake iakekubainibukiaki.

20 Janua nunuti anua kainbidanimaxun Noén bai wakin taewaxun uva tacha banaimaxun 21 jawen vino buspuai aka paejaida jawen tadi jiwe

medan tadiuma uxa dakaken ²² Canaánen epa Cam jikikain jawen epa Noé tadiuma paean uxa daka uintan kainkidan kaxe wakín jawen betsa dabe jatu yuia ²³ Sem inun Jafetin jawen dakukuti bitanxun june uianma jamaudi besukain jatun epa tadiuma daka yabutan kainbidanabun ²⁴ Noé paean bestentan bepe ikai jawen bake maxkun kaxewaxu yuiabu tapintan ²⁵ jawen baba yupukin yuikin:

“Canaán inun jawen bababu duawama ichakawakin
jatunabun jatun dayanika jawen esclavo jatu wakubainxankanikiki,
dayamakinan”,

akin jatu yuinikiaki. ²⁶ Januxun ana betsa yuikin:

“En mekenika Dios Jehován
jau Sem inun jawen bababu ikubainaibu
jau jatu duawakubainxanunwen.
Ja inun, Canaánen bababudan,
jau jawen dayadu esclavo ikubainxanunbunwen,
Sem dayaxunidan.

²⁷ Jaska inun, Diosun jatu pa waya
Jafetin bababun Semnen bababu jatu mebintan
jatun mae jau ibu waxanunbunwen,
Canaánen bababu jatu esclavo wadiakinan”,

akin Noén jatu yuinikiaki.

²⁸ Noé 600 año jayaken jenen mai jidabi achima netsuniken ana 350
año Noé jiwea ²⁹ janua 950 año jaya Noé mawanikiaki.

Noén enabu jatu tanakubainibukiaki, na janchadan

10 ¹ Janua jidi jenen jatu achitan netsuniken Noén bakebudan, Sem inun, Cam inun, Jafet jabudi jiwekainkin jatun bakebu inun jatun bababu bawai jiwei pai eskanibukiaki. ² Jafetin juni bakebu kenakinan: “Gómer inun, Magog inun, Madai inun, Javán inun, Tubal inun, Mésec inun, Tiráski”, anibukiaki. ³ Gómerin juni bakebu kenakin: “Asquenaz inun, Rifat inun, Togarmáki”, anibukiaki. ⁴ Javánen juni bakebu kenakin: “Elisá inun, Tarsis inun, Quitim inun, Rodanimki”, inibukiaki. ⁵ Jafetin jawen bakebu ianenwan kexa betsa anu buxun dasibibun ibu wai xuku tibi jatun jancha betsa wakín jatu paxka akeakenibukiaki.

⁶ Camnen juni bakebu kenakinan: “Cus inun Misraim inun Fut inun Canaánki”, anibukiaki. ⁷ Cusin juni bakebu kenakin: “Sebá inun, Havilá inun, Sabtá inun, Raamá inun, Sabtecáki”, anibukiaki. Raamán juni bakebu kenakinan: “Sebá inun Dedánki”, anibukiaki. ⁸⁻⁹ Januxun ana Cusin juni bake bawaima kaian kenakin: “Nimrodki”, ani Nimrod ewatan ja dukun xanen ibui taei kushipai Jehován medabewaya Nimrod dekuyajaidakin yuinaka ichapa tsakapaunikiaki. Jabiatandi Nimrodkidi shinankin juni betsan jawenabu kenwankatsis ikin yuikin: “Jhován mia

medabewaya min dekuyajaidadiakunkainxanaii, Nimrod keskaidan”, akin jatu yuipaunibukiaki. ¹⁰Sinar mai pakea anu Nimrod xanen ibu taekin jawen maewan tibi Babel inun, Érec inun, Acad inun, Calné ibu wanikiaki. ¹¹⁻¹²Sinar anua maewan betsa Asur anu kaxun mae bena wakin kenakin: “Nínive inun, Rehobot-ir inun, Quélah inun, Resenki”, aka Resen mae ewapajaida Nínive inun Quélah namakis ketaxameakiaki.

¹³⁻¹⁴Camnen bake Misraimnen juni bake ichapa jatu bawakubainima jabu pai jawen bababu xukukubainaibu kenakin: “Ludeo nawabu inun, Anameo nawabu inun, Lehabita nawabu inun, Naftuhíta nawabu inun, Patruseo nawabu inun, Casluhíta nawabu inun, Caftorita nawabuki”, anibukiaki. Casluhíta nawabu pakubaini jatu anua xuku betsa maei Filisteo nawabu paxkai keyuni pakubaini jабianudi jiwekubainnikiki.

¹⁵⁻¹⁸Janua Camnen bake betsa Canaánen juni bake dabe bawani ja dukun Sidón inun ja kachu Het inibukiaki. Jawen bababu betsa betsapa jiwea akeakexun bake bawai xukui pajaidanibukiaki, Jebuseo nawabu inun, Amorreo nawabu inun, Gergeseo nawabu inun, Heveo nawabu inun, Araceo nawabu inun, Sineo nawabu inun, Arvadeo nawabu inun, Semareo nawabu inun, Hamateo nawabu wakinan. ¹⁹Janua Canaánen baba betsa betsapabu jatun maewan kexa kesuakea Sidón mae ianenwan kexa betsa dapi anua kai Guerar binui Gaza anu yusmaudi chintunkauan Sodoma inun Gomorra anu ana yusmaudi chintunkauan Admá inun Seboím binui Lesa anu ana yusmaudi chintunkauana anu maewan Sidón anu jikia janu jiwepaunibukiaki. ²⁰Jaskai Camnen baba ikubaini jatun jancha betsa betsapawen taea mae xukua betsa betsapai paxkabaini bui mai pakea tibi ibu wakeaketan janua pai jabias yudabu jiwekubainmisbuki.

²¹Ja dikabi Jafetin juchi Semnen bakebu bawanidan, Éberin bakebudan, jatun xenipabu Sem inikiaki. ²²Semnen juni bakebudan: “Elam inun, Asur inun, Arfaxad inun, Lud inun, Aramki”, akin jatu kenanibukiaki. ²³Semnen bake Arammen juni bakebudan: “Us inun, Hul inun, Guéter inun, Maski”, jati jatu kenakin tananibukiaki. ²⁴Semnen bake betsa Arfaxadin juni bake bawaima kaian kenakin: “Sélahki”, anikiaki. Ja ewatan Sélahin juni bake bawaima kaian kenakin: “Éberki”, anikiaki. ²⁵Ja ewatan Éberin juni bake dabe bawa ja dukun kaian mai jidabi anu yudabu paxka akeakenibuwen taexun jawen bake kenakin: “Pélegki”, axun ana juni bake bawaima ja kachu betsa kaian kenakin: “Joctánki”, anikiaki. ²⁶⁻²⁹Joctán ewatan 13 juni bakebu bawakubaini jatun kenadan: “Almodad inun, Sélef inun, Hasar-mávet inun, Jérah inun, Hadoram inun, Uzal inun, Diclá inun, Obal inun, Abimael inun, Sebá inun, Ofir inun, Havilá inun, Jobabki”, inibukiaki. ³⁰Joctánen juni bakebu dasibi Mesá mai pakea anua badi juaikidia Sefarkidi mati matipanua pai jiwepaunibukiaki. ³¹Janua Semnen enabu jaskai jatun

jancha betsa betsapawen taea mae betsa betsapa anu jiwenu ika paxka akeakenibukiaki.

³²Jidi jenen jatu achini ma netsuniken jaskai Noén bababu pai xuku betsa betsapai mai jidabi anu jiwenu ika paxka akeakenibukiaki, jancha betsa betsapawen jancha akeakeidan.

**Babel anuxun jiwe keyatapajaida waibu Diosun jatu
kupikin jatu paxkanikiaki, na janchadan**

11 ¹Janua eskatian mai jidabi anu paxkadiabumajaida yuda dasibi janus jiweabutian jatun jancha jabanwens janchapaunibukiaki. ²Badi juaikidi bukubainkin atimas Sinar anu mai pepaki nukutan bai wati pepa anu janua maewaima paxkadiama jiwea ³yuinamekin shinankin: “Ja jiwe wati na mai bawananwen, chi ichapawen bawakin kushi wakinan”, ixun jiwe wati mishki yamaken mishki keska wakin jiwe wati mai bawa midimawaxun bui chaxkawen tsamakubainkin ⁴ana yuinamekin: “Mae ewapa wanankanwen. Januxun mae namakis anu januxun uinti jiwe tapaitiya wabainkin keyatapajaida wakin tsamakubainkin nai medan jikiti wanankanwen, jaskawen taexun dasibitun jau nukun uinti jiwe jawendua jau shinankubainxanunbunan. Jaskai jiwei mai jidabi anu nun paxkama ixanai”, ixun ⁵dayakin nai anu jikiti keyatapa mai bawa tsamabainkin taewabainaibun Jehová Diosun jatun daya uinkin ⁶yuikin: “Uian, dasibi jabias yudabudan, jatun jancha jabiaski. Ibubis unanepakin jaska daya taewaxun jamapai shadabu shinankin atidubuki, pepa inun chakabudan”, iwanan, ⁷ana yuikin: “Jatu anu butuxun jatun jancha paxkananwen, jancha betsa betsapaya wakinan. Jaskawen taea jau ana janchai ana ninkakananyamanunbunan”, itan ⁸jatu jancha paxkakin betsa betsapa wa mai jidabi anu jau paxkanunbun Jehová Diosun jatu betsa wa mae ewapa wabiai jatun daya jenebainibukiaki. ⁹Januxun Jehová Diosun jatun jancha ninkatima wakin itimaska wa xuku tibibaini paxkabainibukiaki. Ja mae anuxun jatu jaska wawen taexun jatun mae kenakin: “Babelki”, anibukiaki, nukun janchawen yuiadan: “Jancha Betsa Betsapa Junea Ninkatimadan”, akinan. Januxun Babel mae jidabi anua Diosun jatu paxkakin nichian akeakenikiaki, Noén enabu pawakinan.

Semnen enabu jatu tanakubainibukiaki, na janchadan

¹⁰Semnen enabu pai eska jiwenu yuiaki. Jidi jenen jatu achini ma netsui keyuniken 2 año ka ana binutan Sem 100 badiyatun juni bake bawaima kaian kenakin: “Arfaxadki”, ayama ¹¹januxun juni inun ainbu bakebu ana jatu bawakubaini 600 año binua mawanikiaki.

¹²Janua Arfaxad 35 badiyatun juni bake bawaima kaian kenakin: “Sélahki”, ayama ¹³ana 403 año jiwekunkainkin juni inun ainbu bakebu ana jatu bawakubaini 438 año jaya mawanikiaki.

¹⁴⁻¹⁵Janua Sélah 30 badiyatun juni bake bawaima kaian kenakin: “Éberki”, ayama ana 403 año jiwekin juni inun ainbu bakebu ana jatu bawakubaini 433 año jaya mawanikiaki.

¹⁶⁻¹⁷Éber 34 badiyatun juni bake bawaima kaian kenakin: “Pélegki”, ayama ana 430 año jiwekin juni inun ainbu bakebu ana jatu bawakubaini 464 año jaya mawanikiaki.

¹⁸⁻¹⁹Janua Péleg 30 badiyatun juni bake bawaima kaian kenakin: “Reúki”, ayama ana 209 año jiwekin juni inun ainbu bakebu ana jatu bawakubaini 239 año jaya mawanikiaki.

²⁰⁻²¹Janua Reú 32 badiyatun juni bake bawaima kaian kenakin: “Serugki”, ayama ana 207 año jiwekin juni inun ainbu bakebu ana jatu bawakubaini 239 año jaya mawanikiaki.

²²⁻²³Janua Serug 30 badiyatun juni bake bawaima kaian kenakin: “Nahorki”, ayama ana 200 año jiwekin juni inun ainbu bakebu ana jatu bawakubaini 230 año jaya mawanikiaki.

²⁴⁻²⁵Janua Nahor 29 badiyatun juni bake bawaima kaian kenakin: “Térahki”, ayama ana 119 año jiwekin juni inun ainbu bakebu ana jatu bawakubaini 148 año jaya mawanikiaki.

²⁶Janua Térah 70 badiya juni bake dabe inun bestichai jayanikiaki, jaton kena Abram inun, Nahor inun, Haránan.

Térahñ enabu eska tananibukiaki, na janchadan

²⁷⁻²⁸Térahñ juni bakebu jati ipaunibukiaki, Abram inun, Nahor inun, Haránan. Haránen juni bake bawaima kaian kenakin: “Lotki”, ani janua jawen epa Térah mawadiamaken Caldea mai pakea anua jawen mae Ur anua jabia kaini anuadi ja dukun Harán mawanikiaki. ²⁹Haránen ana bake dabe bima ainbu bake Milcá inun juni bake betsa Iscá inikiaki. Janua Abram inun Nahor ainyankin Abramnen Sarai biaya Nahorin Milcá janubi binikiaki, jawen betsa Haránen bakedan. ³⁰Abramnen Sarai mekin chutabiakubaina bake biama xankin chakabu ikunkainikiaki.

³¹Januxun Térahñ Abram inun jawen ain Sarai inun jawen beden Lot iyui Caldea mai pakea anua jawen mae Ur kankainkin jenebaini Canaánkidi kakunkaini atimas mae pepa betsa natian jawen kena Harán anu jikitan jawen bake debuniwen taexun mae kenakin: “Haránki”, atan janu jiweaibun ³²janua Térahñ ja mae kenani anua 205 año jaya mawanikiaki.

Diosun Abram katuxun nichinikiaki, na janchadan

12 ¹Januxun betsatian Diosun Abram yunukin yuikin: “Min mae anua kankainkin minabu xununbainkin paxkabainwen. Min mai jenekin min epan enabu jenekin min epan jiwedi jenebainwen, jadi min jiwexanai anu en mia uinmaxanai anu kakinan. ²Miwen taexun

minabus pawakin nawa xukua betsa ichapa kushipa wakin en tadi jatu jiwemaxanaii. Pepawakin duawakin en mia medabewapakeξανaii, min kena jatu unanma akeakekinan. Miandi min jatu pepawadiaxanaii.

³Januxun tsuanda mia pepawaya en jatudi pepawaxanaii. Jakia tsuanda mia chakabuwakin yupuwaya jatu kupikin entsedi en jatu mia yupuxunkubainxanaii, manakukinan. Ja inun, miwen taexun nawa betsa betsapa mai jidabi anu xukua jiwebaunabu dasibi en jatu pepawadiaxanaii”, aka

⁴⁻⁵Diosun yuia ninkatan 75 año jaya Abram Harán anua kainkaini kakin jawen ain Sarai iyui inun jawen betsan bake Lot iyui inun jawen tsumabu midima ibu wakin binixun jawen jamapai tibi jatu bumai Harán anua Canaánkidi uxa ichapakunkaini bui ⁶atimas mai pakea betsa Canaán anu jikitan surkidi bui Siquem maewan anu jikitan Moré ji xukua mapua dapixun januxun yushibu kenwanmisbu dapi jiwetushiyunibukiaki, janu Canaán nawabudi jabias maewan anu jiwediabu anudan. ⁷Jehová Diosun Abram nichian kashian yuikin: “Na mai pakea jidabi minabu pakubainaibu ibu wamakin en jatu inanunbadiaii”, aka ma janu ana jaki nukuawen taexun Abramnen Jehová kenwanun, iwanan, mishki chi tapu wakin mishki ichawakin maspu watan janu chiwen kuakin chaxuwan bake bene pepa textexun jimi jaba watan januxun menukin keyukin Jehová Dios kenwanikiaki. ⁸Janua badi juaikidi kai mati betsanu mati betsa Betel inun Ai mae betsa namakis jatun bichi tadi jiwe nichinshinabun januxun Abramnen ana Jehová Dios kenwanun ixun mishki ana manchinkin ichawatan Jehová kenawen ana kushipa yukakin kenwandianikiaki. ⁹Janua jawen inapan piti basi benai surkidi unanxubida bui Néguebkidi janu eskadabes jiweabuanu bua ketanibukiaki.

Abram Egipto anu ka jiweyunikiaki, na janchadan

¹⁰Janua ui ana ikamaken basi ana beneama Canaán anu janu jiwea anu piti yamaken Abramnen enabu bunijaidaibun Egipto anuabu piti jaya ninkatan Egipto anuxun piyutanun ika Abramnen jatu iyui ¹¹Egipto mai pakea anu nukui kai kemakin Abramnen jawen ain Sarai yuikin: “Uian, min ainbu jawenduajaidaki. ¹²Egipto nawabun mia uinkin ea tenantan mia bitan mia besti jiwematidubuki. ¹³Jaskaken jatu yuikin: ‘En puiki’, akin jatu ea yuixunxanwen, jau ea tenanyamanunbunan. Min jatu jaska wa ea duawaxankanikiki, ea deteamadan”, abaini

¹⁴janua atimas Egipto anu jikishinken Egipto nawabun yuikin: “Ainbu jawenduaki”, ikaibun Abramnen yuishina keska wakin Sarain jatu yuikin: “En puiki”, jatu wa ¹⁵Egipto nawabu xanen ibu bexmas betsa betsapan Sarai uinkin jatun xanen ibujaida Faraón yuikin: “Hebreo nawa ainbu jawenduajaidaki. Xanen ibu Faraónen jau binunwen”, iwanan, xanen ibujaida Faraónen jiwe anu iwexunabu

¹⁶Jaska wabainkin bimabu Saraiwen taexun Faraónen Abram duawakin chaxuwan inun, ina awa inun, asno inun, camello inun, ainbu dayadubu esclava inun, juni dayadubu esclavo inanikiaki. ¹⁷Jakia Saraiwen taexun Egipto nawa xanen ibujaida inun jawenabus Jehová Diosun isin chakabu paepa jatu tenemaya xanen ibujaida Faraónen jatu yukabaunkin Sarai jawen ainkidi tapintan ¹⁸⁻¹⁹Abram jatu kenama jua yukakin: “¿Min ea jaska wai? ¿Jaskakin min ea yuiama itushimamen, min ainkididan? ‘En puiki’, min ea wa en jiwe anu ea iwexunimabuki. ¿Jaskai min chani chakaimamen? Uinwen. Min ainki. Ana bitan iyui nenua kadiwe”, atan ²⁰jaki sinatakin jawen mekenikabu yunua Egipto anua Abram jawen ain inun, jawenabu inun, jawen tsumabu inun, dasibi inainmaya nichinibukiaki.

Abram inun Lot paxkanibukiaki, na janchadan

13 ¹Janua Egipto anuxun nichianbu kai nortekidi Abramnen jawen ain inun, jawen betsan bake Lot inun, jawen tsuamabu inun, jawen jamapaiya kakin jatu iyui Négueb mai pakea anu chintunikiaki, ²Abram mabuwanyan mane oro tashi chaxakapa inun, mane plata juxupa chaxakapa mane juxupa inun, mabu ichapa inun, inabu ichapaya buidan. ³⁻⁴Janua ana nortekidi Betelkidi bui jiwekunkainkin uxe tibi nichinkubaini bui atimas janu dukun Canaán mai pakea anu jatun bichi jiwe nichini anu Dios kenwankin mishki manchinkin ichawatan januxun dukun kenwani anu ja mae dabe Betel inun Ai namakis anu ana jikitan jabianuxundi Abramnen ana Jehován kena yuikin kushipa yukatushinikiaki.

⁵Janua Lot Abrambe kayama jadi mabuyai jawen inabu ichapa inun jawen tsumabu ichapa jabe jayaken ⁶dasibi ja dapi jabe jiwexun jatun inabu ichapatun basi jawaida pikin keyuaibun jatun tsumabun jawen inabu jania pimatima ⁷Abramnen tsumabun inun Lotin tsumabun inabu pimanun ika yaushinain jatube ja iki detenameaibun jabianudi Canaán nawabu inun Ferezeo nawabu jabias maewanu jatun inaya jiwediabun jaskawen taea basi ichapa jayabia damaken ⁸januxun jawen betsan bake Lot Abramnen yuikin: “Epaan, min enabi kayabiki. Jaskawen taea ja ikadan, chakabuki. Jaskayamananwen, nukun ina mekenikabu mina inun enabubedan. ⁹Jaskaken mai jamen ikikiki. Nuku dapikea jadatuda mai pepa uintan katuwe, janu tadi jiwetanxunan, ea dapaxkabainan. Janua min nortekidi kaya ea kaidan, surkidi en kaxanaii. Janua min surkidi kaya ea kaidan, nortekidi en kaxanaii. Mianan, ja dukun mian janu min unanuma jiwexanai benabaunkin uinbaunkin jadatuda mian dukun katuwe”, aka

¹⁰Lot nixun benakin uinbaunkin Jordán jene napanpa Sóar mae pishta anu dapi uinkin basi inun jene pepa bechinikiaki, Egipto paxku

kexa bai pepa keskadan. Ja jabiatianan, Diosun Jordán jene napanpa mae dabe Sodoma inun Gomorra nai anua chiwen menudiamaken
¹¹Jordán jene napanpa bechipaikin katutan Lotin jawenabu badi juaikidi jatu iyunikiaki, jatu janu jiwemakinan. Jaskai Abram inun Lot paxkanibukiaki, tadi jiweidan. ¹²Canaán mae anu mananan Abram jiwea Sodoma dapi napanpa anu Lotin jawen tadi jiwe watan jiweyunikiaki.
¹³Janua Sodoma nawabu jiweabudan, junibu chakabu atimapajaidakin Jehová Dios danain chakabukubainibukiaki.

¹⁴Lot ma kaken Jehová Diosun Abram yuikin: “Janu min nia anuxun uinbaunwen, nortekidi inun, surkidi inun, badi juaikidi inun, badi kaikidi uinkin. ¹⁵Ja mai jidabi min uiain inankin en mia ibu wamaxanaii, mina inun minabu paibudan. ¹⁶Ja inun, ean minabu pakubaini midimaibu mashiti tsuan tanatiduma keska en waxanaii. Minabu pakubainaibu tsuan jatu tana keyutiduma inunbadikanikiki. ¹⁷Janua benia nixun mai jidabi uinbaunwen, jawen jaxpa inun jawen chaipadan. Ja min uiainan, en mia ja ibu wamakin inanxanaii”, aka ¹⁸janua Abramnen jawen tadi jiwe jawen tsumabu pekamatan bekubidankin Mamré ni xukua medan jatun tadi jiwe ana nichintan jiwenibukiaki, mae Hebrón dapidan. Januxun mishki chi tapu wakin mishki ichawakin maspu watan Abramnen januxun Jehová Dios kenwanikiaki.

Jawen beden Lot achibainshinabu Abram mebikinantanikiaki, na janchadan

14 ¹⁻²Na jabiatianan, Sinar nawa xanen ibu Amrafel inun, Elasar nawa xanen ibu Arioc inun, Elam nawa xanen ibu Quedorlaómer inun, Goím nawa xanen ibu Tidal jatun piayabube jatuki dasitan sinatakin Sodoma nawa xanen ibu Bera inun, Gomorra nawa xanen ibu Birsá inun, Admá nawa xanen ibu Sinab inun, Seboím nawa xanen ibu Seméber inun, Bela mae jawen kena betsa Sóardan, xanen ibu tibi jatun piayabubetan jatu detei bekin ³Sidim napanpa anua jawen kena Mar Muerto, nukun janchawen Ianenwan Batapa, dapi ja 5 xanen ibubu jatun piayabube ichaxun mananibukiaki. ⁴Quedorlaómerin 12 año ka xanen ibukin dasibi jatu tsuma wanixun ana badi betsatian jatu ichakawaya ana xanen ibu wakatsi ikama ana duawabuma ⁵⁻⁶ana badi bestichai ka Quedorlaómer inun xanen ibu betsa 3 jatunabubetan shinantan nawa betsa betsapabu detenamekin 5 mae maemakin detetan ja tibi jatu tsuma wanibukiaki. Astarot Carnaim anu kaxun Refaíta nawa tsuma watan Ham mae anu kaxun Zuz nawa tsuma watan Savé-quiriataim mae anudi kaxun Emita nawa tsuma watan Seír Mati anu kaxun Horeo nawa tsuma wakin detekin jatu chibanbaini El-parán anu jadi tsua jiweabuma anu dapikea ⁷jadi chintuntani bekin Quedorlaómer inun jabun medabewaibu En-mispat jawen kena betsa Cadés anu jikitan tsuada Amalec nawabuki

nukutan jatu dete keyutan Hasesón-tamar mai pakea anuxun tsuada Amorreo nawabukidi nukutan jatudi dete keyunibukiaki.

⁸⁻⁹Januxun 5 mae xanen ibubun jatun piayabubetan Sodoma nawa xanen ibu inun, Gomorra nawa xanen ibu inun, Admá nawa xanen ibu inun, Seboím nawa xanen ibu inun, Bela nawa xanen ibu medabenamekin detekin jatu nemakatsis iki napanpa Sidim anu ichaxun manaibun janua Quedorlaómer inun, Tidal inun, Amrafel inun, Arioc besubukuan mapuabu jabu 4 xanen ibun maedan, Elam inun, Goím inun, Sinar inun, Elasarán, jabu jatun piayabube bei detenamenibukiaki. ¹⁰Janua Sidim mae anu janu napanpa ja medibi bui chaxka xantu ewapa ichapa jayanikiaki. Janua detenamekin jatu maemabu Sodoma nawa inun Gomorra nawa xanen ibu ja dabe uinun ika kushibaini ja xanen ibu dabe paxai ja kini ja medibi bui chaxka xantuki pukua mawaibun xanen ibu betsabu mati anuadi ni medan paxai idudianibukiaki. ¹¹Jabun jatu detekin maemaxu Sodoma inun Gomorra mae anu jikitan jatunabu betsa achitan jatun mabu pepa inun jatun piti biantan ¹²Abramnen betsan bake Lot jawenabube jiwea jatu achidiatan jawen mabu inun jawen inabuya jatu buanibukiaki. ¹³Janua Mamré Amorreo nawa xanen ibu jawen mae Mamré ni xukua medan jiwea Mamré inun jawen betsabu Escol inun Anerdan, Abram jatun jaibuwen taea janua juni bestichai june paxa juxun jaska detenamebainshinabu Abram Hebreo nawa yuinikiaki. ¹⁴Janua jaska Lot achidiabainshinabu Abram banabima ninkatan Abramnen jawen tsumabun bake pawaimabu jawenabu keska detenamenikabu jatuki chiti ikain mebikinantanun ixun jau jabun medabewanun 318 junibu jatu ichawatan jawen jaibuaibudi Amorreo nawa detenamenikabu jabu dikabi ichawadiatan Lot ibukin jatun tae tanabaini bukin Dan mae anua june jatu bechitan ¹⁵janua meshu medan jatu binuxun kushibidan janu maniabu anu jikixun jatu deteaibun datepaepai jatidi betsabu kushibainaiibu jatu chibanbainkin detekubainkin Hobá mae Damasco mae ewapa besuudi nortekidi jatu chibankubainkin jenetani ¹⁶Abram junibun jatu putamatan Lotin mabu inun jawenabu ainbu inun juni iyushinabu jatu mebikinantan januxun mae dabetunadi jatun mabu inun jawenabu mebikinantan ana jatu iwenibukiaki.

Melquisedecin Abram duawakin pekidi yuinikiaki, na janchadan

¹⁷Quedorlaómer inun xanen ibu betsabu dete keyutani Abram ana chintunkidanaya Sodoma nawa xanen ibu kai Savé napanpa anu jawen kena Xanen Ibut Napanpa janu Abramki nukua ¹⁸Salem xanen ibu Melquisedec Dios dasibi binu keyuabe jawenabu janchaxunika jadi jawen tsumabu kadiakin misi inun uva vino buxun Abram inun jawen jaibuaibu jatu pimatan ¹⁹Abram Melquisedecin pepawakin yuikin:

“Dios dasibi binu keyua nai inun mai jidabi damiwanitun
jau mia duawakin pepawakubainunwen.

²⁰ Dios kushipajaida dasibi binuatun miki sinataibu
min jatu maemanun mia binumakin medabewashina
ja besti kenjaidawanenwen”,

aka Abramnen mabu mebikinanshina Melquisedec inanun, iwanan, mabu
betsa betsapa jusia décima parte Melquisedec jamen inankuian binikiaki.
²¹⁻²⁴ Januxun Sodoma nawa xanen ibun Abram yuikin:

—Mabu dasibidan, minaski. Janua yudabudan, jabu besti ea inanwen—
aka Abramnen kemakin:

—Jaskamaki. Dios kayabitun nai inun mai jidabi damiwani ma en jabe
yubakakin: “Jatun mabu en biamaki”, en ishianki. Januxun min jawada
en mia bianyamawen taexun min ekidi yuikin: “Abram en mabuwanyan
wayamaki”, iwanan, min jatu ekidi yuitiduki. En mia nemaii. Mabudan,
en bikatsi ikamaki— iwanan, yuikin: —Jawada enabun ma piabu inun en
jaibuaibun ebetan deteshinabu jatun manakuti jau jabun binunbunwen,
Aner inun, Escol inun, Mamrénan, jabunadan— anikiaki.

Dios Abrambe yubakanikiaki, na janchadan

15 ¹ Jaska waimaken ana uxa nama keskawen Jehová Diosun jancha
wakin Abram yuikin:

—Abramneen, dateyamawe. En min mekenantun benimawakin en mia
duawakin ewapa waxanai— aka ² Abramnendi yuikin:

—Jehová Diosun, ¿ea medabewakin jawa min ea inantidumen, ea
benimawakinan? En ain kayabi anua juni bake min ea inainsma en jawa
jayamaki. Jaskakenan, en tsumabu mekenika Eliézer jawen mae Damasco
anua enabumabiatun en mawaken ena dasibi ibu waxanidaka, xanen
ibukinan— iwanan, ³ ana yuikin:

—Uinwen. En ain kayabiki min ea juni bake inanmaken en tsuma en jiwe
anua kainitun en jamapai dasibi ibu waxanikiki, xanen ibukinan— aka
⁴ ana Jehová Diosun kemakin:

—Jaskamaki. Madiastun min jamapai ibu wama ixanikiki.
Jakia juni bake min bawa kaian ewatan jatun dasibi ibuai xanen
ibuxanikiki— iwanan,

⁵ ana taxnimabain jemaintin Abram iyuxun Jehová Diosun yuikin:

—Nai beiskin bishi tanawe. Min tana keyutidumaki. Jabiatidi minabu
pakubaini jaskanunbadikanikiki— aka

⁶ Abramnen Jehován jancha ninkakin ikuainwen taexun Jehová Diosun
jakidi shinankin yuikin: “Abram juni chakabuma pepaki”, itan

⁷ ana yuikin:

—Eadan, en Jehováki, Diosdan, na mai min bixanun mia inankatsi ikin
min mae Ur Caldea mai pakea anua en mia iweniki— aka

8—Jehová Diosuun, na mai en ibu waxanaidan, ¿min ea jawawen unanti wamakin mestenwanmai en jawen unanunan?— aka

9Diosun ana yunukin yuikin:

—Ina awa yuxan babupa 3 año jaya inun, cabra yuxan 3 año jaya inun, chaxuwan bene 3 año jaya inun, deiwan inun dei kudu katutan ea bexunwen— aka

10jaska yunua axunkin Abramnen Dios kenwankin inankatsi katutan yuinaka bexun tesentan jabu tibi namakis bais abainbainxun kekunbainkin ukedi janakin ukedi janakin namakis bai tapintan janua peiyabu bais akama tenyexke bestixun janaxuna 11 ishmin bunikin pinun ika butuaibun januxun Abramnen jatu bamaya 12janua badi ma jiki chaxakaini meshuaya Diosun Abram uxanchakayama namakin uianyan meshun achibidana datejaidaya 13Jehová Diosun Abram ana yuikin:

—Minabu eskai jiwexanaibu bebunkidi en mia unanmai ninkawe.

Nawabun mai pakea betsa anu buabu jadixun jatun bakebu esclavo waxankanikiki. Jatu jaska watan jadixun jatu ichakawakin 400 año minabu jatu dayamaxankanikiki. 14Jatu jaska waibu uintan eandi jatu unanti watan en jatu kupixunxanai. Jabun jatu ichakawaibu nawabu en jatu kupixunaya minabu kainbaini paxaxankanikiki, jatun mabu ichapa bibaini buidan.

15Jamen mia ikidan, jaskadiabuma unanuma jiwea anibujaidai min mawa mia maiwabu minabuki min jatuki nukuxanai. 16Jakia ja mai pakea anu minabu jikitan jatun ibuwen 4 xenipabu pakea tibi jiwekubainaibutian jabun bakewakubainaibu ewatan jabiatandi 400 año binukainaya minabu jadi jiwea jatu ichakawabu en jatu paxawa minabu Canaán anu nenu jabianudi ana jiwei chintunbidani benunbadikanikiki. Janua Amorreo nawabu na nenu jiweabudan, jatun chakabu pikujaidadiabumaken en jatu kupinunbadiai en manayukubainxanai— aka

17ma badi ka meshujaidaya ina yuinaka detea bais axun manchinbaina namakis chi jede keska kuinjaida taxnitan jede ji ji ichakayamai binu binu ikaya 18-21jabiatandi Jehová Diosun Abram yubakin yuikin:

—Egipto anu paxkuwen pakea inun jene ewapa jawen kena Éufrates namakis na mai jidabi minabu en jatu inankin ibu wamanunbadiaii. Quenita nawabu inun, Quenizita nawabu inun, Cadmoneo nawabu inun, Hitita nawabu inun, Ferezeo nawabu inun, Refaíta nawabu inun, Amorreo nawabu inun, Canaán nawabu inun, Gergeseo nawabu inun, Jebuseo nawabudan, jabu jiwebiabun jatu kainmakin mebintan minabu janu ja mai en jatu ibu wamaxanai— anikiaki.

Agarin bake Ismael kainikiaki, na janchadan

16 1-3Canaán anua 10 año ka jiwebiaxun Abramnen bake wanun, iwanan, jawen ain kayabi Sarai chutabiakubaina Sarai bakeumakunkainkin shinan betsa watan jawen bene yuikin:

—Uinwen. Min ea bake wabiapanan Jehová Diosun ea bake bimama ea nemamiski. Jaskawen taexun en shinain en mia yuiiai. En dayadu esclava jayaki. Agar bixun ja chutakin ea jaki bakewaxunwen. Peiwen Agar en dayadu tsuma en waniwen taexun jatun bake bibia ena ixanikiki, jakia en juni bake jayatidumenkainan— aka jawen bene Abramnen jawen ain Sarain jancha ninkakin:

—Peki. Jaska min ea yunuai en mia axuntiduki— ikaya Sarain jawen dayadu esclava Agar jawen bene Abram yunuaiwen taexun ⁴Abramnen Agar jubuntan bake wa Agarin bake bishinxun ma tuya unain: “Ma en bakeyaki”, ikin ja dayaxunmis Sarai ana bechipaiama danain: “En ma binuaki”, ika jaki padanai kaxeaya ⁵janua Sarai Abramki sinatakin yuikin:

—En esclava Agar en mia yunuimadan, min ja bake waima ea danankin yuankin chakabuwaiwen taea min mia chakabuki, en dayadubia bake bimawen taea ea danainkikidan. ¿Jadatu nun chakabu itidumen? ¿Min miamenkain? ¿En eadaka? Jadatuda Jehová Diosun besti nuku unantiduki— aka

⁶Abramnen jawen ain Sarai daewanun, iwanan, kemakin:

—Uinwen. Miadan, min en ain kayabiki. Min dayadu esclavadan, minaki. Jawada min jaska pe shinain keska wakin jaska wawe— aka januxun Sarain jawen esclava Agar danankin ichakawa uintan paxai ⁷⁻⁸mae betsa Sur bai kawen kai janu tsua jiweabumanu Agar paxashina jadi ja chacha dapi tsauken Jehován nai tsuma jaki nukutan yukakin:

—Agariin, min Sarain dayadu esclavaki. ¿Jadakidia min juamen? ¿Jadakidi min kai?— aka yuikin:

—En tsuma Sarai anua paxai en junekidanshinaki— akin yuia ⁹Jhován nai tsuman Agar ana yuikin:

—Jadidi ana kama nenua chintundikainwen. Min dayaxunmistun jancha ninkakin jawen yunua axundikubaintanwen— atan

¹⁰⁻¹¹—Dateyamawe. Min bakewen taexun minabu pakubainaibu en jatu ichapa wadiaxanaii, tsuan jatu tanatidumawadiakinan— atan — Uian, ja min tuyadan, min juni bake kainxanaii. Min tsumapan mia ichakawaya Jehován min bika teneai ninkaiwen taexun min bake kenakinan: “Ismael”, waxanwen. ¹²Ja min juni bake ewatan tsuan mekin daewakin yudanwantiduma keska ixanikiki, yuinaka ni medan jiwea jawen yuda caballo keska pubenan. Jaska keskadiai dasibibuki jatuki sinataya jaki sinatadiakubainxankanikiki. Ja inun, jawenabu mestenepa wakin jatu kushipa Diosun waniken janua tsuanda jaki sinatabiakin jawa maematidubuma ipakexankanikiki— aka ¹³Agar Diosbe janchaxu shinankin yuikin:

—Diosun ea uinbiaxu mawama en jiweyuaki. Jaskawen taexun na nenu kenakinan: “Diosun uiainki”— akin Agarin kenanikiaki. ¹⁴Jaskawen

taexun mae Cadés inun Béred ja dabe namakis unpax chacha kenakin: “Jamebi Jiweatun Ea Uinmistun Chachaki”, akin kenakin ani jaska yuimisbuki. ¹⁵⁻¹⁶Janua Agar paxashina chintunkidan jawen tsuma Sarai anua jawen juni bake kaian Abram 86 badiyatun kenakin: “Ismaelki” anikiaki.

**Abrahamnen enabu jawen unanti wakin jatun jina kubichi
jau mextenunbun Diosun yununikiaki, na janchadan**

17 ¹Janua Abram 99 badiya jiweken Jehová Dios jaki nukutan uinmakin ana yuikin:

—Eadan, en mekenika kayabi Dios kushipajaidaki, dasibi binun keyuadan. Jaskaken en bedubi en mia uianyan mianan, en jancha chibankubaini pepas aki jiwekunkainwen, chakabu meamadan— atan ²Diosun ana jancha wakin:

—Uatian en mia jaska yubani min bababu wakin midimawakin en mia jatu pajaida wamaxunxanaii— aka ³⁻⁴Abramnen Dios kenjaidawai jawen beyawen taea main beua beti ika dakaken Dios ana jabe janchakunkainkin yuikin:

—Ninkawe, en mibe yubakaidan. Eanan, en mia yubaii. Miwen taexun minabu xukua betsa betsapabu ichapajaida en jatu pajaidawaxanaii. Janua miadan, min jatun xenipabu inunbadiiai. ⁵Jaskaken min kena Abram mia ana jawen kenabumaki. Minabu xukua betsa betsapabu en mia bawama min jatun xenipabu ixanaiwen taea min kena betsa bena wakin: “Abrahamki”, akin mia kenaxankanikiki. ⁶Minabu pa wakinan, midimajaida jatu wakin jatu paxkakubainkin xukua betsa betsapabu en mia jatu bawamaxanaii, jatidi xanen ibu kushipabu wakinan. ⁷Mia inun min bakebu inun min bababu inun dasibu minabus ipakexanaibu en jatukidi yubakadiai, niti ikamadan. Ikis en min mekenika Dioski. Min ma mawaken chipu en jabun Dios idiaxanaii, jatu medabewakubainidan. ⁸Canaán na janu min ikadan, mai pakea jidabi janu min jiweadan, jabiadi mia inun minabu en jatu ibu wamaxanaii, inankin yunukibi yunukinan. Min mawaken en jatun mekenika Dios ipakexanaii, jatu medabewanun ikadan— iwanan,

⁹Diosun Abraham ana yuikin:

—Mianan, ninkawe. Jaska en mia yuii chibanpaketi ninkawe, mia inun minabus, jau apakexanunbunwen, kaneama niti ikamadan. ¹⁰Eska en matu yubaii, ja chibankin man apakexanunbunan. Juni tibi jawen jina kubichi nupewen bikin jau mextekubainxanunbunwen. Min jatu jaska waiwen taexun minabundi chibankin jau apakediaxanunbunwen. ¹¹Mia dukun min jina kubichi jau mia mextenunbunwen, bikinan. Man jaska waiwen taexun en jancha man chibankatsis ikai en unanxanaii, jawen matu unanti wai en matube ketaxameadan. Jaska

wapakexankanwen. ¹²⁻¹³Na jabiatian unudi man jiwekainaitianan, matun juni bake kaian manakin ma 8 xaba kaken jau jawen jina kubichi mextekin bikubainunbadinunbunwen, minabun bakebu inun matun dayadubu esclavon bakebudi jabiasyadi wakinan. Ja inun, ikis matun dayadubu jaya inun chipu nawa betsa anua peiwen taexun man bia matun dayadu esclavo jabudi jau jawen jina kubichi mextekin bidiakubainxanunbunwen. Jatun jina kubichi biaibuwen taexun jaska en mia jatube yubaxu minabu en unanti wai shinandiakubainxankanikiki, niti ikamadan. En mibe jaskai jiwekunkainxanai jawen unanti wati en mia yubaxuki. ¹⁴Janua tsuada matube jiwea junin jawen jina kubichi mextekin biamaken jau janu matube jiweyamanunbun jatu nichinxankanwen, en matube yubakani akin chibanmakenan— atan

¹⁵—Min ain Saraidan, ana jawen kenawen kenayamawe. Na jabiatian taewakin jawen kena bena watan kenakinan, Sara wakin kenakubainwen. ¹⁶Sara duawakin en pepawaxanaii. Jaki en mia juni bake inaxanaii. Januxun duawakin Saran bakewen xukua betsa betsapabu jawenabu wakin en jatu waxanaii, xanen ibu ichapabu kushipa wakinan— aka ¹⁷Abrahamnen ninkatan main beua beti ixun ikunwanma juinti medans usan tenea dakaxun shinankin: “¿Juni 100 badiyatun ana bake en bawatidumen? ¿Janua Sara 90 badiyatun bake bidiatidumen? Jaskatan nun jaskatimaki”, itan ¹⁸jawen bake Ismaelkidi shinankin Dios yuikin:

—Jaskaken en bake Ismaelkidi min yubatiduki, jiwekainkin min pepa jau chibanunan— aka

¹⁹Diosun ana yuikin:

—Jaskakidi min shinainkidi en janhamaki. Min ain Sara kayabitun bake bixanikiki. Bake bia juni bake kainxanikiki. Januxun kenakin: “Isaacki”, axanwen. Jabe besti en yubakaxanaii. Jawenabu pakubainaibu jatu medabewapakexanun ika Isaacbe besti yubakakin en kanetimawaxanaii. ²⁰Ismaelkidi min ea yui ai en ninkaxudan, uinwen. Ismaeldan, en tadi duawadiaxanaii. Jawenabun bakebu jatu pawakin ichapajaida jatu wadiakin 12 xanen ibubu kushipa idiaxankanikiki, jawen taea jawenabu ichapa kushipa tadi jayadiaidan. ²¹Jakia min ain Saraki min bake waima badi betsan juni bake kaianan, Isaac bestibe en yubakadiaxanaii— akin ²²janha keyutan Dios Abraham anua kainkainaya

²³jabias xabatian Diosun Abraham yubaxu Ismael inun, juni dasibi jatube jiwea juni bake kainmisbu inun, peiwen jatu bitan jatu esclavo wani Abrahamnen jatu ichawaxun jatubetan jatun jina kubichi mextekin ichapa jatu bipakenikiaki, jaska Diosun yunushina chibankinan. ²⁴Janua Abraham 99 badiya inun, ²⁵Ismael 13 badi jayakenan, ²⁶⁻²⁷januxun jabiatian di Abraham inun jawen juni bake Ismael jatun jina kubichi

bitan juni dasibi Abrahambe jiweabudi jatun jina kubichi mextekin jatu bidianibukiaki.

Abrahamnen Sara bake bimaxanaikidi Diosun yubanikiaki, na janchadan

18 ¹Abraham Mamré ni xukua medan jawen tadi jiwe nichinshina jiwea ma badi manananbiken jawen xui jikiti utanu tsauken Jehová Dios jaki nukuyuaya ²Abraham bewenikitan ja bebun juni dabe inun besti mapuabu jatu bechitan jatu inun ika beni kushikaini jatuki nukutan jawen beya chibain danti iki beti itan ³Abrahamnen jatu yuikin:

—Xanen ibuun, ¿min juai?— jatu wa dami yuda kayabitan ja medanua Dios janchai:

—En juaii— ikaya Abrahamnen nemakin yuikin:

—En min tsumadan, ea bechipaikinan, ea binunbaini jawaida kayamawe. ⁴Man jaska bechipaaidan, ¿man juchukinun unpax matu bixuntanpa? Jaskatan ja ji utapan naman tsauyukanwen, juindukuinan. ⁵En jiwe anu man ma juxuki. Eadan, en matun tsumaki. Man ana punu kushinun piti bixun matu pimayunun manakanwen, janua juindukuntan ana butankaxunan— jatu wa

—Jaska min nuku waidan, peki— akabu ⁶jawaida jawen jiwetan jikitan jawen ain Sara yunukin yuikin:

—Menan jawaida 20 kilo xekiwan dudu pepa bitan misi ea waxunwen— aka ⁷janua jawaida ina awa mapua anu kushikaini kaxun jawen bake pepa babupa bechitan achitan bexun jawen tsumabu yuikin:

—Jawaida bawakanwen— iwanan jatu inan ⁸jawaida bawaxunabu awa chuchu inun, misi inun, nami bexun jatu tsauxuntan ji utapan naman nixun jatu uian pikin menetan ⁹Abraham yukakin:

—¿Min ain Saradan, janimen?— akabu

—Tadi jiwe uke medanki— jatu wa ¹⁰ana betsan yuikin:

—Chanima ana badi betsa binutan juxun en mia medabewaya min ain kayabi Saran juni bake bixanikiki— aka

¹¹⁻¹²Abraham mestebujaida inun jawen ain Sara yuxabujaida ana jimi ikamawen taea uke medan tadi jiwe medanua dayakin janchaibu Saran ninkatan jawen juinti medans jawen shinanen usain:

—En bene mestebujaidaki. Eadan, en yuxabuki. ¿Jaska dabe ana benimai chutanamekin nun bake bitidumen?— ikaya ¹³⁻¹⁴januxun jaska Saran shinain Jehová Diosun unankin Abraham yuikin:

—¿Jaskai Saran nuku ikunwanma usanmenkain: “¿En yuxabubia en bake bitan kainxanai?” ikidan? Eadan, en jabia matun mekenika Dioski. Eadan, Jehová kushipajaidatun jamapai shadabu en atiduki. Chanima en mia axuntiduki. Ana badi betsatian ana juxun en matu uinyuaya en kushipawen Saran juni bake bitan jayaxanikiki— aka ¹⁵Sara datekin padantidu dabanen yuikin:

—¡En usanmadukain!— ikaya januxun Jehová Diosun ana kemakin:
—Jaskamaki. En unaiin. Min usanxuki— akin Sara yuinikiaki.

**Abraham Sodoma nawabuwen nuikin Dios
jatu yukaxunikiaki, na janchadan**

¹⁶Janua ja junibu benitan Sodomakidi uin bui jadidi buaibu jatu uinmanun ika Abraham jatube kai bai puchininxun buaibu jatu nichin kaya ¹⁷⁻¹⁸janua Jehová Diosun shinankin: “Abrahamnen enabu pa wakin en jatu ichapa waxanaii. Abrahamwen taexun yuda xukuabu dasibi en jatu pepawaxanaii. Jaskawen taexun jaska Sodoma inun Gomorra anu en aki kai en Abraham junetidumaki. ¹⁹En Abraham katuawen taexun chipu jatundi jawenabudi en yunua chibankin jatu yunua pepakin kaneama chibainbu jaska en janchaxu eandi Abrahamwen taexun en jatu medabewakin axunpakexanaii”, itan ²⁰januxun Jehová Diosun Abraham yuikin:

—Chanima Sodoma nawabu inun Gomorra nawabu chakabujaidamisbuki. Jabu ichakanikanamei kunyan iki sinatanamemisbukiaki. ²¹Jaskamisbu en ninkamis en jadi uin kaii. Jatun chakabu chanimamenkain en uinxanaii— aka

²²⁻²⁴juni dabe besti Sodomakidi buaibun Jehová Diosun besuudi Abraham nixun jatukidi nemakin yukakin:

—¿Chakabubu inun pepabu jusia min jabiati jatu kupi keyuxanai? ⁵⁰juni pepabu besti Sodoma anu jayatidubuki. ¿Jati pepabu jayabiaken dasibi jabuya min jatube kupikin yama wai kai? ²⁵Min jatu jaska wayadan, chakabubu inun pepabu jabiaskas chakabu wamisbu keska wakin ¿min jatu tenan keyuxanai? Mianan, min jatu jaska watidumaki, juni chakabubu inun pepabu jabiaskas kupi keyukinan. Min mai jidabi anu uinikaki. Min pewanikawen taexun min jatu jaska yunuismaki— aka ²⁶Jehován yuikin:

—Peki. Sodoma anu ⁵⁰juni pepabu jayaken jabuwen taexun dasibi en jatu tenan keyuama ixanaii— aka ²⁷Abrahamnen ana yuikin:

—Uian. Min en Xanen Iuken en jawaumajaidabia jatuwen nui en ana mibe janchaii. ²⁸⁵⁰ juni pepabu jayama jakia ⁴⁵ besti jayaken ¿dasibi min jatu yamawaxanai?— aka ana kemakin:

—Peki. ⁴⁵ juni pepabu jayaken Sodoma nawabu jabuwen taexun en jatu kupiama ixanaii— aka ²⁹shinankubainkin Abrahamnen ana yuikin:

—⁴⁰ juni pepabu besti jayamenkain— aka ana Jehován kemakin:

—Peki. ⁴⁰ yuda pepabu jayaken jabuwen taexun en jatu kupiama ixanaii— aka ³⁰ninkamas ana ea akin:

—Eki sinatayamawe. Ana ea akin en mia ana yukaidan, ¿³⁰ pepabu besti jayaken jabuwen taexun dasibi min jatu kupidi axanai?— aka Jehován ana kemakin:

—Peki. 30 pepabu jayaken en jatu akamaki, kupikinan— aka ³¹ana ea akin:

—Uinwen. En Xanen Ibuun, mia chikishwabiakin en mia ana ea akaii. ¿20 pepabu besti jayaken min jatu jaska waxanai?— aka Jehován ana kemakin:

—Peki. 20 pepabu jayaken jatuwen taexun Sodoma en kupiama ixanaii— aka ³²ana ea akin:

—Eki sinatayamayuwe. Ana bestiwakin ea akin en mia yukaii. 10 pepabu besti jayaken ¿jaskada min jatu wai kai?— aka Jehován ana kemakin:

—Peki. 10 pepabuwun taea jabuwun taexun Sodoma nawabu en jatu yamawama iki kaii— atan ³³Jehová Dios Abrahambe jancha menetan kaken jawen tadi jiwe anu Abraham chintunkidanikiaki.

**Sodoma nawabu inun Gomorra nawabu Diosun jatu
kupikin yamawanikiaki, na janchadan**

19 ¹Ma badi kaya janu jikiti bai xexakan janu ichamisbu jemaintin anu Lot tsauxun uianyan nai tsuma dabe Sodoma mae anu kemai beaibu jatu bechitan jatu ikai jatuki nukui benikain jawen beyawen taea jatu bebun danti itan beti ixun ²jatu yukakin:

—¿Man juai?— jatu wa

—Nun juaii— akabu

—Matudan, en matu iyuxun beya wai en jiwe anu beyukanwen— jatu wabain —Ja jadi unpax tsaua jawen juchikikanwen. Janua en jiwe anu uxashini bestentan penaya ana man katiduki— jatu wa jabundi yuikin:

—Jaskamaki. Jemaintin anu nun uxaii— akabu ³Lot jatuwen nuijaidakin jatu nemajaida jawen jancha ninkatan jawen jiwetan jikiabu misi ichapa inun piti shadabu jatu bawaxuna pitan

⁴inadiabumaken Sodoma nawabun ninkatan juni ewabu inun bedunanbu dasibi Lotin jiwe dapi bea kexebaunxun ⁵Lot kenakin daketapa wakin yuikin:

—Badi kaya ja junibu min jiwe anu bekanxukiaki. ¿Jania? Nun jatu chutai jatu nuku kainmaxunwen— akabu ⁶Lot kainxun jawen jiwe anu jatu bichiama beputan datekin ⁷jatu yuikin:

—En jancha ninkakanwen. Chakabu jatukidi shinanyamakanwen. ⁸Jaskaken matu yuinun ninkakanwen. En ainbu bake dabe jayaki, junibe chutanamediamadan. Ja dabe en matu yunutiduki. Jakia ja juni dabedan, meyamakanwen. En jiwe anu jatu mekenun, iwanan, en jatu bichixuki— jatu wa ⁹jabundi Lot yuikin:

—Nawaan, ukedi kawanwen. Jawada pepa inun chakabu nun amisan, min nuku yuimiski. Ikis nun miadi ichakajaidawakatsis ikaii, ja juni dabe nun ichakawatidu binumakinan— atan achinun, iwanan, beputi tu anun

ika beaibun ¹⁰Lot jawen beputi kexa anu nia nai tsuma dabetun dintu medanxun mexunkain Lot tsumaxun bichitan xui bepukin mestenwantan ¹¹janu dasibi xanen ibubu inun xanen ibuma juni ewabu inun bedunanbu jaskaibu jatun kushipawen ichakawakin jatu bechexkin bekunwan beputi benai jikinun ika jaska jikitima Sodoma nawabu jin iki punu nukatan inun buabun ¹²⁻¹³januxun ja nai tsuma dabetan Lot yuikin:

—Na mae anudan, ¿minabu betsa jayamen? Sodoma nawabu kaka chakabujaida Jehován ninkakubainaiwen taexun nuku yuikin: “Jatu yamawawe”, iwanan, nuku yunushinaki. Jaskawen taea min daisbu inun min bakebu ana betsa minabu nenua iyukin chai jatu paxawatanwen, Sodoma nawabu nun jatu yamawaidan— Lot akabu ¹⁴janua Lot kainkaini ja junibu jatu dais wakatsi ikin jatu yubaima i kaxun jatu yuikin:

—Jhován na mae samama yamawaikiaki, jatun chakabuwen kupikinan. Bestentan nenua jawaida bukanwen— jatu wa jawen jancha ikunwanbuma jatu kaxe wai dabanen ikaibun

¹⁵penaya Jehován nai tsumabun Lot nichinkin yuikin:

—Menan jawaida butudiwe. Bututan min ain inun min ainbu bake dabe na min jaya jatu paxa wai chai kaditanwen, na mae nun kupiaya man mawakatsi ikamadan— akabu ¹⁶⁻¹⁷Lot jaska wabu kai yane kain kainama niti itan itanaya Jhová Lotwen nuiaya Lotin meken inun jawen ainin meken inun jawen bake dabetun meken nai tsumabun jatu metsuntan mae anua jatu taxnimabain nichintan yuikin:

—Man mawayamanun paxakanwen. Kai nasaukeama nedidi ana uianma inun napanpanan niti ikama butankanwen, matu yamawadiatidukidan. Ja mati anu paxai jiwei bukanwen— jatu akabu ¹⁸⁻²⁰datekin Lotin jatu ea akin:

—En xanen ibubuun, ea jaska wayamawe. Ewen nuikin ea duawakin man ea medabewaii, en mawayamanunan. Napanpa anua en paxatidumaki. Ja mati anu kai chakabun ea achiken en mawatiduki. Uinkanwen. Ja mati tenanman anu mae pishta jayaki, chaimadan. Janu en paxatiduki. En jiwea mekeidan, ¿ja mae pishta anu katanpa?— jatu wa ²¹⁻²²jabu betsan ana yuikin:

—En ninkaii. Jaska min shinankin nuku yukaidan, peki. Ja mae pishta en yamawatidubia en ja meamaki, jaska min nuku yukayadan. Janua miadan, menan jadi jawaida kaintitanwen, paxaidan. Min jadi jikidiamaken ja maewan en meyuamaki— jatu anikiaki.

Jaskawen taexun ja maedan: “Sóarki”, akin kenanibukiaki, nukun janchawen yuikin: “Mae pishtaki”, jawen kenadan.

²³Ma badi chaxaya Lot Sóar anu jikiken ²⁴Sodoma maewan inun Gomorra maewan anu Jhová Diosun chi inun bui menuai ui keska watan nai anua jatuki puta ²⁵mae inun napanpa inun yudabu inun inabu inun miban dasibi yamawanikiaki, jatu menukin keyukinan. ²⁶Jakia

jatu jaska waya Lotin ainen jawen bene chibain Diosun nai tsuman yuiyai ninkabiabaina Lotin ainen uinkatsi iki nasaukekaun uiain jaskabiama jawen yuda dami tewenikiaki.

²⁷⁻²⁸ Jabias xaba penaya Abraham butukaini kai janua Jehová Diosbe janchashinanu kai jikia nixun Sodoma maewan inun Gomorra maewan anu napanpa dasibi uinbaunkin jawen chi kuin bai ichapa kuabu keska binuan kuinjaidai uinikiaki. ²⁹ Januxun ja maewan dabe inun jawen napanpa menukin yamawadiama Abrahamkidi shinain jawen nuikin Diosun Lot jawen kupiti chakabuwen kupiama paxawaxunikiaki, ja mae anuadan.

**Eskatan Moab nawabu inun Amon nawabu
pai taenibukiaki, na janchadan**

³⁰ Janua Sóar mae anu jiwea datei janu ikatsi ikama Lot kainkaini jawen ainbu bake dabebe ja mati anu paxaima yuda betsabu janu jayabumanu mishki kini tanpe medan jabu besti jiweyuabu ³¹⁻³² janua Lotin ainbu bake dabe yuinamekin yubakakin iyuatun shinantan maxku yuikin:

—Nukun ibudan, ma mestebuikiki. Na mae anu tsua juni jayamaki, nuku jatun ainwantidudan. Jaskas nun jiwetiduki. Nun bakeumaken nukun epan enabu jania patidumaki. Jaskaken nukun epa nun uva vino amatiduki, paenwantan nun chutamanunan. Jaskawen taea nukun epan enabu jau paxanunbunan— itan ³³ januxun jabias meshu medan jatun epa vino amabu paenken jawen ainbu bake iyua dukun jikixun chutamatan kainkidanaya ainbu ma chuta Lotin jawa unanma ikaya ³⁴ janua uxashini bestentan jawen bake iyuatun maxkudi yuikin:

—Uian. Ea dukun nukun epabe en chutanameshinaki. Ana na meshu betsatianan, ana vino amananwen. Januxun miandi jikixun chutamawe. Nuku dabetun bake wamananwen, jaskawen taea jau nukun epan enabu benuyamanunbunan— aka ³⁵ ana meshu medan vino amabu ana paenken maxkudi jabe jikixun chutamatan kaianyan januxun betsa ashian keska wakin Lotin ana jawa unanmajaida idianikiaki. ³⁶ Jatun ibu jaska wamai janubi ja dabe tuyaimabu ³⁷ janua jaskaima iyua juni bake kaian kenakin: “Moabki”, anikiaki. Jaskawen taea na jabiatian jawenabu Moab nawabuki. ³⁸ Janua maxkudi juni bake kaian kenakin: “Ben-amíki”, anikiaki. Jaskawen taea na jabiatian jawenabu Amón nawabuki.

Abraham inun Abimélec eskanibukiaki, na janchadan

20 ¹ Mamré ni xukua anua Abraham kainkaini jawen ain inun jawen esclavo dayadubu inun jawen inabube kakunkaini atimas mai pakea Négueb anu mae betsa Cadés inun mae betsa Sur namakis nashui ika Guerar mae anu jikitan janu Guerar nawabube jiweyukatsi ikin ² jabiatian jawen ain Sarakidi jatu padankin jatu yuibaunkin:

—En puiki— jatu wa jawen ain yuxabubia Sara jawenduajaidaken ainwankatsi ikin Guerar nawa xanen ibu Abimélecin jawen tsumabu Sara jatu iwematan mediama ³janua uxa namaya Diosun Abimélec yuikin:

—Uinwen. Ainbu min jatu iwemadan, juni betsan ainki. Jaskawen taea min mawaxanaii— aka ⁴⁻⁵jakia ja ainbu mekin chutadiamawen taexun Abimélecin Dios yuikin:

—En Xanen Ibuun, ea ninkawe. ¿Tsuada pepa jawa chakabuwamabiaken min tenain? Abrahamnen ea yuikin: “En puiki”, akin ea yuimaki. Ainbu dikabitun: “En puiki”, akin ea yuidiaimaki. Abrahamnen: “En ainki”, ea wadan, en jiwe anu en jatu iwemama ikeanshinaki. Jakia jawa chakabu shinan chakama en jaska washinaki— aka ⁶namayuaya Diosun ana yuikin:

—Jaa, jawa chakabu shinanma unanuma min ainbu jatu iwemashinadan, en unaiin. Jaskaken min ainbu chutapanan en mia nemashinaki. Min chutamawen taea min jawa chakabumaki, ebedan. ⁷Jaskaken ja jawen ain Abraham ana nichinxunwen. Abraham en jancha ea yuixunikawen taexun Abraham ebe mia janchaxunaya min jiwea min mekexanaii. Jakia min nichinxunamadan, min mawaxanaii, minabus inun miadan— aka

⁸jaska namapan uinshini penaya xanen ibu Abimélec butuxun jawen tsumabu jatu kena ichabu uxa namaya dasibi Diosun yuishinai Abimélecin jatu yuia jaska ninkatan datejaidaibun ⁹januxun Abimélecin Abrahamdi kena jikia yuikin:

—¿Jaskakin min nuku chakabuwatushimamen? ¿Jaskakin en mia chakabuwamabia min nukuki chanichakaimamen, nukun chakabuwen atimapawanun ikadan? Jaska min ea waimadan, jaskatimajaidaki. ¹⁰Nuku padain: “En puiki”, iaketainan, ¿min jaskada shinain ikimamen?— aka ¹¹januxun Abrahamnen yuikin:

—Ean shinankin: “Nenua man Dioski meseabumaki”, ika “Ea tenantan en ain bitidubuki”, ixun jaskawen taexun matu yuikin: “En puiki”, akin en matu yuitushimaki. ¹²Jakia chanima en puiki. Nukun epa jabiaski. Janua nukun ewa besti betsaki, jasmadan. Nun jaskabia nukun beya chibankin jawa chakabumaken en Sara ainwaniki. ¹³Ja dikabi en epan enabu anua Diosun ea iweaya en ain yuikin: “Ea duawakin ea mekekin janida betsabu anu jikixun jatu yuikin: ‘En puiki’, akin jatu ea yuixunxanwen”, en waniki— ikaya

¹⁴jaska yuikin Abimélec inun Abraham jabun kaneshina daenamei petan jawen ain Sara ana yunutan januxun Abimélecin jawen chaxuwan inun, ina awa inun, jawen esclavo dayadubu juni inun ainbu inankuintan ibu wamakin ¹⁵yuikin:

—Uinwen. En mai pakea jidabi anu uinbaunwen, jaska janu min bechipaii anu min jiwetidikidan— atan ¹⁶januxun Saradi yuikin:

—Uian. En miwen taexun 1,000 plata pei jexe kadujaida min pui en ma inanki. Jaskawen taexun en jatu uinmaidan, en pepaki, en mia jawa meama ishianan. Ja dikabi mibe mapumisbun ja peiwen unantidubuki. Miadi min ebe jawa chakabuwama ishianan, mikidi jawa chakabu yuikin mia yuanma ixankanikiki— anikiaki.

¹⁷⁻¹⁸ Abimélecín Abrahamnen ain Sara biken jawen taexun jawen ain inun jawen jiwe anu dayamisbu chutanamebiabu jau ana bake biyamayununbun Diosun jatu bexheimaken januxun Abimélecín Abraham jawen ain ana inanken Abrahamnen Dios yukaxunkin yuikin:

—Diosuun, Abimélec inun jawen ain inun jawen jiwe anu dayamisbu jatu xuxa wakin ana jatu bake bimaxanwen— akin yukaxuna samama jatu xuxa wakin ana jatun bake nanti pewanikiaki.

Isaac kain eskanikiaki, na janchadan

21 ¹⁻⁴ Jehová Diosun Abraham yubaimaxun Sara shinankin jatu medabewaya januxun Abraham mestebujaidabiatur jawen ain Sara chutakin bakewaima jaska Diosun yubakin yuima keska Sara juni bake bimaima kaian Abrahamnen kenakin: “Isaacki”, ashinxun 8 xabatian jawen jina kubichi bikin mextenikiaki, jaska Diosun yunuima chibankinan. ⁵ Janua Abraham 100 año jayaken Sara Isaac kaintan ⁶ Saran shinankin: “Diosun ea benimawakin ea usanmaxuki. Jaskaken en juni bake kainshina jabun ninkatan benimadiaxankanikiki, ebetan usandiaidan. ⁷ En benen ea bakewaima kainxuntan en chuchu amaxuntidudan, tsuan bebunkidi shinantidumajaida ikimaki. Jakia en bene mestebujaidabiatur ea bakewaima en juni bake kainxunshinaki”, inikiaki.

Agar inun jawen bake Ismael jatu jiwemabixun Abrahamnen jatu nichinikiaki, na janchadan

⁸ Janua ja jawen bake Isaac ewaya jawen beya chibankin chuchu jenemakin taewaken jabiatandi Abrahamnen jawenabu piti ichapa waxun jatu pimakin benimawaya ⁹ jawen ain betsa Egipto nawa Agarin bake Ismael jaki bepadamekin dayuikin Isaac ichaya jawen ibu Saran uinxun ¹⁰ sinatakin Abraham yuikin: “Min dayadu esclava Egipto nawa jawen bakebe nichindiwe, en ana jatu bechipaiamakidan. Janu nuku nun mawaya nukun mabu inun, nukun inabu inun, nukun dayadubu Ismael jau Isaacbetan paxkayamaxanun, en bake kayabi Isaac bestitun ibu wakin bixanikiki. Jaskawen taexun jatu nichindiwe”, aka

¹¹ Ismael jawen bake ma bedunanwen dabanán Abrahamnen shinain jawen nui pes dakaken ¹²⁻¹³ januxun Diosun Abraham yuikin: “Min dayadu Agar inun min bake Ismaelwen dabanán ikin shinain pesyamawe. Jaska Saran mia yunuai keska jatu wawe. Jaska en mia

yubandidan, Isaacwen taea minabu kayabi besti inunbadixankanikiki. Jakia min dayadu esclavan bake min bakediwen taexun Ismaelin enabu ichapajaidadi en mia jatu axundi axanai”, aka

¹⁴jaska washina penamajaida Abraham butuxun bichi bishtuki unpax maneshina inun misi Agar jawen dayadu inankin jau jaya butanunbun peumatan jawen juni bake bedunanbe nichian bui Beerseba mai pakea janu tsua jiwediabumanu iaketani ¹⁵jawen unpax inun jawen piti keyui ma netsuken jawen bake Ismael unpax manujaidai ma babuken ni utapan naman jau dakayunun yunua dakaken ¹⁶jenebaini uin benanta tsauxun shinankin: “En bake mawai en uinkatsi ikamaki”, ika jawen bakekidi pechitan tsauken jawen bake kaxaya ¹⁷janua jawen baken jui Diosun ninkaya nai anuxun Diosun nai tsuman Agar kenakin yuikin: “Agariin, ¿min jaskai ikai? Min bake ni utapan naman daka kaxai Diosun ninkaxuki. Miadan, dateyamawe, man mawamakidan. ¹⁸Benitan min bakedi metsunxun jeneyamawe, min bake Ismael duawakin jawenabu ichapa en jatu wadi axanaidan”, atan ¹⁹janua Diosun Agar unpax inankin chacha uinma kaxun bikin bichi bishtuki chacha unpax mata waxuntan jawen bake amanikiaki. ²⁰Diosun medabewakubainaya jawen bake Ismael ewai pia kuinwen tsaka mebeyai dekuyakunkaini ²¹Parán mai pakea betsa janu tsua jiweabumanu jawen ewabe jiweaya chipu jawen ewan Egipto anuabu ainbu iwexun ainyan wankin ainbu bimanikiaki, jawenabu kayabi bimakinan.

Abimélec Abrahambe yubakanamenibukiaki, na janchadan

²²Jabiatiandi Guerar nawa xanen ibu Abimélec jawen detenamenikabu xanen ibu betsa Ficolbe Abraham anu juxun yuikin:

—Min Diosun jaibuki. Dasibi min akai Diosun mia medabewakubainmiski. ²³Eskawen taea Diosun nuku uianyan ma mae anua en mibe yubakaii, ea inun, en bakebu inun, enabu pakubainaibu mia inun minabu jau nuku chakabuwayamaxanunbunwen. Ea yubawe. Min nuku dapi jiweaya en mia duawaima keska wakin ea inun enabu na mai pakea anu nun jiweabu jabiaskadi wakin nuku duawadiapakexankanwen— aka ²⁴⁻²⁵Abrahamnen ninkatan kemakin:

—En mia yubatiduki. Jakia mia yuinun, ninkawe, ea jaska waimabudan. Min tsumabun en unpax kini ea mebinmabuki. En mibe yubakaya minabu nuku ana jabiaska watidumaki— aka ²⁶januxun Abimélec in Abraham ninkatan kemakin:

—¿Tsuabun mia akimamen? Jaska mia waimabu natian en jawa unanmaki. Min ea yuiama ikima en dama ninkaii— aka ²⁷janua chaxuwan ichapa inun ina awa ichapa Abrahamnen Abimélec inan jabe yubakai padananantima ja dabe yubakanametan jabias xabatian ²⁸januxun Abrahamnen jawen chaxuwan bake yuxans 7 katuxun paxkatan tadi nichinken ²⁹jaska wai Abimélec in uinkin yukakin:

—¿Jaskakin min chaxuwan bake 7 yuxans min katuxun tadi nichinxumen?— aka ³⁰Abrahamnen kemakin:

—Ja chaxuwan bake 7 en mia inan min bixuwen taexun chanima dasibitun unankin: “Ja unpax kini Abrahamnen jatu pukinmaniki”, akin unanxankanikiki— aka Abimélecin chaxuwan bikin:

—Peki— itan ibuwaya ³¹janua ja dabe yubakaibuwen taexun ja unpax pukin anu mae kenakin: “Beersebaki”, anibukiaki. ³²Beerseba anua yubakanametán jawen detenamenikabu xanen ibu Ficol inun Abimélec jawen mae Filisteo nawabu jiweabu anu chintunbainibukiaki. ³³Januxun Beerseba anu jawen unpax kini dapi ji betsa tamarisco Abrahamnen banatan janua Jehová Dios jiwea ikibi ikabe janchakin kenwanikiaki. ³⁴Janua jaskai Abraham Guerar nawabu anu jatu dapi bai kani jawenabube jiwepaunikiaki, badi ichapa janu Filisteo nawabu jiweabu anudan.

Diosun Abrahamnen ikonwain unanti wanikiaki, na janchadan

22 ¹Badi betsatian Diosun Abrahamnen: “¿Jaska ea ikonwanmismenkain?” unanti wanun ixun, Abraham kenakin yuikin:

—Abrahamneen— aka

—En nenuki. Ea yuiwe— aka ²yuikin:

—Min juni bakedan, ja min bechipaijaidaidan, min ain kayabin bake bestichai Isaacdan, Moria mai pakea anu iyuwe. Janu ja mati en mia uinmai anuxun min bake Isaac ea inanxanwen, ea daewakin ea menu keyuxunkinan— aka

³ninkashina janua xaba betsatian penamajaida Abraham bututan jawen kuati kadu watan jawen asno kamaki kadu nanetan jawen bake Isaac inun jawen dayadu dabe jatu iyui janu Diosun yuishina anu jatube jadi kai ⁴uxa dabekain Abraham nukutan janu Diosun yuishina bechitan ⁵jawen tsuma dabe bashikin jatu yuikin:

—Nenu asnobe tsauxun nuku manayukanwen, nuku dabes kaxun Dios kenwantan nun ana juaidan— jatu watan ⁶ja kadu bexu Isaac iamabainkin kenti chi tsistuyabi inun nupe bitan jati bui jabe kaya ⁷januxun jawen bake Isaacun jawen epa Abraham yukakin:

—Epaan— aka ninkatan:

—¿Jawamen, epaan?— aka

—Uinwen. Chi inun kadu nun ma jayaki. Jakia chaxuwan bake ja menui nun jayamaki. ¿Jania?— aka ⁸Abrahamnen kemakin:

—Epaan, chipu Diosun chaxuwan bake nun ja menunun nuku inainkiki— abaini jawen bakebe kai ⁹janu Diosun yuishina anu jikitan mishki chi tapu wakin mishki ichawakin maspu watan jaki kadu manchinxun jawen bake Isaac sebitan chi tapu anu kadu mamaki

datanxun ¹⁰jawen bake textenun, iwanan, Abraham mexunkain nupe bikin sitanaya ¹¹jawaida nai anuxun Jehová Diosun nai tsuman kenakin:

—Abrahaam, Abrahaam— aka ninkai teku iki e itan yuikin:

—En nenuki. Ea yuiwe— aka ¹²nai tsuman yuikin:

—Min bake jaska wakin tenanyamawe. Dioski mesekin min bake bestichai min jaki jawa yaushiamma en unaiin— akaya ¹³januxun jawen pechiudi Abrahamnen jawaida uinkin chaxuwan bene jawen maxunki tsukuski bicha jawaida achitan neatan bexun jawen bake jana butetan pekatan januxun Dios kenwankin jawen xantukun chaxuwan bene tesenxun kuaxunkin menu keyunikiaki. ¹⁴Jaska watan Abrahamnen ja mati kenakinan: “Na mati Jehová jatu yupa watidumaki”, anikiaki. Na jabiatandi ikis yudabun jabiadidi kenadiakin jeneisbumaki.

¹⁵⁻¹⁷Januxun nai anuxun Jehová Diosun nai tsuman Abraham ana kenakin yuikin:

—En tsuma Jehová mia yuikin: “En mia yuishina min ma axuki. Min juni bake bestichai min eki jawa yaushiamaki. Jaskawen taexun en mia yubaii. En kushipawen emebi en mia yubai ea ninkawe. Pepawakin en mia duawaxanaii, pa wakinan. Pa wakin minabu en midimawaxanaii, bishi min uiainti wakin inun ianenwan kexa mashiti wakinan, tsuan tanatiduma wakinan. Tsuabuda minabuki sinataibu minabun jatu maemakubainxankanikiki. ¹⁸En mia yunushina min ea axunxuwen taexun minabu katuxun jatuwen nawa betsa betsapa mae jidabi anu en jatu duawakubainxanaii”, akin Jehová Diosun ea mia yuimaxuki— aka ¹⁹ninkatan jawen tsuma dabe bashibidananu Abraham jawen bakebe ana chintunkidan jatuki nukua Beerseba anu jawen asnoya ana bui jikiabu janu Abraham jawenabube jiweyukunkainikiaki.

Abrahamnen betsa Nahorin bakebu jati jiwenibukiaki, na janchadan

²⁰⁻²⁴Jatianda tsuanda Abraham yuikin:

—Min betsa Nahor bake ichapa ma jayaki. Jawen ain Milcá 8 juni bakeyaki, jawen bake iyuadan, Us inun, ja kachu Buz inun, Quemuel inun, Quésed inun, Hazó inun, Pildás inun, Idlaf inun, Betueldan. Jatiki, jawen juni bakebun kenadan— anikiaki. Ja inun, jawen nantakea ain bikin pakatan bini ainbu betsa Reumádan, 4 juni bake jayadianikiaki, Teba inun, Gáham inun, Tahas inun, Maacádan. Jatikiaki, jawen juni bakebun kenadan. Chipu Nahorin bake betsa Quemuelin juni bake betsa bawani jawen kena Aram inikiaki. Ja inun, Nahorin juni bake betsa Betuelin ainbu bake betsa bawanidan, jawen kena Rebeca inikiaki.

Sara mawa jawen benen mai wanikiaki, na janchadan

23 ¹⁻²Abrahamnen ain Sara 127 año jaya Canaán mai pakea anua mae betsa Quiriat-arbá, jawen kena betsa Hebrón anua

mawanikiaki. Ja mae anua jawen ain mawaken Abraham xaba tibi kaxakunkaini nesebitan nuijaidai ³⁻⁴janua jawen ainin yuda Hitita nawabu anu mai wanun, iwanan, kainkaini janu ichamisbu anu kaxun jatu yukakin yuikin:

—Eadan, en juni betsaki, en matunabumadan. Jakia en matube jiweyuaiwen taexun ea ninkakanwen, matu yuinunan. En ain mawashina en uinkatsi ikamaki, en maiwakatsis ikaidan. Janu en maiwai matun mae peiwen janu maiwati ea inankin ibuwamakanwen— jatu wa ⁵⁻⁶Hitita nawabun kemakin:

—Xanen ibuun, eskaki. Nuku ninkawe, mia yuinunan. Min xanen ibu betsa pepaki, nukube jiwea min Diosunadan. Nukun mishki tanpe jadatuda pepa anu min ain min maiwatiduki, tsuan nun mia nemamakidan— akabu ⁷⁻⁹ana Abraham benikauan jawen juinti pepa jatu unanmakin jawen beya chibain beti itan benitan jatu yuikin:

—En ain mawashina en maiwatidudan, ¿man ea inankin ibuwamakatsi ikimenkain? Ea medabewakanwen. Sóharin juni bake Efrón jawen mishki tanpe janu maiwati keyatapa jawen bai depi jayaki. Ja tanpe mishki kena Macpeláki. Ja bai ibu ea jancha waxunkanwen, jau ea inankin ibuwamanunan. En peiwen jatida kadu depia pakaidan, matun man unainan. Jaskawen taea matube enabu mawa maiwati tanpe mishki en jayapakexanaii— jatu watan ana tsauaya ¹⁰⁻¹¹Hitita nawa Efrón jawenabu Hitita nawabu namakis tsaua jau dasibibun pe ninkanunbun benikaun Abraham kemakin:

—Jaskamaki. En jancha ninkawe. Ja bai inun mishki tanpe en mia jamen ibuwamai. Enabun ninkaibun en mia inankuiaiin, janu min ain min maiwanunan— atan tsauken ¹²janua Hitita nawabun ninkaibun benitan jawen beya chibain beti itan benixun ¹³ichabu bebunxun Abrahamnen Efrón ana kemakin:

—Ea ninkawe. Jaska en mia yukai en pei biwe, peiwen jawen kadu dasibi en mia pakaii. Biwe. Min ikaya ean ibu watan en ain jadi en mai wakatsis ikaidan— atan tsauaya ¹⁴⁻¹⁵januxun Efrónen Abraham ana kemakin:

—Xanen ibuun, en jancha ninkawe. Ja en baidan, jawen kadudan, 400 plata jexe juxupaki. Jati jawen kaduki. Ana ja jaska shinain jawen nui janchayamananwen. Ja bai en mia ibuwamai bixun minabu mawa janu jatu maiwapakexanwen. Ikis min ain janu maiwadiwe— aka ¹⁶pei Efrónen bikatsi ikaya Abrahamnen unankin dasibi uiainbun jaska yuiái keska dasibibun uiainbun pei tana pewatan 400 plata pei jexe pakaken ¹⁷⁻¹⁹januxun mai pakea Canaán anu Hitita nawabu jatun maewan Mamré natian jawen kena bena Hebrón janu bai kaya dasibi jikimisbu anu dasibitun uiainbun badi juaikidi Efrónen bai Macpelá dasibi, jawen miban banati mai inun, jawen mai wati tanpe inun, jawen bai nemaki

ji bana inun, tsisumen anu ji bana mapua ja dasibi xanen ibubun jawen unaki kenematan Abraham ibu wamaken januxun jaska wabu bitan chipu Abrahamnen mishki tanpe anu jawen ain Sara mawashina mai wanikiaki, mai pakea Canaán anudan. ²⁰Jaska Abrahamnen enabu mawa janu jau jatu maiwapakexanun peiwen Hitita nawabun bai inun mishki tanpe inanbu bitan jawena wanikiaki.

**Abrahamnen jawen tsumapan jau Isaac ain
ixuntanun nichinikiaki, na janchadan**

24 ¹Janua Abraham ma mestebujaida Jehová Diosun jawen daya dasibiwen pepawen duawakubainaya ²⁻⁴januxun jawen beya chibankin Abrahamnen jawen tsuma xanen ibu jaki chiti ika jatun dasibi jatu mekemis inun jawen mabu mekexuna Eliézer kenaxun yuikin:

—En mia yuiái ea dapi juwe. Diosun nuku uianwen taexun en mia yubamái. Nukun beya chibankin ea unanti wamakin tsitsaukain ea kishwakewe, min ea jaska waya en mia yuiáidan. Canaán nawabu nun jatube jiweabu anua ainbu Isaac en bimakatsi ikamaki. Jakia janua en juni anu kaxun enabu anua ainbu en bake Isaac ixuntanxanwen. Jehová Diosun nai inun mai damiwanitun nuku uianyan jaska en mia yunuái inun en mia yubamái ea axuntanwen— aka ⁵jawen tsumapan yuikin:

—Jamen ainbu ebe jukatsi ikamakenan, ¿en jaskaxanai? ¿En daka janu minabu jiwe anu min juni bake jatu iyuxuntanxanti?— aka ⁶⁻⁷Abrahamnen nemakin:

—Jaskamajaidaki. Min ea jaska watidumaki. Uindawe. Janua en juni anu en bake en nichintidumaki. En epan enabu jiwenubu anua Jehová Diosun nai mekenikatun ea nichiniki. Januxun ea jatu jenemabidankin Diosun nenu ea iwenixun ebe janchakin yuikin: “Na mai pakea minabu jatu ibu wamakin en jatu inanxanai”, ea wani jabiastun mia medabewakin jawen nai tsumadi mia bebunkidi yunuxunxanikiki. Mia jaska wa jadia ainbu en bake iwexuntanxanwen. ⁸Janua ainbu jukatsi ikamaken iweama jenebidanxanwen, en mia yuikin yubamaxu ana shinanmadan. Jaska en mia nemai jadi en bake jatu iyuxuntaskayamaxanwen, enabu anudan— aka ⁹jaska wa ninkatan Abrahamnen tsumapan kishwakexun yubakin yuikin:

—Jehová Diosun ea ninkaya min ea yunuxu en mia axuin kaii— atan ¹⁰januxun jawen jatu daewati inankuinti ichawakin Abrahamnen camello ichapa anua ¹⁰katuxun jawen mabu pepa ichapadi katudixun kukiki nanexun camello kamaki kuki jawen tsumabu bexematan kai Mesopotamia mae pakeakidi kai uxa ichapakunkaini Abrahamnen betsa Nahorin mae dapi nukutan ¹¹ma badi kaya unpax bana kini dapi camello juindukunmakin jatu beumaken jabiatandi chipashbu bexun unpax biaibun ¹²⁻¹⁴jau ea unanmanun ixun Abrahamnen tsumapan Diosbe janchakin ea akin yuikin:

—En tsuma Abrahamnen mekenika Dios Jehováan, en tsuma min duawamis keska wakin eadi medabewakin uinmakin ea tapinmawe. Uinwen. Unpax bana kini dapi en niken unpax bi chipashbu ibidan ibidanaibu unanti wamakin chipash betsa en yukakatsi ikaii: “¡Min shumu butexun unpax ea amawe!” en aka ja chipash min ma katua ebe janchai: “Awe, unpaxdan. Min camellodi en mia amaxunaii”, akin ea yuiái en unankatsis ikai ja chipash min ea katuxunaidan, Isaacun ain jau ixanunan. Jaskawen taexun en tsuma Abraham min ana duawai en unankatsis ikaii— akaya ¹⁵⁻¹⁶jancha menediamaken Betuelin ainbu bake Rebeca jui jawen xanu Milcá inun jawen juchi Nahor Abrahamnen betsadan, chipash jawenduajaida junin mekin pesadiama shumu ia jui unpax bana kini anu butukain jawen shumuki unpax matawatan mapekeaya ¹⁷jakidi Abrahamnen tsuma kushikain bebun tetan yuikin:

—Chipashaan, unpaxdan, ea amawe— aka ¹⁸⁻¹⁹chipashan yuikin

—Awe, xanen ibuun— atan jawaida jawen shumu butetan unpax sananxuna akin menetan xetsekeaya Rebecan ana yuikin:

—Min camello dikabi en mia jatu amaxunbauna unpax netsuaya ana bitanxun en mia jatu keyu amaxunkatsis ikaii— atan ²⁰jawen camello amakin jawen amatiki unpax jawaida juxkexuntan ana unpax bitan bitankin jatu dasibi amakin keyuxunaya ²¹Abrahamnen tsumapan jaska waxuain janchama Rebecakidi shinankin:

—Jehová Diosun ea duawakin ¿ja ainbu ea inainmenkain?— itan ²²⁻²³jawen camellon unpax ma akabun janua jawen deu oro mane chaxakapa jawen xankama 7 gramo inun jawen mebi oro dabe jawen xankama tibi 100 gramo bixun Rebeca inankin sawemaxun yukakin yuikin:

—Min tsuan bakemenkain ea yuiwe. ¿Janu enabube en uxatidudan, min epan jiwe anu teke xaka jayamen?— aka

²⁴—Eadan, en Betuelin bakeki. En epan ibubudan, en xanu Milcá inun en juchi Nahor ma mawanibuki. ²⁵Camello piti basi ichapa inun uxati dintu ichapa nun jayaki— aka ²⁶⁻²⁷jawen beya chibain danti iki beti ixun Jehová Dios kenwankin yuikin:

—Jehová pepa duapajaida en tsuma Abraham min jawen mekenika Dioski. Mia besti jabe duawanamei min jabe putanameismaki. En tsumapan ea yunushina keska ea mekebidankin ma jawenabu anu min ea bichixuki— akaya

²⁸Rebecan jaskai ninkabaini kushikain jawen ewan jiwetan kaxun unpax biti anu ka ja junin jaska waxu dasibi jatu yui keyua ²⁹⁻³⁰Rebecan pui Labánen ninkatan jaska bestima ja deu sawemaxu inun mebi dabedi sawemaxudi uintan ja junin jaska waxu uintanun ika ja unpax bana kinikidi kushikaini kaxun Abrahamnen tsuma benakubainkin jawen camello ichapabube nia jawa paxkadiama bechitan jaki nukutushikin ³¹yuikin:

—Miadan, Jehová Diosun mia duawamiski. Janu niama nukun mae anu kayuwe. Mia inun min tsumabu nun ma jiwe mia pewaxunxuki. Ja dikabi min camello janu maniti nun pewaxundiaxuki. Ebe bekanwen— aka ³² Abrahamnen tsuma jatun jiwe anu kai jikiaya Labánen camello kamakia jawen mabu butexuntan jau pinunbun basi adumis tsusin bixuntanxun inankin manchinxuntan januxun Abrahamnen tsuma inun jawenabu jau jawen juchukinunbun unpax jatu inan juchukiaibun ³³janua piti jatu pewaxuntan jatu tsaunxuna pidiana Abrahamnen tsumapan jatu yuikin:

—En piyuamaki. Jaska en juxu matu yuikin taewayunun ea ninkakanwen— jatu wa

—Peki. Nuku yuiwe— Labánen aka ³⁴januxun jatu yuikin:

—Eadan, en Abrahamnen tsumaki. ³⁵Jehován en tsuma duajaida wakin xanen ibu wamiski, dasibi betsa betsapa inankinan. Chaxuwan midima inun, ina awa midima inun, plata mane inun, oro mane inun, jawen juni inun ainbu dayadu esclavo ichapa inun, camello inun, ina betsa asno ichapa inanmis jayaki. ³⁶En tsumapan ain Sara yuxabujaidabia juni bake bima kaini ma juni ewaken jawen ibu Abrahamnen jawen mabu ichapa yunuima ma ibuwakubainikiki. ³⁷Jaskaken en tsumapan ea yubamakin yuikin: “Nenu Canaán nawabu dapi nun jiweadan, Isaacun ain nenua min bixunyamanun jaska nemakin en mia yunuaii. ³⁸Jakia en epan enabu anu kaxun en bake Isaac ain benakin ea ixuntanxanwen”, ea wa ³⁹ean yuikin: “Jamen ainbu ebe jukatsi ikamakenan, ¿jaskaxanpa?” en wa ⁴⁰ea ana yuikin: “Jehová Diosun ea mekeaya en jawen jiwekunkainmiski. Jatun jawen nai tsuma mibe yunua mia medabewabaina ainbu en epan enabu anua en bake Isaac min iwexunxanaii. Ainbu enabu anua min iwea min ebe yubakaxu jaska wakin min keyua min benimaxanaii. ⁴¹Jakia enabu anu min jikia ainbu mia inanbuma min ebe yubakaxu ana jawa shinanma jenebidanxanwen”, akin ea yuishinaki. ⁴²⁻⁴⁴Jaskaken en jua unpax bana kini anu nixun en juinti medan shinankin yuikin: “En tsumapan mekenika Dios Jehováan, min Abraham medabewamiski. ¿Min eadi medabewatidumen?” atan “Uinwen. Unpax bana kini dapi en nia janua unpax bi chipash jua en yukakatsis ikaii: ‘Min shumu butexun unpax ea amawe’, en wa ea yuikin: ‘Awe. ¿Min camellodi mia amaxunpa?’ ikai ja en tsumapan baken ain mia Jehován min katua en unanxanaii”, iki ⁴⁵janchai en menediamaken Rebeca jawen shumu tetsaumekidan unpax bitan kaya ean yukakin: “Min unpax biwanaidan, ewen nuikin ea amawe”, en wa ⁴⁶jawaida jawen shumu butetan ea yuikin: “Awe. Min camello dikabi en mia unpax amaxunaii”, ea wa ea unpax amatan en camellodi ea amaxuna ⁴⁷ean yukakin: “¿Min tsuan bakemen?”, en wa ea yuikin: “Eadan, en Betuelin bakeki. En xanu Milcá inun en juchi

Nahor ma debunibuki”, ea waya januxun deu inun mane mebi dabe sawematan ⁴⁸janua danti iki beutan yuikin: “En tsumapan medabenan Dios kenwankin yuikin: ‘Enabu anu chipash ainbu jawen bake Isaac en ixuniyuaya ea medabewakin pe iwekin Jehová Diosun min ea medabewaxuki’ ”, en ikidanxuki. ⁴⁹“Natian en tsumakidi en matu yuixu jaskada man jakidi duawati shinainmenkain, ea yuidikanwen”, iwanan, “Ja dikabi chipash Rebeca man ebe nichinkatsi ikama ea yuidiakanwen, man ea jaska wamaken jiwe betsanua en benaxunaii, chipash betsadan”, jatu wa ⁵⁰⁻⁵¹Labán inun jawen epa Betuelin ninkatan kemakin:

—Na dasibi Jehová Diosun mia yuishina ma peki. Jaskawen taexun pepa inun chakabu shinankin nun mia yuitidumaki. Jehová Diosun nuku jaska waxu nun betsa watidumaki. Rebecadan, na tsaua iyuxunditanxanwen. Min iyua min tsumapan baken ain wanxanikiki— akabu ⁵²jatun jancha ninkatan Abrahamnen tsumapan jawen beya chibain beti ixun Jehová Dios kenwantan benixun ⁵³jawen inankuin mabu apaxun plata mane mabu juxupa inun, oro mane chaxajaida mabu inun, tadi pepa kainmaxun Rebeca inantan mabu betsa pepa jawenduadi jawen pui Labán inun jawen ewa inandiatan ⁵⁴jawen camello uinikabu jawen tsumabu betsabetan piti tsaunxunabu pikin menetan janua uxashini penaya bestenkauan jatu yuikin:

—En tsumanu ma en kakatsis ikaii. Nuku nichindikanwen— jatu wa ⁵⁵jawen pui inun jawen ewan yuikin:

—Chipash nun manuxanai ana 10 xaba niti ixun nuku uinmayukanwen. Jati binuaya chipash min iyutiduki— akabu ⁵⁶ana jatu yuikin:

—Ea jatixuinda ea niti ayamakanwen. Jehová Diosun ea matu duawamashinaki. En ma chintuain ea nichindikanwen, en tsumanu chipash iyuxuni en ma kaidan— jatu wa

⁵⁷—Chipash kenaxun nun yukaii— axun ⁵⁸Rebeca kenabu juai yukakin:

—¿Ikis min jabe kakatsi ikai?— akabu

—Jeen. Ja junibe en katiduki— ikaya ⁵⁹⁻⁶⁰jatun pui Rebeca inun, jawen tsuma ainbu jatun yumewakubainai inun, Abrahamnen tsuma inun, jawen camello uinikabu inun, jawen tsuma betsabu jatu nichinun, iwanan, Rebeca jau unanuma pe jiwexanun duawakin yuikin:

—Ichuun, jau minabu midimajaida ipakexanunbunwen. Jabu jatuki sinataibu jau jabun jatu maemakubainxanunbunwen— atan jatu nichianbu ⁶¹janua Rebeca benikauan jawen tsuma ainbuaibube camello kamaki jatu katsauanbu Abrahamnen tsumapan jatu iyui bebui kainkainaya chibain jachun buaibun

⁶²jabiatiandi ja chacha kini jawen kena: “Jamebi Jiweatun Ea Uinmistun Chachaki”, anibu anu jukin jawen chaxuwan jatu pima

atain mai pakea jawen kena Négueb anu Isaac jiwea ⁶³xaba betsa badi kaya shinain basi neki nixun camellowen beaibu bechitan uianyan ⁶⁴⁻⁶⁵Rebecandi unuxudi uinkin Isaac nia bechidiatan camello kamakia Rebeca bututan Abrahamnen tsuma yukakin:

—Tutudi bai tanabidani jui nukuki nukuyuaidan, ¿tsuamen?— aka kemakin:

—Jabia en tsumapan bakeki— aka jaska ninkatan Rebeca jawen madakukuti saweawen bepukuaya ⁶⁶jatuki nukua jaska Diosun axunshina Abrahamnen tsumapan Isaac yuia ⁶⁷ninkatan Rebecaki nukutan jawen ewan tadi jiwe anu Rebeca iyuxun bikin ainwantan bechipajaidai:

—Rebecawen taea en ana benimajaidai— ikin Isaacun shinain jawen ewa mawaima ana jaskaida shinanma jawen ainki bana ana jaskaida nuama inikiaki.

Abrahamnen Queturá ainwantan juni bake bawa jati inibukiaki, na janchadan

25 ¹Abrahamnen ana ainbu betsa jawen kena Queturá bitan ²janua jawen bakebu jati bawa jawen juni bakebu Abrahamnen inan kaian jati inibukiaki, Zimránan, Jocsánan, Medánan, Madiánan, Isbacan inun Súahdan, jati inibukiaki, jatun kenadan. ³Janua Abrahamnen juni bake betsan Jocsánen juni bake dabe bawatan jatu kenanidan, Sebá inun Dedán inibukiaki. Janua Abrahamnen baba Dedánen juni bake dabe inun bestidi bawadiadan, ma ewatan paxkatan paidan, jatunabudan, Asur nawabu inun, Letuseo nawabu inun, Leumeo nawabu jati inibukiaki. ⁴Januxun Abrahamnen bake betsandi Madiánen juni bake ⁵bawadiatan jatu kenakinan, Efá inun, Éfer inun, Hanoc inun, Abidá inun, Eldaádan, jati inibukiaki. Jati dasibi Queturán enabu inibukiaki, jawen juni baken inun jawen juni bakebun bababudan.

^{5,6}Ja dukun Abrahamnen dasibi jawena jawen mabu inun, jawen inabu inun, jawen tsumabu dasibi paxkaxun januxun peiwen jatu bini jawen ain betsa tibibun juni bakebu Abraham bebunkidi jatukidi yubakaimaxun jawen mabu jatu paxkaxuntan jatu ibu wama akeaketan januxun jau Isaacbe ketaxameama benanta jiwetanunbun badi juaikidi jatu nichinpakenikiaki. Jatida jatu inan keyuama ichapa jawen bake Isaac yunu keyutan Abraham mawadiama Isaacbe jiwenikiaki.

Abraham mawa mai bini anu mai wanibukiaki, na janchadan

⁷⁻⁸Jaskai jiwea ma anibujaidai mestebui ¹⁷⁵badiya mawa Abraham jawen xenipabu mawa bumisbu anu kadianikiaki, jatuki dasidan. ⁹⁻¹⁰Jaskaya jawen juni bake dabe Isaac inun Ismael bestitun Mamré mae badi juaikidi Macpelá anu mishki tanpe medan Abrahamnen

yuda datankin mai watan bunibukiaki, jawen bai anua mishki tanpe Abrahamnen Hitita nawa Sóharin bake Efrón anua peiwen taexun bini anu jawen ain Sara dapi jabe maiwakinan. ¹¹ Abraham mawaimaken Diosun jawen bake Isaac pepawakin duawaya ja unpax bana kini kenakin: “Jamebi Jiweatun Ea Uinmistun Chachaki”, anibu anu Isaac janu jiwepaunikiaki.

Ismaelin enabudí eskai jiwedianibukiaki, na janchadan

¹² Saran Egipto nawa ainbu jawen dayadu esclava Agar Abraham yunua bakewanidan, jatun juni bake Ismaelin juni bakedan, ichapa jatu bawadianikiaki. ¹³⁻¹⁵ Ismaelin juni bakebu iyuatun jawen kenadan, Nebaiot janua Quedar inun, Adbeel inun, Mibsam inun, Mismá inun, Dumá inun, Masá inun, Hadar inun, Temá inun, Jetur inun, Nafis inun, Quedmá jati jatun kenadan, ¹⁶ Ismaelin juni bakebudan, 12 idianibukiaki. Ma ewatan paxkatan paidan, jabu tibi xanen ibuí mai pakea tibi ibu wai januxun jatun tadi jiwe nichinbaunaibu jatun kena dabiki ibubis kenai pai ichapa jawenabubes midimajaida bestibu tibi jiwediapaunibukiaki.

¹⁷ Janua Ismael 137 año jaya mawa jawen xenipabu mawa janu bumisbu anu kadiai jatuki dasinikiaki. ¹⁸ Ismaelin enabu paidan xuku betsai Havilá mai pakea inun Sur mai pakea anu namakis ibu wai dasibi jiwea akeakedianibukiaki, Egipto badi juaikidi inun Asiria bai bui binubainmisbu anudan, jawen betsabubes unanuma pe jiweama detenameidan.

Rebeca bake bima Esaú inun Jacob nanea kainikiaki, na janchadan

¹⁹ Abrahamnen bake Isaac inun jawen bakebu jiwea tanakubaini eskapaunibukiaki. ²⁰ Isaac 40 año jayatun Arameo nawabun Betuelin ainbu bake Rebeca, Labánen puidan, Padán-aram anua iwexuna ainwanken ²¹ Rebeca ma badi ichapa kabia bake biamasken Isaacun medabewakin Jehová Diosbe Rebeca ea axuna ninkatan jawen nuikin Jehová Diosun medabewa Rebecan tsupibu bake binikiaki. ²² Janua ewai jawen bake dabe naneawen taea pustu medanua detenameaibu unankin datekin Rebecan shinankin:

—En bakebu eskai detenamexankanimenkain. Eadan, ¿jaskai en jiwekunkainxanai?— ixun Jehová Dios yuka ²³ Jehován kemakin:

—Ja bake dabe min pustu medanuadan, jabus jiwea yuda xukua dabe detenamexanaibu bebunkidi mia bika tenemaibu min jayaki. Juni bake dabe min kainxanai, betsa kushipa inun betsa kushipa bexmasdan. Ja maxku kaiantun jawen betsa iyua tsuma waxanikiki— aka ²⁴ tuya ewatan juni bake dabe kaian ²⁵ ja dukun kainxu uianbu jawen yuda jidabi dani tashipa jayawen taexun kenakin: “Esaúki”, anibukiaki. ²⁶ Janua maxkun iyuatun tae chichuku tsuma kaian kenakin: “Jacobki”, anibukiaki. Janua jawen ain Rebeca jawen bake dabe kainken Isaac 60 año jayanikiaki.

Esaún iyuatun kushipa jawen betsa maxku yununikiaki, na janchadan

27,28 Isaacun juni bake dabe yumei ewatan janua Jacob janchaisma pes jawen mae dapixun chaxuwan mekei besti dayaya jakia janu tsua jiweabumanu Esaú kaxun dekuyakin tsakanika metsapajaidakunkainkin jawen epa Isaac yuinaka nami tsakaxun pimamiswen taexun jawen epan Esaú ja bechipajaidaya jakia jawen ewa Rebecandi Jacob bechipajaidadiaya 29,30 jaskakubainaibun xaba betsa badi kaya Jacobun bawakin mabex waya Esaún tsakai chajaida ka chintunkidani jikitan punu nukajaida bunijaidai mawakatsis ikin Jacob yuikin:

—Punu nukajaida jui en mawakatsis ikaii. Min mabex tashipa wa beatan menan ea amadiwe, ea medabewakinan— aka mabex tashipa yukaiwen taexun Esaún kena betsa wakin Edomki, nukun janchawenan, tashipadan. 31 Janua jabun beya chibankin jawen epa ma mawaken iyuatun jawen kushipa bi xanen ibumis inun jawena dasibi paxka ichapa inankin maxku eskadabes inanmisken Jacobun shinankin Esaú jaskabiaken: “Ean mebinun”, iwanan yuikin:

—Min en juchi kainbiani jenetan mian ea juchi wawe— aka 32 januxun Esaún ana yuikin:

—En iyubia buni chakayamai en mawa ja en epan kushipa en jayaxanai ikis ea jawa medabewatidumaki. Peki. En mia juchi waii— aka 33 Jacobun yuikin:

—Jaskabia Jehová Diosun nuku uinkin unanyan ja dukun jawaida ea yubawe, min ea yuba chipu en mia pimaidan— aka Esaú yukadanwan yuikin:

—Jehová Diosun nuku uianyan en mia yubaii, juchi wakinan— aka 34 ma yuba ninkatan misi inun yusu mabex tashipa Jacobun inan pitan benikaini ka jaskakunkaini iyubia Esaú xanen ibutiduma pe shinanma ikunkainikiaki.

Guerar maewan anu Isaac jatube jiweyui kanikiaki, na janchadan

26 1 Ja baditian Abraham jiweken ui ikamajaidaken dasibi yudabu inun jatun inabu buninibu ana jabias keskai ana ui ikamajaidadiken nuitapai dasibi buni keyuaibun piti benai Isaac jawenabube Guerar maewan anu ka Filisteo nawa xanen ibu Abimélecín Abraham uinitun jawen bake Abimélec betsa xanen ibudiaí anu buniwen taea kaima jabube Isaac jiweyukun 2-5 jadia Jehová Dios jaki nukuxun Isaac yuikin:

—Egipto mai pakea anu kayamaxanwen. Janida en mia yunuai anu besti min katiduki. Natian na jabia mae anu besti jiweyuwe. Jaskai janu Filisteo nawabu dapi min jiweken mia mekekin en mia duawayuaii. Mia inun minabu paibu na mai pakea jidabi en matu ibu wamaxanaii. Min epa Abraham en

yubani keska wakin jabiaskadi en mia yubaii. En yunua Abrahamnen en jancha dasibi chibankin akubainiwen taexun minabu en pajaidawaxanaii, bishiti tsuan tanatiduma keska wakinan. Jaska bestima minabuwendi na mai jidabi anu yudabu xukua tibi dasibibu en jatu duawapakexanaii— aka

⁶ Guerar maewan anu Isaac jatube jiweyui jikishinken ⁷junibun jawen ainkidi yukakin:

—¿Tsuamen, ja ainbudan?— akubainabu Isaacun shinankin: “Rebeca jawendujaidaki.” Ean jatu yuikin: “Jadan, en ainki. En jatu wadan, jawen taexun ea tenanxun Rebeca bitidubuki”, iki datekin jatu padanun ixun jatu yuikin: “En puiki”, jatu waimaken ⁸jatu jaska waima uxa ichapa kaya jawen ain june chutakubaini ana menu ixun ikuaya janua Filisteo nawa xanen ibu Abimélec dintu medan junexun uinti xui bestichai medan uianyan Isaac inun Rebeca menameai bechixun ⁹jau iwexununbun jawenabu yunua Isaac jua jaki sinatakin yuikin:

—Jaskakenan, Rebecadan, min ainki. Min jabe menameai dama en matu uinxuki. ¿Jawai: “En puiki”, min ikimamen, nuku yuidan?— aka Isaacun kemakin:

—“En ainki”, akin en matu yuia: “Tsuanda Rebeca bikatsi man ea tenantiduki”, ixun shinankin: “En puiki”, akin en matu yuimaki, jawen taexun man ea tenantidu matu padainan— aka ¹⁰ana Abimélecín yuikin:

—¿Jaskakin min nuku jaska waimamen? Nukun juni betsan Rebeca ainwantan chutaya Diosun nuku uianyan min nuku chakabuwakeanshinaki— atan ¹¹Abimélecín jawenabu dasibi jatu unanmakin yuikin: —Tsuanda na juni Isaac inun jawen ain bikawakin chakabuwaya en jatu tenanmaxanaii, kupixunkinan— jatu anikiaki.

¹²⁻¹⁴Janua Isaac jabanudi jiweyua jatube dayakin jawen tsumabu yunua bai ewapa waxun xekiwan banaima ichapajaida tsekaibun Jehová Diosun duawakubaina Isaac xanen ibukin jawen jawada ana bikubaini jawen chaxuwan ichapajaida jayai inun, jawen ina awa ichapajaidadi jayai inun, jawen dayadu esclavo ichapajaidadi jayadai jatube jiwekin Isaacun jati ichawai xanen ibujaidakunkainaya janua Filisteo nawabun uin kemui yuinamei jaki sinatai:

—Yuu, ja junidan, ¿jaskai nuku anu juima xanen ibujaidakin nuku binuimenkain, mabu ichapa jayaidan?— ikaibun ¹⁵jabanudi Abraham jiweatian jawen chaxuwan amanun, iwanan, jawen tsumabun unpax wamakin banakin kini ichapa pukinxunibu Abraham mawayamaken Filisteo nawabun jawen unpax kini dasibi maiwen bepukin buanibuken ¹⁶janua ana jaska watima Abimélecín Isaac yuikin:

—Nenu juima kushipakunkainkin min nuku binuaiin. Jaskaken nukun mai pakeanua kadiwe, nuku jenebainidan— aka

¹⁷janua Isaac jawenabu inun jawen tsumabube kainkaini ka Guerar anu manankidi chaima napanpa anu maetan januxun jatun tadi jiwe

nichintan janu jiweyuaibun ¹⁸jabianudi jawen epan tsumabun unpax jatu pukinmani bepunibu anu Isaacun epan tsumabu anixun unankin ana pesakin taewaxunibukiaki. Ja Abrahamnen kenaniwen taexun jabiadidi Isaacun ana kenanikiaki, unpax kini tibidan. ¹⁹Isaacun tsumabun napaku anu unpax kini bena wakin nawasanabu jamebi jene jabai matamiskan ²⁰ja napanpanan unpax kini benawaimabu uinkin Guerar nawa jatun inabu mekenikabun Isaacun inabu mekenikabu kunyan akin jatu yuikin:

—Nukunaki. Matunamaki— jatu wabu jaskai buwen taexun Isaacun ja unpax bana jenebainkin kenakin yuikin: “Yaushinamei ja ikaibu unpaxki”, anikiaki. ²¹Janua ana napanpa manankidi maexun unpax kini ana benawakin ana jatu pukinmakin ana jatu unpax bechimaimaken jawen taexundi ana jatu kunyan adiakin yuikin:

—Nukunaki. Matunamaki— jatu ana akubainaibun jaska jatu waibuwen taexun Isaacun ana jatu jenemabainkin kenakin: “Sinatadabeaibu Unpax Kiniki”, anikiaki. ²²Janua ja kachu chai benanta maeimaxun unpax kini ana jatu benawamaken pukinkin unpaxki pesabu ana tsuan jatu kunyan aki sinatamawen taea jiwekin kenakin: “Mae Jawama Iboomaki”, iwanan, “Natian Jehová Diosun na mae nuku inan nenua nun paxanaii”, jatu wa

²³janua chai basi benai Isaac dasibibu iyui Isaac Beerseba unpax bana kini anu kaken ²⁴meshu medan Jehová jaki nukuxun Isaac yuikin:

—Dateyamawe. En min epa Abrahamnen mekenika Dioski. Jawada en yunua Abrahamnen chibainkin akubainiki. Jaskawen taexun jaibuwakin en mia duawadiaxanaii, minabu ichapa mia pa waxunkinan— atan kaken ²⁵januxun Isaacun mishki chi tapu wakin mishki ichawakin maspu watan ja mamakixun daewakin jau benimanun, iwanan, chaxuwan bake tesenxun menu keyukin Jehová Dios kenwantan janu jawen tsumabu jatun tadi jiwe dasibi puntamatan januxun jawen tsumabu unpax kini benawamakin jatu yunua pukinkubainkin unpax bechinibukiaki.

Abimélec Isaacbe yubakanamenikiaki, na janchadan

²⁶Janua betsatian Abimélec Isaacbe janchanun ika Guerar anua juai jawen jaibu Ahuzat inun, jawen detenamenikabu xanen ibu Ficol jatu iyua ²⁷Isaacun jatu yukakin:

—Ea bechipaiama eki sinatakin man ea mae mebinkubidana nenudi en juimaki. ¿Ea ana jaska wanun ixun man ea uin bekanxumen?— jatu wa ²⁸⁻²⁹jabundi Isaac kemakin:

—Miadan, Jehová Diosun duawakin mia medabewakubainai nun uinmiski. Mia shinain yuinamei yubakai: “Isaacbe yubakai kananwen, nun jabe jaibunamexanunan”, ishian nun juxuki, eskakidi yubakaidan. Nukuki sinatakin man nuku chakabuwama inun nukundi matu ana bikawamadan, nun jaskakidi yukatiduki. Min nuku anu jiwea mia

duawakin nun mia jawa wama unanuma nichinmaki. Natian Jehová Diosun mia duawakin jeneama nun uindiai— akabu ³⁰⁻³¹ ninkatan Isaac benimakin piti ichapa ainbu bawamaxun jatu inan pikin mabex akin keyutan uxashini penaya bestentan Isaacbe ana yuinamei:

—Jehová Diosun nuku uianyan yubakai nun janchashinawen taeta ana ichakanikapakeyamananxanwen— aka Isaac jatube janchai menetan jatu nichian ana jabe sinatanameama jabe jaibunametan unanuma bui penibukiaki.

³² Janua jabias xabatian jawen tsumabu bexun Isaac yuikin:

—Unpax bana kini wakin nun pukinxu ma jeneki nun pesaxuki— akabu ³³ januxun Isaacun ja unpax kini kenakin “Sebáki”, anikiaki. Jaskawen taexun ja mae kenakin “Beersebaki”, ani jabiaskidi jeneama kenamisbuki.

³⁴ Esaú 40 año jayatun Hitita nawa ainbu dabe binikiaki, ainwankinan, Beerín ainbu bake Judit inun Elón ainbu bake Basematdan. ³⁵ Ja ainbu dabe jawenabumatun jatun beyawen taexun Isaac inun Rebeca jatu bika tenemakubainibukiaki.

**Isaacun jawen bake dabe kushipa pepakidi jatu
yuikin yubanikiaki, na janchadan**

27 ¹ Janua Isaac anibui mestebujaidai ma bexuxjaidakin jawen bake iyua Esaú kena juaya Isaacun yuikin:

—Epaan, ¿min miamenkain? Mia yuinun ninkawe— aka Esaún yuikin:

—Epaan, min ea kena en juxuki. ¿Jawamenkain? Ea yuiwe— aka ²⁻⁴ ana jawen epan yuikin:

—Uinwen. Ma en mestebujaidai anibujaidaki. Jatianda en matu mawaxunxanai en unanmawen taexun en jancha ninkawe. Min piaya kaxun chaxu tsakaxun bexun yuchiyabi ea bawaxunwen, jaska en bechipaimis keska piti nuwepadan. Pitan en juinti benimakin min en bake iyua jau Jehová Diosun mia duawakubainxanun en mia pepakidi jancha waidan, en mawadiamadan— iki ⁵ Isaac Esaúbe janchai jawen ibu Rebecan ninkaken januxun Esaún chaxu jawen ibu tsakaxuni kaya ⁶⁻¹⁰ janua Rebeca jawen bake maxku Jacob anu kaxun yuikin:

—Uian, min epa Esaúbe janchai en ninkaxuki. Min epan yuikin: “Chaxu tsakatanxun yuchiyabi ea bawaxunwen, jaska en bechipaimis keska piti nuwepa wakinan, jaska pitan en juinti benimakin Jehován nuku uianyan mia duawakin en kushipa pepa en mia yunuxanai, en mawadiamadan”, akai en ninkaxuki. Jaskaxunwen taexun en jancha ninkawe. En mia yunuai mia dukun kaxun min ina cabra bake jadatuda dabe jawen nami babupa katutan achixun ea bexunwen, jawen nami yuchiyabi min epa en bawaxunaidan, jaska manuai keskadan, jaska min epanu min buxuan pitan benimakin mia besti jawen kushipa pepa mia

yunui jau janchanunan, Jehová Diosun jau mia duawaxanunan, min epa mawadiamadan— aka ¹¹⁻¹²januxun Jacob datekin jawen ewa yuikin:

—Uian, en betsa Esaú dani ichapa jayaki. Eadan, en dani jayamaki. Jaskawen taexun en epan ea metiduki. Mexun: “Ea padainkiki”, ixun pepa ea inanma kupikin ea yuputiduki, pepawamadan— aka ¹³Rebecan ana yuikin:

—Mia chakabuwakatsi ikaya miwen taexun: “Ea kupiwe”, akin en mia yuixunxanaii. Jaska en mia yunuai bitanwen. Nukun ina cabra bake babupa dabe ea bixuntanwen— aka ¹⁴kaxun dabe achixun bexuan jaska jawen epan bechipaimis keska jawen ewan cabra nami chaxu nami nuwe keska wakin yuchiyabi bawaxuntan ¹⁵januxun jawen tadi jiwe medanu jikikain jaya chai katanshina jawen bake iyua Esaún tadi bixun jawen bake maxku Jacob sawemaxun ¹⁶cabra bake bichi Jacobun punyanki meyabutan texuanudi bichi betsadi teyabua ¹⁷nami yuchiyabi inun misi bawaxuna inan ¹⁸Jacob jawen epanu kaxun yuikin:

—Epaan, en ma juaii— aka jawen epan yuikin:

—En nenu dakaki. Judiwe. ¿Min jadata en bakemen?— aka ¹⁹Jacobun padankin yuikin:

—En Esaúki, min bake iyuadan. Min ea yunua kaxun ma en tsakatanxuki. Benitan tsauxun chaxu nami en mia bawaxunxu piwe. Jaskawen taexun min kushipa pepa ea yunui ekidi janchadiwe— aka ²⁰—¿Jaskatan min jawaida chaxu tsakaxumen?— aka ana padankin yuikin:

—Min jaibu medabenan Jehová Diosun chaxuki ea nukuma en tsakaxuki— aka ²¹januxun jawen ibuan yuikin:

—¿Jaska min en bake Esaúmenkain? Mia menun nedi juwe— aka ²²Jacob ja dapi ka mekin yuikin:

—Min jui Jacobki. Jakia min meken min Esaúki— aka ²³jawen meken dani ichapa Esaú keskawen taexun Isaacun Jacob unanma jawen pepa yaushiana yunukatsi ²⁴Isaacun ana yukakin:

—¿Chanima min en bake Esaúmen?— aka

—Jabia min bake en eaki— aka ²⁵atimas jawen epan yuikin:

—Peki. Chaxu nami min ea bawaxun bexuan ea inanwen, ja dukun pitan en kushipa pepa en mia yunuaidan— aka Jacobun nami bawaxuna inan pitan uva vinodi inan ²⁶pikin akin keyutan ana yuikin:

—Epaan, ana ea dapi juxun ea tantsu awe— aka ²⁷⁻²⁹Jacob jawen epa dapi kaxun tantsu akai Isaacun Esaún tadi itsa xetetan:

“Esaúki”, ixun jawen kushipa pepa yunui jakidi janchai:

“Aa, chanimaki. En bake iyuatun itsaki,
Jehován ni nuku pepawaxunmis ni itsadan.

Ui imakin mai pepa inankin

yunu betsa betsapa ichapa inun uva vino ichapa inankin

Diosun jau mia duawapakexanunwen.
 Xukua betsa betsapatun mia duawaibun
 jatun xanen ibukin min jatu tsuma wa miki mesepakexankanikiki.
 Min betsa kayabibu min jatu xanen ibuxunaya
 jau miki mesekin mia duawapakexanunbunwen.
 Tsuabunda mia yupuaya Diosun jatu yupudixanikiki.
 Tsuada yuda betsan mia pepawaya Diosun jatu pepawadiaxanikiki”,

iwanan,

³⁰⁻³¹Isaacun Jacob jawen kushipawen pepawakin meneaya Jacob jawen epa anua dama taxnikainaya chipu unanma ni anua jui jawen betsa Esaú jikitan nami jawen epa tsakatanxun yuchiyabi bawadiabidan bexunxun yuikin:

—Epaan, en ma juaii. Benitan tsauxun chaxu nami en mia yuchiyabi bawaxunxu piwe, jaskawen taexun min kushipa pepa ea inanan— aka ³²jawa unanma yukakin:

—¿Min tsuamen?— aka

—En Esaúki, min bake iyuanan— aka ³³shinain datei bene bene ikin yuikin:

—Jaska min judiama juni betsan nami yuchiyabi bawaxun ea bexuan pitan en kushipa pepa inankin en yunuxuki. ¿Tsua en axumen? Tsuada en kushipawen en pepawaxu Diosun pepawadiaxanikiki, medibi wakinan. Jaska en jakidi en janchaxu mebinkin en betsa watidumaki— aka ³⁴jawen epan jancha jaska yuia ninkatan Esaú nuijaidai kaxa chakayamakin yuikin:

—Epaan, eadi min kushipa pepa ea yunudiawe— aka ³⁵januxun jawen epan ana yuikin:

—Min betsa daki juxun ea padantan min kushipa pepawati june jatun mia bianxuki— aka

³⁶—En betsa jaskawen taea pekidi kenanibuki, Jacobdan, Mebinanan. En min bake iyubiaken ea dukun en xanen ibuxanai ea mebiniki. Na jabiatian min ea kushipa pepawatidu ana ea mebinxuki, dabeki ea bextekinan. ¿Ea kushipa pepawati betsa min ana jayamamen?— aka ³⁷Isaacun Esaú ana kemakin:

—Uian, min betsa Jacob min xanen ibu en waxuki. Mikidi inun minabu jawen tsumabu ixanunbun en jaska yunudixuki. Yunu ichapa inun uva vino ichapa jayai jau pe jiwexanun en kushipa pepa en ma yunukin keyuxuki. Jadatu betsawen en mia ana pepawatidu jayamaki— aka ³⁸jaska wa ninkamas bika wakin ana yuikin:

—Epaan, ¿kushipa pepawati bestichai min ana jayamenkain? Eadi pepawawe— atan ana kaxa chakayamatan neseaya ³⁹ana yuikin:

“Mai pepa ui imis anu jiweama
 chai nanta min jiwekunkainxanaii.

40 Betsabu nemai jawen detenameti nupe kenu chaipawen
 jatube detenamei min jiwebiakunkainaya
 min betsa mia xanen ibuxunkunkainxanikiki.
 Jakia miadi kushipatan ana yunumama
 ibubis janu min tadi yunubainxanii”,
 akin jaska wakin Isaacun Esaú kushipa wakin pepawadianikiaki.

Jacob jawen betsa Esaúki datei paxanikiaki, na janchadan

41 Jawen ibuan Jacob pepawakin jawen kushipa pepa yunushinawen
 taexun Esaún jawen betsa Jacob danankin yuikin: “En epa ma mawa
 kemaikiki. Samama mawaya jawen nui kaxai nesetan en betsa en tenanti
 shinaiin”, ikai 42 june janchai tsuanda ninkaxun Esaún jancha jawen ibu
 Rebeca yuiabu ninkaxun jawen bake maxku Jacob kenaxun yuikin:

—Mikidi Esaún shinankin miki sinatai jamebi daenun ika miki
 yubakaikiaki, jawen kushipa inun jawen pepa min bianshina
 manakukinan. 43-45 Jaskawen taexun mia yuinun en jancha ninkawe.
 Harán anu en pui Labánen jiwe anu paxatanwen. Min betsa miki sinatai
 maindiamaken jadixun manayutanwen. Miki sinatai maiin min jaska
 waima jakimaya juni betsa en yunua ea mia iwexunxanikiki. Na jabianua
 mia inun min betsabe detenamei man mawaya janu en bake dabe en
 matu benukatsi ikamaki— atan 46 janua Rebeca jawen bene Isaac anu
 kaxun yuikin:

—Hitita nawa ainbu en bechipaiamaki, Esaún ain dabe keskadan.
 Jabiasdiai Jacobun Hitita nawa ainbu nenu Canaán anu jiwexun
 ainyain en bechipaiamawen taea en juinti nishmai sinai jaska en
 jiwetidumaki— aka

28 1-4 januxun jawen epa Isaacun Jacob kenaxun nichin pewakin
 yunukin:

—Na Canaán mai pakea anua ainbu biyamaxanwen. Jakia Padán-aram
 anu min epa betsa Betuelin enabu anu kaxun ja mae anua min ewan
 pui Labánen ainbu bake betsa ainwantanxanwen, jadixun Dios kushipa
 dasibi binuatun mia duawakin mia pa wa minabu xukua ichapajaida
 inunbadixankanikikidan. En epa Abraham yuini keska wakin mia inun
 minabu pepawakin na mai pakea janu nun jiwea anu Abraham yubani
 anu nenu nukunabuma anu jiwei nun mae akeakemis anu Diosun jatu ibu
 wamaxanikiki— axun 5 jau jaskakaintanun jawen bake Jacob mae betsa
 anu nichian Padán-aram anu Rebecan pui Labán Arameo nawa Betuelin
 juni bake anu kaxanaikidi Isaacun yununikiaki.

Esaú ana ainyanikiaki, na janchadan

6 Januxun pepawakin Isaacun jau Jacobun Canaán nawa ainbu
 biyamanun Padán-aram anu kaxun jau ainbu betsa bitanun nichian

kai Esaún Jacob jaska waibu ninkashina ⁷jawen epa inun jawen ewan jancha Jacobun ninkabaini Padán-aram anu kashinken ⁸Canaán nawa ainbu dabe Esaún ainwaniken jawen ibu Isaacun bechipoiamaken Esaún unainwen taea ⁹Abrahamnen juni bake betsa Ismael, jawen epa betsadan, janu kaxun Ismaelin ainbu bake Mahalat Esaún ainwanikiaki, Nebaiotin puidan. Janua bitankin jawen Canaán nawa ainbu dabeki dasiwaima janus jatu jiwemapaunikiaki.

Betel anu Jehová Dios Jacobki nukua jabe janchanikiaki, na janchadan

¹⁰⁻¹¹Beerseba anua kai mae Harán baiwen Jacob kai bai puchinin kaya ma badi kaken janu uxakatsi niti itan jaki tedatamekatsi mishki tunku mania betsa bitan jaki isdatamea daka ¹²⁻¹⁴uxa namakin uianyan tapaiti chaipa mai anua naiki kepia Diosun nai tsumabu ja tapaitiwen inabainbaini inun butubidanbidanaibu anu Jehová ja dapi nixun uinmakin yuikin:

—Eadan, en Jehováki. En min juchi Abrahamnen mekenika Dios inun en min epa Isaacun mekenika Dioski. Mia yuinun en jancha ninkawe— iwanan —Na min janu dakanua mai pakea mia inun minabu en mia yunukin ibu wama minabu na mae anua papakei mai ichapa jawen mishpu kuduti tsuan tanatiduma keskai nortekidi inun, surkidi inun, badi juaikidi, inun badi kaikidi mebinanantan ibu wai jiwea akeakexankanikiki. Mia inun minabuwen taexun xukua dasibi mai jidabi anu manibaunabu en jatu pepawapakexanaii. ¹⁵Mibe putanameama janida min kaya medabewakin en mia mekekubainxanaii. Na mai pakea anu min ana jiwexanun en mia ana nenu iwexanaii, chintunwankinan. En mia yuixu en mia axundiama jakimama en mia jeneama ipakexanaii— aka

¹⁶⁻¹⁷janua Jacob uxa bestentan shinain datekin yuikin:

—Chanima na mae anu nenu Jehová Dioski. En jaska unanma ikaki. Nenu na mae anu Dios jiweken en jaki mesei dateaii.

—¡Jabaa! Nenudi nai anu Diosun jiwe janu jawen jikiti xuiki— ika

¹⁸ana uxashini bestentan penamajaida benikauan mishki tunku jaki tedatameshinai bixun ja unanti wanun ixun ja mishki dabekin benitan Dios kenwankin xeniwen jawen beya chibankin mishki daxu anikiaki. ¹⁹Jaskaken uatian ja mae ja dukun nawabun kenakin: “Luzki”, anibu januxun Jacobun kena bena maewakin: “Betelki, Janu Dios Jiwea Maedan”, anikiaki.

²⁰⁻²²Januxun Jacobun Dios yubai janchakin eska wanikiaki:

—Janida en kaya Dios ebe kakin ea medabewakin piti inun tadi ea inankin unanuma en epa anu ea ana iweken chanima wakin Jehová en mekenika Dios xabakabi en waxanaii. Na mishki en benixudan, Diosun jiwe ixanikiki— iwanan, Dios yuikin:

—Diosuun, jawada ea inankin 10 min ea inan bitan bestichai mia inankuinkin jawen en mia kenwanpakexanai— akin jaskai Jacob Diosbe janchanikiaki, yubakaidan.

Mae Harán anu Jacob kanikiaki, na janchadan

29 ¹Janua Jacob Betel anua kainkaini ana badi juaikidi kakunkaini atimas Labánen maewan Harán dapi jikixun ²⁻³janu bai anu jatun unpax bana kini dapi chaxuwan xuku dabe inun bestiti chaxuwan jabun mekekin uinikabu unpax jatu amanun ika juindukuin maniabun Jacobun jatu bechitushitan jatu uinkin unpax bana mishki ewapawen bepua chaxuwan dasibi ichawaxun chaxuwan uinikabun unpax bana kini bepenxun unpax bitan bitankin jatu ama keyutan ana mishki ewapawen bepuaibun xaba tibi jaska jatun beya amisbu akaibun ⁴chaxuwan uinikabu Jacobun jatu yukakin:

—¿Matudan, man janiamen?— jatu wa

—Harán anu nun jiweaki— akabu ⁵ana jatu yukakin:

—¿Nahorin bake Labánan, man unain?— jatu wa

—Nun unaiin— akabu

⁶—¿Jaskadamen? ¿Jawa isin teneamamen?— jatu wa kemakin:

—Peki. Uinwen. Janu jawen ainbu bake Raquel jawen chaxuwanbube ma nenu juikiki— akabu ⁷januxun Jacobun jatu yuikin:

—Uian, badi kadiamaki. Eskatian chaxuwan bichitimaki. Ana unpax jatu amaxun ana jatu pimakin basi anu jatu bukanwen— jatu wa ⁸jabundi kemakin:

—Jaska chaxuwan dasibi ichai keyudiamaken nun jaska watidumaki. Jakia dasibi jabun nun jatu mekemisbun ichatan ja mishki ewapa jawen bepua bepentan nun jatu amamiski— akabu ⁹jatube janchai menediamaken ja chaxuwan uinika Raquel jawen epan chaxuwan iwei juaya ¹⁰Jacobun uinkin jawen kuka Labánen ainbu bake Raquel inun jawen chaxuwan bechitan kaxun unpax bana kini bepenxun jawen kukan chaxuwan besti amaxuntan ¹¹Raquel dapi kaxun jawen beya chibankin yukakin tantsu atan benimajaidai kaxakin ¹²yuikin:

—En min epan daiski. En Rebecan bakeki— aka Raquelin ninkatan kushikaini kaxun jawen epa yuia ¹³Jacobkidi ninkatan: “En puin bakeki”, ika kushikidan jaki nukuxun ikuxun tantsu axun jawen jiwe anu iyua Jacobun jawenabukidi chanikin jaska jatube jiwemis jatu yui keyuaya ¹⁴Labánen Jacob yuikin:

—Min enabu kayabiki, min nami inun min xaudan, en jimi keskadan— akima jatube dayai Jacob jiwekin jatu medabewakin chaxuwan mekei uxe bestichai nichianyan

Jacob Raquel inun Líawen taea dayanikiaki, na janchadan

¹⁵januxun Labánen Jacob yuikin:

—Chanima min enabuki. Ea anua jawauma min ebe dayashinaki. Jamen min ana dayatidumaki. Ana en mia dayamakubaina, ¿jati en mia

pakatidumenkain? Ea yuiwe— akaya ¹⁶Labánen ainbu bake dabedan, ja dukun iyuatun kena Lía inun maxkun kena Raquel inikiaki. ¹⁷Ja iyua jawen bedu besti atimapa duakabiwen taea jawenduamaken jakia jawen bake maxku besti jawen yuda jidabi jawenduajaidaken ¹⁸Jacobun Raquel bechipajaidakin jakidi yuikin:

—Min bake maxku Raquel min ea bimaxanun 7 año nichin en mia dayaxunaii— aka

¹⁹kemakin:

—Peki. Mia besti min enabi kayabiki. Juni betsa en inankatsi ikamaki. En mia bimaxanaii. Ebe jiwekin ea dayaxunyuwe— aka

²⁰Jacobun Raquel bechipajaidaiwen taexun ainwankatsi ikin Labán dayaxunkin: “7 año jawen ibu en dayaxunaidan, Raquel en bixanaidan, jatixuinda badimaki”, ixun Jacobun shinankubainikiaki. ²¹Janua 7 año dayaxuntan Jacobun Labán yuikin:

—Mia yubatan ainbu binun ika en dayakunkainshina ma en keyuxuki. En ainan, ea bimadiwe— aka

²²Januxun jawen bake beneyawakatsi ikin Labánen jabe jiweabu dasibi kenaxun piti ichapawaxun jatu pimakin nawamakin ²³meshu medan Jacob padankin jawen bake iyua Lía iwexuna Jacobun unanma jabe iki taenikiaki, ainwankinan. ²⁴Januxun jawen bake Lía beneyawatan jawen epan jawen dayadu esclava betsa jawen kena Zilpá Lía inanikiaki, jau medabewanun jawen dayadu wamakinan. ²⁵Janua penaya Jacob bestentan Lía bechitan Jacob Labánki sinatakin yuikin:

—¿Min ea jaska wa en ishiain? Raquel bikatsi en mia dayaxunshinaki. ¿Jaskakin Raquel ea inanma Lía ea inankin min ea jaska wakin padanmen?— aka ²⁶Labánen kemakin:

—Iyua beneyawadiama maxku dukun beneyawadan, jaska nukun beyamaki. ²⁷Jaskaken iyua dukun ainwanyuwe, 7 día beyawai min ma ja bestibe jiweken Raquel dikabi nun mia inandixanaidan. Jaska min ea yubanidan, ana 7 año min ea dayaxunxanaii, en mia inainan— aka ²⁸jaska wa ninkatan Jacobun Lía besti ainwan 7 día jabe jiweken jawen bake maxkudi Labánen Jacob bimadia ainwandianikiaki. ²⁹Januxun jawen bake Raquel beneyawatan jawen dayadu esclava ainbu betsa jawen kena Bilhá Labánen Raquel inanikiaki, jau medabewanun jawen dayadu wamakinan. ³⁰Jacobun Raquel bidiatan bechipajaidakin jakia Lía mawaida bechipaiama dananbiai ana jawa yuiama Raquel bima ana 7 año nichindiai dayaxundianikiaki.

Jacobun jawen bakebu jati jatu bawanikiaki, na janchadan

³¹Jacobun jawen ain Lía dananbiakin mekubainaya Jehová Diosun uinkin Lía medabewakin bake bimakin jakia Raquel jau bake biamayunun Jacobun chutabiakubainaya bakeuma wakin nemayukubainikiaki.

³²Januxun Lían bake bia tuya juni bake kainxun yuikin: “En benen

ea danan duakabia en punu nuka Jehová Diosun ea uinkiki. Jaskaken en bakewen taexun en benen ea bechipaixanikiki. Jaskawen taea en baken kenadan, Rubénki”, akima ³³janua ana ja kachu bake bia juni bake kainxun yuikin: “En benen ea dananbiaya Jehová Diosun ninkakin juni bake betsa ana ea bimaimaki. Jaskawen taea en baken kenadan, Simeónki”, akima ³⁴ana ja kachu bake bitan juni bake ana kainxun yuikin: “Juni bake dabe inun besti ma en bia en ma kainxunaki. Ikis en benen jawen taexun ea bechipaitiduki. Jaskawen taea en bake betsan kenadan, Levíki”, ana akima ³⁵jaskatan ja kachu ana bia juni bake ana kainshinxun yuikin: “Ea jaska waya Jehová Dios en ma kenwaiin. Jaskawen taea en baken kenadan, ‘Judáki’ ”, ikima Lían bake ana biyuama inikiaki.

30 ¹Januxun jawen betsa Lían bake bikubainaya jawawen jaskatima jawen betsa bakeyaiwen taea nuikin Raquelin Jacob yuikin:

—Eadi bakewawe, en bake biamas mawatidukidan— aka ²jaska wa jaki sinatakin Jacobun Raquel yuikin:

—¿Min jaskada shinain ikai? En ea Diosmaki. Diosun besti mia bimatiduki. Eanan, en mia jaska waxun bimatidumaki— aka ³Raquelin ana yuikin:

—Uian, nukun beya chibankin en dayadu esclava Bilhá mewe, jaki min ea bakewaxuna en bake ixanikikidan— atan ⁴januxun Bilhá yunua Jacobun bikin nanta ainwantan Bilháki bakewa ⁵Bilhán Jacob juni bake kainxuna ⁶Raquelin dachukin yuikin: “Diosun ea uinkin ea unankin en shinan pewen taexun en yukai jancha ea ninkaimaxun ikis en juni bake ea inanxuki. Jaskawen taea na bake kenadan, Danki”, aka

⁷januxun Raquelin dayadu esclava Bilhán ana ja kachu bake bia Jacob juni bake kainxuna ⁸Raquelin ana dachukin yuikin: “En betsa maemanun ika en jabe ja imis en ma binuaiin. Jaskawen taea ja bakeishtan kenadan, Neftalíki”, jatu wanikiaki.

⁹Januxun Líandi ana bake biamawen taexun unankin jawen dayadu esclava Zilpá Jacob yunudia bikin nanta ainwandiatan ¹⁰Zilpáki bakewa bake bia Jacob juni bake kainxuna ¹¹Lían dachukin yuikin: “Jaska en pepajaidaidan, enaki. Jaskawen taea bakeishta jawen kenadan, Gadki”, jatu wa

¹²janua Lían dayadu esclava Zilpán ana ja kachu bake bia Jacob juni bake ana kainxuna ¹³Lían yuikin: “En jati bake jaya en benimaiwen taea ainbuaibu ewen benimakin ea kenwanxanaibu en benimaii. Jaskaken bakeishta jawen kenadan, Aserki”, jatu anikiaki.

¹⁴Janu xekiwan tsekakin mexteaibutian Lían bake Rubénen bai anu kaxun xeati bimi batapa bechixun bexun jawen ewa inanken januxun Raquelin uintan Lía ea akin yuikin:

—Min baken xeati bimi batapa mia bexuanan, eskadabe ea inanwen— aka ¹⁵inankatsi ikama jaki sinatakin Lían yuikin:

—Ja dukun en bene min ea mebiniki. ¿Ikis en baken bimi batapa ea bexuan min ea mebindiakatsis ikai?— aka Raquelin jawen bimi xeanun ixun

—Jaskakenan, na meshu medan jau mibe iki kanun Jacob en mia anu yunuaii. Jaskaken min baken bimi mia bexuan ea dabukun inandiwe— aka jaska yubaiwen taexun inanken ¹⁶janua badi kaya jawen bai anua Jacob juaya Lía ka jaki nukuxun yuikin:

—En baken xeati bimi ea bexuan Raquel en inanxuwen taexun en mia yubayuxuki. Jaskawen taea na meshu medan ebe iyuyuwe— aka Jacobun ninkatan jawen jiwe anu meshu medan ka jabe ixun chutaken ¹⁷Lían jaskakidi Dios ea akimakidi Diosun ninkatan jawen nuikin Lía ana ja kachu bake bima Jacobun juni bake ana kainxuna Lía ma 5 juni bake jayatan ¹⁸yuikin:

—En dayadu esclava en bene en yunuyamawen taexun Diosun ea manakuxuki. Jaskawen taea jawen kenadan, Isacarki— akimaxun

¹⁹jabianudi ana bake betsa Lían bima Jacob juni bake ana kainxuna 6 juni bake jayatan ²⁰Lían yuikin: “Diosun ea pepawakin ea duawaxuki. En ma 6 juni bake kainxunawen taea janu en bene ewen nui ebe jiwexanimenkain. Jaskawen taea ja bakeishtan kenadan, Zabolónki”, anikiaki.

²¹Chipu jawen jenekin Lían ana bake bia ainbu bake kainxun kenakin: “Dinaki”, anikiaki. ²²⁻²⁴Januxun Diosun Raquelkidi shinankin jawen janchawen bake bikatsi ea akai ninkamixun jau bake binun medabewakin Raquel bake bimaima juni bake kainxun yuikin: “En bakeumawen taexun ea yuanmisbu en dake ea mainwankin Diosun en chakabu tede akin ea juni bake inanshinaki. Ana juni bake betsa Jehová Diosun ea inanxanimenkain. Jaskawen taea na en juni baken kenadan, Joséki”, anikiaki.

Labánen Jacob kapanan nemanikiaki, na janchadan

²⁵⁻²⁶Janua Raquel jawen bake José kainmaken Jacobun jawen kuka Labán yuikin:

—Ea jenediwe, nichinkinan, en mae anu en epa jiwea anu en kakatsi ikaidan. En mia pe dayaxunkunkainmiswen taexun en ain dabe inun en bakebube ea yunukin ea nichindiwe. Jaskadada en mia dayaxunmis min unanjaidaii. Jaskawen taexun ea nemayamawe, en kainkainaidan— aka ²⁷⁻²⁸ninkatan Labánen kemakin nemakin:

—Miwen taexun Jehová Diosun ea duawai en uinmiski. Min ea bechipaikin ea ana dayaxunkin jaska min ea yukai keska en mia pakakin axunxanaii— aka ²⁹⁻³⁰Jacobun ana yuikin:

—En mia dayaxunaya min inabu ma papakeai min uiain. En mia anu judiamaken eskadabes min jayaniki. Ikis inabu ichapajaida min

jayaki. Janua en mia dayaxunaitian Jehová Diosun mia duawamiski. Natian jaska min ea yuiaidan, ¿jatian en bakebu en tadi medibi dayaxuntidumen?— aka

³¹⁻³²—Jawa min bechipaiai en mia jawen pakaidan— aka

—Peiwen ea pakayamawe. Min cabra inun min chaxuwan ichawatan namakis nikaunkin katukin pakebaunkin keneya inun meshupa inun shiwaya ja en katua min ea yunua ena ixanai nun unantiduki. Jawen min ea pakatiduki. Min ea jaska waxuna min inabu en ana yumewakin mia ichapa waxuntiduki. ³³Chipu mia juxun en inabu uinbaunkin mina uindiakin jadata mina en yumetsua min uintiduki. Enadan, keneya inun, shiwaya inun, meshupa en bikatsis ikaii. Jaskaken juxupa ena anu nashui ika uinkin ja en mia yumetsunshina min unanxanaii. En mia jaska waxuna en juni chakabuma min unanxanaii— aka ³⁴Labánen yuikin:

—Peki. Jaska min shinain nun akubainxanaii— itan ³⁵⁻³⁶kaxun inabu keneya inun meshupa inun shiwaya paxkaxun jawen juni bakebu mekemakin xaba dabe inun besti kain jikianu Jacobun chaxuwanyan Labánen jatu nichinken januxun Jacobun Labánen inabu mekexunkin ana taewanikiaki.

³⁷Januxun Jacobun ji sidi ichapa mextexun dadis akin pusteya wakin juxupa inun meshupa watan ³⁸janua unpax chaxuwanen akaibu anu besuudi nichinkin seu wa akeakea anua unpax aki beabu juxupabusbia chutanamekin ³⁹ji sidi shiwaya uinkin bake bia bake meshupa inun shiwayabu ichapa taxnikubainibukiaki. ⁴⁰Chaxuwan bake meshupa inun keneya inun shiwaya Jacobun paxkakin Labánen chaxuwan juxupabu besuudi mapunkin jawena wa ⁴¹unpax amati anua chaxuwan kushipa chutanameaya Jacobun jawaida ji sidi ichapa betsebain nichian ja chaxuwan janua uinkin ji sidi pusteya dapikea chutanamekin bake kushipa juxupa pawakubainibukiaki. Jatu jaska wa akeakekubaina juxupama taxnikubainibukiaki. ⁴²Januadi chaxuwan babu chutanamediaibun ji pusteya ja dapi Jacobun nichianma bake nanea chaxuwan bake juxupa babu imana taxnidiakubainibukiaki, jaskaken chaxuwan juxupa babubu Labánenadan. Janua chaxuwan keneya inun meshupa inun shiwayabu kushipabu jawen dais Jacobna inikiaki. ⁴³Jaskawen taea Jacob jawena ichapa jayakunkainikiaki, inabu inun, juni inun ainbu tsumabu inun, camello inun, asno midima jayaidan.

Jacob junekainkatsi jawen ainbuaibube yubakanikiaki, na janchadan

31 ¹Labánen juni bakebu Jacobkidi yuinamei: “Nukun epan ina anua chaxuwan tibi Jacobun biankin maewakin nuku ma binuinkiki, jawenawakinan”, ikubainaibu juni betsan jatun jancha Jacob yuiabu ninkatan ²Labán uinkin Jacobun shinankin: “Ea ana uin pewamaki, eki sinatai en uiaini, ja dukun benimai taeni keskamadan”,

ikin ³jaskai nixun shinanyan Jehová Diosun Jacob yuikin: “Min epan mae anu minabu anu ana kai chintunwen, mibe kakin en mia medabewakubainaidan”, aka

⁴Jacobun jawen ain dabe jau benunbun jawen tsuma yunua jatu yuixuntana janua jatun jiwe anua Raquel inun Lía janua chaxuwan mekei dayai anu bui Jacobki nukuabu ⁵⁻¹³jatu yuikin:

—Matun epan ea pewama en uinkubainaii. Ja dukun eki benimaniki. Natian ikis eki sinatai en uiaiin. Jakia en epan mekenika Diosun ea medabewakubainikiki. Matun bedubi dayaxunchakayamakin matun epa en duawakubainmiski. Jakia matun epan ea ichakawakin ea pakakin bestikima maewa akeakekin ea padankatsi ikaya Diosun nemamiski. Labánen ea yuikin: “Chaxuwan bake keneya minaki”, ea wabianiken yuxan dasibi keneya taxnikunainaibu janua shinan betsa watan Labánen ana ea yuikin: “Chaxuwan bake shiwaya minaki”, ea wadiaya yuxan dasibi shiwaya taxnidiakubainikiki. Jaska wakin Diosun matun epan inabu ea mebinmakin ea inankubainikiki. Daka en uxa namaya chaxuwan chutanameaibu en uianyan chaxuwan bene shiwaya inun keneya inun meshupa bestibun yuxan chutaibun Diosun nai tsuman ea yuikin: “Jacobuun”, ea aka: “En nenuki”, en wa: “Uian, dasibi Labánen mia ichakawai en uinmiski. Jaskawen taexun bene shiwaya inun keneya inun meshupa bestibu en bake bimakubainaii. Betel anuxun jaska Diosun en mia yuini en eaki. Jabianuxundi mishki unanti wakin benitan xeniwen daxu atan janua min ebe yubakaniki. Jaskawen taea benitan na mae anua paxadiwe. Jadia min kaini anu inun kadiwe”, ea wakin jaska Diosun ea yuishinaki— jatu wa ¹⁴⁻¹⁶ninkatan jawen ain Raquel inun Lían shinankin yuikin:

—Nukun epan jiwe anu nun ana jawawen nuitidumaki. Chaxuwan inan keska wakin nuku nawa keska wakin nukun epan nuku mia inani inun janua jawen chaxuwan mia yununi min biankubaina jawena ma keyudiaikiki. Jaskawen taexun ina tibi inun mabu dasibi Diosun nukun epa mebinxun mia inankubainai nukuna inun nukun bakebunaki. Chanimaki. Jaskawen taexun jamapai shadabu Diosun mia yuishina ixunwen— akabu

Jacob Padán-aram anua chaniama junekainikiaki, na janchadan

¹⁷⁻¹⁹jaskashinxun Jacob ana Canaán anu chintunkatsi jawen jamapai pewanun ikaya Labánen jawen chaxuwan dani mextei kaken Raquelin jawen epan kenwanti mankan dami yumetsukaini janua Padán-aram anua Jacobun jawen inabu dasibi bini inun, jawen tsumabu inun, jawen mabu ichawatan jawen ain dabe inun jawen bakebuya camello kamaki jatu katsaunbainkin Canaánkidi jawen epa Isaac jiwea anu jatu dasibi iyui ²⁰⁻²¹kakin jawa jatu banabimama paxai Arameo nawa Labán

Jacob jaki chaniama padanbainkin jawenabu dasibi jatun mabuya iyui jene Éufrates ma pukebaina Galaad Matikidi Jacob besusi paxai junekainikiaki.

Jacob kashian Labánen chibanikiaki, na janchadan

²²Janua Jacob paxai jaska kainshina ma 3 xaba ma kaya Labán yuiabu ninkatan ²³⁻²⁴jawenabubetan Labánen Jacob chibankin 6 xaba chibankubaini jaki nukudiana uxa namaya Diosun Labán yuikin:

—Uindawe. Mimebi Jacob kunyan akin jawa chakabu yuiyamaxanwen— aka ²⁵janua bestenkaini kai Galaad Matikidi kaya ja matikin Jacobun jatun tadi jiwe nichinkin punteshina dakaken Labán jawenabuya kai jaki nukutan jatun tadi jiwedi mati anu jabundi nichinkin puntediatan ²⁶⁻³⁰Jacob anu kaxun Labán jaki sinatakin yuikin:

—¿Jaskai min jaskakidanshinamen? Ea padankin en ainbu bake dabe min ea iwenshinaki, detenametan jatu achibidanai keska wakinan. Ea jawa yuiama ea padantan june min paxashinaki. ¿Jaskada shinain min jushianmen? Bebunkidi jukin min ea yuia mimawati arpa inun tun tun atiwen nawakin benimakin en mia nichinpanan min june paxai jushianki. Mia nichinkin en bake dabe inun en bababu benimakin jatu tantsu apanan min ea jatu junenbidanshinaki. ¿Jaskada min unainsmapajaidamen? En kushipawen en mia chakabuwapanan min epan mekenika Diosun ea yuikin: “Uindawe. Mimebi Jacob kunyan akin ja akin jawa yuiyamaxanwen”, ea wa en ninkabidanshinaki. Min epan mae anu kabiai jui peama ¿jaskakin en mankan dami xunska min ea yumetsukidanshinamen?— aka ³¹Jacobun kemakin yuikin:

—Datei jawa shinanma min kushipawen min ainbu bakebu min ea mebintidu shinain miki chaniama en jushianki. Jaska min ea watiduken june en paxakidanshinaki— iwanan, ³²Raquelin jawen epan kenwanti mankan dami yumetsubiakidanshinken Jacobun jawa unanma ana yuikin:

—Jadatutunda min mankan dami beshian min bechiaya ja enabu jau mawanunwen. Enabu anua en mabu dasibi uin keyuwe. Janiada min mabu bechitan butanwen— aka ³³ja dukun Jacobun dani tadi jiwe anu jikitan bena keyutan janua Lían dani tadi jiwe anudi jikitan bena keyudiatan janua jawen dayadu esclava ain dabetun dani tadi jiwe anudi jikitan benakin keyudiatan jawen mankan dami jania bechiama jamen bena keyutan atimas Raquelin dani tadi jiwe anudi jikidiatan ³⁴mankan dami beanshina camello kabekanti medan adua Raquelin adui jaki tsauaya jawen epa Labánen jawen mabu dasibidi uinkin mebaunkin ana januadi bechiamaken ³⁵Raquelin jawen epa bepadankin yuikin:

—Epaan, eadan, eki sinatayamawe, jimi iki tsaua en jaska benitimakidan— aka jaska wa benabaunkin Labánen jawen kenwanti

dami jabu tibi anua bechiamaken ³⁶⁻³⁷janua Jacob sinatakin Labán chitekin yuikin:

—¿Jawai e iskidan ea chibanshinxun en mabu dasibi itimaska wakín mebaunkin jawa mabu mina min ma bechiamen? Minabu inun enabun bebun manchinwen. ¿Jadatutun nun pewaimenkain? ¿Min miamenkain? ¿En eamenkainan? Nukunabun jau nuku yuinunbunan. ³⁸Ma 20 año en mia dayaxunaya min inabu yuxan tuyatan kaunmama ikunkainimaki. Ja inun, min chaxuwan bene enawakin en piama ikunkainimaki. ³⁹Jawa inawan mina mia bian en mia bexuanma ipauniki, en mia meke pewaxunadan. Jakia ena en mia nichinxunpauniki. ⁴⁰Xabatian inun meshu medan yumetsubainabun ea pakamakin min ea yunui dakaimaki. Badidi badin ea kuamiski. Meshu medan matsin ea aka ikinin iki en uxaismaki, matsi teneidan. ⁴¹Jaska tenekubaini mia dayaxuni 20 año min mae anu en jiweshinaki. Janua 14 año min ainbu bake dabe binun ika jamen ea en dayama ikunkainiki. Janua ana 6 año min inabu bi en mia dayaxunkunkainshinaki. En mia dayaxunaya betsa tibi min ea maewaxunkubainmiski, ea jawen pakakinan. ⁴²En epa Isaac inun en juchi Abraham jatun mekenika Dios en jayamaken mais jawauma min ea nichinkeanshinaki. Jakia min ea chakabuwai Diosun uinxun en mia pe dayaxunai uindiakubainshinxun jaskawen taexun ekidi janchakin Dios ewen nuikin mia nemashinaki— aka

Jacob inun Labánen pewai yubakanandabenibukiaki, na janchadan

⁴³jaska wa ninkatan Labánen yuikin:

—Jaskamaki. Ea ninkawe. Ja min ain dabe min iweshinadan, en bakebuki. Jawen bakebudan, en bababudiki. Ja min inabu dasibidan, enaki. Dasibi min beshianan, enaski. Jakia en ainbu bake dabe inun jawen bakebudan, en ana jawa jatu waxuntidumaki, medabewakinan. ⁴⁴Jaskawen taeadan, mia inun eadan, yubakanamenanwen. Nuku dabe uinkin jawen jau Diosun nuku unanpakexanunan— aka ⁴⁵Jacobun ninkatan jawen unantiwanun ixun mishki bixun dabekin nichintan ⁴⁶jawenabu yuikin:

—Mishki ichawakin maspu keyatapa wakanwen— jatu wa ichawakin manchinxunabu jawen padananantimawakin mishki manchianbu dapixun piaibun ⁴⁷Labánen ja mishki manchinxu kenakin: “Jegar Sahadutáki”, anikiaki. Jakia Jacobun jabias mishki manchin jatundi kena betsa wakín: “Galaadki”, adianikiaki. ⁴⁸Januxun Labánen ana yuikin:

—Na mishki nun ichawakin maspuaxudan, unanuma nun paxkakaina mia inun ea nukun unantiki— iwanan, jaskawen taexun Jacobun enabun kenakin: “Galaadki”, anibukiaki.

⁴⁹Labánen ana yuikin:

—Nun paxkakaina nun ana uinananmaken jau Jehová Diosun nuku dabe uinpakexanunwen. ⁵⁰En ainbu bakebu min ea jatu ichakawan

kasmakin min jatu danankin ainbu betsa biayadan, juni betsan mia nematidumabiaken: “Nun yubakaiwen taexun min jaskaya Diosun unainkiki”, jakimayamaxanwen— aka jaskawen taexun ja mishki maspu kenakin: “Mispáki”, nukun janchawen yuiadan, “Jakixun Diosun Uinbauntiki.” ⁵¹⁻⁵³Januxun Labánen ana jancha wakubainkin:

—Uian. Na mishki maspuabu inun mishki keyatapa en nichinxudan, jabuwen nun yubakai nukun shinanmatiki. Ea inun mia namakis nia keska nun axuki. Ea miki sinatakin mia chakabuwakatsi ikin ja dabe en binuama ixanaii. Miadi eki sinatakin ea chakabuwakatsi ikin ja dabe min binuamadi idixanaii. Nun ma yubaka jaska jaya jadatutunda nun chakabuwakin kaneaya ea kasmai mian nun kaneayadan, min juchi Abrahamnen mekenika Dios inun en juchi Nahorin mekenika Dios jabiastun nuku betsa kupixanikiki— aka jaska wa Jacobun ninkatan jawen epa Isaacun mekenika Dioski datekin yuikin:

—Peki. Jaska nun yubakai keska ipakenanxanwen— iwanan, ⁵⁴Dios benimawakin mati anuxun jawen kenwanti piti pewakin chaxuwan bake tesenxun xui keyutan misiyabi jatu pimanun ixun jawenabus kena ichabu jatubetan pitan matikin jabiadi uxashini ⁵⁵penaya Labán bestentan jatu jenebainkatsi jawen beyawen jawen bababu inun jawen ainbu bake dabe tantsu axun jancha pepawen yuikin jatu duawatan jawen mae anu chintu nbidanibukiaki.

Jacob inun jawen betsa Esaú nukukunanun ika inibukiaki, na janchadan

32 ¹Janua jawen ibuan jiwe anu ana kai chintunkaini bai tanabainaya Diosun nai tsumabu Jacobki nukuaiibu ²jatu uinkin yuikin: “Nadan, Dios dayaxunikabu kushipabuki”, atan “Jaskawen taea na mae kena ‘Mahanaimki’ ”, anikiaki.

³Januxun mae Seír anu Edom mai pakea anu jawen betsa Esaúki ma juaikidi jau kaka buxuntanunbun Jacobun jawen tsumabu eskadabe yunukin ⁴⁻⁵jau eska yuixuntanunbun Jacobun jatu yunukin:

—En betsa Esaú eska yuitankanwen: “Min tsuma Jacobun mia yuikin: ‘Nukun kukabe en jiwetani atimas en ana miki nukuyuaii. Eadan, en eska jaya en juaii. Ninkawe. Ina awa inun, asno inun, chaxuwan inun, juni inun ainbu dayadu esclavo midima en jayaki. Min ekidi pe shinanun’, iwanan, ‘Min en xanen ibuki, akin mia yuikin bebunkidi mianu en jancha en mia bumaii’ ”, akin en yunuai jabiaskadi en jancha en betsa Esaú ea yuixuntankanwen— jatu wa ⁶buxun Esaú yuitan ana chintunbidan Jacob yuikin:

—Min betsa Esaúki nukuxun nun yuia nuku ninkatan 400 junibuya miki nukui ja kayabi juikiaki— akabu ⁷ninkatan jawen betsa padaniwen taea shinain datejaidakin Jacobun jawenabu inun jawen inabu paxkakin

jawenabu betsa inun jawen chaxuwan inun, jawen ina awa inun, jawen camello jati paxkakin xuku dabe watan ⁸shinankin: “Ja dukun mani betsaki dukun Esaú nukutushitan jatu deteaya uintan mani betsa paxatishadaki”, ika ⁹⁻¹²janua bika tenei Diosbe janchakin: “Jehová Diosuun, min en juchi Abrahamnen Dios mekenika min ikunkainiki. Min en epa Isaacun Dios mekenika min idiakunkainaii. Jaskawen taexun ea yuikin: ‘Min mae anu ana kawe. Minabu anu ana kawe. Min jadi ka jadixun en mia duawaxanaii’, akin min ea yubaimaki. Chanima min ea duawaii. Nenua kaidan, en mestenti bestiya en kaniki, na Jene Jordán pukeidan. Jakia na eskatian yuda mani dabeya Jene Jordán en ana pukei kaii. En jaska kainaya en betsa Esaú eki sinatai ea mekewe. Juxun ainbu bakeya dasibi tenainkiki, ika en jaki dateaii. Min ea yuikin: ‘En mia duawakin min bababu en pa waxanaii, mashiti tsuan tanatiduma wakinan’, akin min ea yubayamaki. Jaskawen taexun en betsa Esaú anuxun mekekin ea ichakawamayamawe”, atan ¹³janu uxashini bestenkauan Esaú jawen daewakin ja inankuinkatsi jawen inabu katukin ¹⁴200 chaxuwan yuxan inun, ²⁰chaxuwan bene inun, ²⁰⁰cabra yuxan inun, ²⁰cabra bene inun, ¹⁵30 camello yuxan bakeya inun, ⁴⁰ina awa yuxan inun, ¹⁰ina awa bene inun, ²⁰asno yuxan inun, ¹⁰asno bene katuxun ¹⁶ina shadabuya jawen tsumabu tibi mekemakin jatu paxka akeaketan jatu yuikin:

—Matunan, bebunkidi paxku pukekanwen, ina xukuabu tibiya benanta bukubainidan— iwanan, ¹⁷bebunkidi inabuya jawen tsumabu yunukin:

—En betsa Esaú matuki nukuxun matu yukakin: “¿Matun xanen ibu tsuamen? ¿Man jani kai? ¿Na inabudan, tsuanamen?” ikayadan, ¹⁸Esaú yuikinan: “Eska waxankanwen. Min tsuma Jacobunaki. Min jawen xanen ibu Esaúdan, ja bexuinkiaki. Uian. Nuku ichun Jacobdi chipu ma judiaikiki”, akin yuixankanwen— jatu wa ¹⁹jawen tsumabu inabu tibiya ana ja kachu jabias jancha jatu yuitan januxun jawen jenekin jatu yuikin:

—Esaú matuki nukuaya jabu dukun en jatu jancha waxu keska jabiadidi yuixankanwen. ²⁰Jancha menekin yuikin: “Uian. Nuku ichun min tsuma Jacob chipu ma juikiki”, akin jaska yuidiaxankanwen— iwanan, shinankin —Inankuinti ea bebunkidi yunukin en betsa en daewaii. Chipu jawen besu en uian ea dananmamenkain— ikin ²¹jawen tsumabu inankuinti jabu dukun bebunkidi yunua paxku pukei buaibun janua ja kayuama meshu medan bai puchinin niti ika uxa ishin

Jacob inun Diosun nai tsuma achinamenibukiaki, na janchadan

²²⁻²³yamenapun bestenxun jawen ain dabe inun, jawen esclava ain dabedi inun, jawen ¹¹bakebu jatu bestenwanxun paxku jawen kena Jaboc jatu pukemaxun ja inun, jatun mabuya jawen tsumabu inabu dasibidiya pukematan ²⁴⁻²⁵Jacob besti niti iken juni betsa juxun maemakatsi ikin meshu medan jabe tsumanametam tin anun ixun

ashinkin penaya juni betsan Jacob maematiduma juni betsan kishtinkin Jacob kishtux atan ²⁶yuikin:

—Ma penaikiki. Ea jenewe— aka Jacobun yuikin

—Min ea pepawama en mia jeneamaki. Min kushipawen ea pepawawe— aka

²⁷—¿Jadakidi min kenamen?— aka

—En Jacobki— aka

²⁸—Dios inun junibu binunkatsi ikunkainkin min ma jatu maemaki. Jaskawen taexun jabun mia ana Jacobwen kenabuma ixankanikiki. Jakia mia kenakin: “Israelki”, akin mia kenaxankanikiki— aka Israel nukun janchadan, “Diosbe min ma binunameaki”, aka ²⁹januxun Jacobun yukakin:

—Miadan, ¿jadakidi min kenamen? Ea yuiwe— aka

—¿Jaskai en kena min yuka ikaii?— iwanan, jawen kena yuiama januxun Jacob jawen kushipawen pepawa bestitan kaya ³⁰Jacobun shinankin:

—Ja junidan, Diosdaka. Diosbe en beisinanbiaxu en mawama ixuki. Jaskawen taexun na nenua en jabe achinameshinai: “Penuelki”, akin en kena bena waii, nukun janchawen yuiadan, “Diosbe en beisinaxuki”— ikadan. ³¹Janua penaya badi juaya ja kishtux akawen taea tidi ikaini Jacobundi paxku jawen kena bena Penuel pukebaini kai ³²janua Jacob Diosun kishtux aniwen taexun natian Israelin enabun yuinaka betsa betsapawen kishi punu chichia pisbumakiaki.

Jacob inun Esaú daenamenibukiaki, na janchadan

33 ¹Janua Jacob kai xadakunkaini kakin jawen betsa 400 junibube chai juai Jacobun bechitan januxun dabe inun besti jawenabus xuku wakin jawen ain Lía jawen bakebuya inun, jawen ain betsa Raquel jawen bakeya inun, jawen esclava ain dabe jatun bakebuya jatu paxkatan ²jawen esclava ain dabe jatun bakebuya tadi xuku watan bebun jatu mapuntan januxun Líadi jawen bakebuya ja kachu tadi mapundiatan Raquel jawen jenekin jawen bake Joséya chipu tadi nichintan ³jatu jaska watan jawaida Jacob jatu binubaini bebunkidi kai jawen betsaki nukui kakin daewai jawa buama kai uinmai jawen beyawen taea main beti iki 7ki beukunkaini jawen betsa anu kaya ⁴jaskakunkainaya unudiadi ana jaki sinatamadi uinmadi kushidiakidan Esaú Jacobki nukutan ikukunain teikukutan tantsu aka benimai jabia dabe kaxanibukiaki. ⁵Jaskai menetan Esaú bewenikitan jatu uinbaunkin ainbu jawen bakebuya bechikin Jacob yukakin:

—¿Na mibe beaibudan, min tsuabumen?— aka

—Enabuki. Diosun ea jatu inankubainshinaki, min tsuma en eadan— akaya ⁶janua jawen esclava ain dabe jatun bakebube bua main danti

itan beti ikaibun 7janua Lía jawen bakebube kadiai main danti itan beti idiaibun janua chipu jawen jenei José jawen ewa Raquelbe ka main danti itan beti idia jaska maniabun 8Esaún ana Jacob yukakin:

—Na min inabu inun min tsumabu dasibibu mia bebun en uinkubidani en miki nukuidan, ¿min jawen jawayuai?— aka

—Nun ana sinatadabeyamanun mia daewakin en inabu dabukun en mia bexuain, nun ana chakabui jiweyamaxanunan— aka

9—En betsa kayabituun, jaskamaki. Ichapa en ma jayadiki. Jawada min jaya min beaidan, minaki. Ea paxkaxun inanyamawe— aka

10-11—Jaskamaki. Min ea bechipaiaiwun taexun na inankuin en mia bexunxu biwe. Min ewen benimai en mia uinxuki, jaska Dios en uiain keskadan. Diosun ea duawamiswen taea ichapa en jayaki. Jaskawen taexun ea dananma en inankuin biwe— akin jawenchains yunu yunu aka atimas shinan betsa watan bitan 12januxun Esaún yuikin:

—Nenua kadinuwe. En bebuai chipu ea ichun kawé— aka

13-14—En betsaan, min unaiin. En bake mishtin kushisma inun en inabu yuxanendi jawen bake chuchu amaibuwen en nuiiai.

Xaba bestichai jikinun ika nun jawaida kushikainaya en inabu ea mawaxuntidubuki. Mia dukun bebudiwe, eadan, en inabu kai uinkubaini inun en bake mishtin buaibu unanxubida en jatu iyuaidan. Seír anu en miki ana nukui kaidan, bebudiwe— aka

15—Peki. ¿En junibu dabukun mia bashixunpa, jau mia medabewakubainunbunan?— aka

—Min ea medabewatidubia ewen nuiyamawe, emebi en kaidan— aka 16jaska wa jawen 400 junibube Seírkidi Esaú ana chintunkidanshinken

17janua jawen shinan betsa watan ana jadi jiweakidi kama texkikaini Jene Jordán pukebaini Sucot anu Jacob jawenabube kaxun jiwe watan badi kaya janu inabu bichiti jiwe ichapa jatu wama ji mebi mexketantankin dakenxunbaunibukiaki. Jaskawen taexun ja mae kenakin: “Sucotki”, nukun janchawen kenadan: “Ji mebi keneki”, amisbukiaki.

18Janua Jacob Padán-aram anua jui jawa chakabuma pe Canaán mai pakea anu Siquem mae dapi jawenabube jiwetushinikiaki. 19Janua mae ibu wanun ikin Siquemnen epa Hamorin enabu anua 100 pei jexe kadujaidawen taexun ja mae ibu wakin pakatan janu jatun tadi jiwe jatu puntemabauna janu maniabun 20januxun mishki chi tapu wakin mishki ichawakin maspu watan januxun Dios kenwanti chi tapu waxun kenakin: “El-elohé-israelki”, nukun janchawen kenakinan: “Diosdan, Israelin mekenika Dioski”, anikiaki.

**Dina nawan pesashinawen taexun jawen puibun
jatu detekin keyunibukiaki, na janchadan**

34 1Janua Siquem mae anu Jacobun ain Lían bake Dina chipash jiwe betsa anu ainbu betsaki bai ka 2Heveo nawa xanen ibu

Hamorin bake iyua Siquemnen Dina uinkin achixun pesakin dakewatan³ chipash bechipajaidakin daewanun itan jau jabe bechipainamenun jabe janchai petan⁴ jawen epa Hamor banabimakin:

—Ja chipash en ainwankatsis ikai jawen epa ea yukaxuntanwen— aka⁵ janu jawen puibu jayama chai buxun jatun inabu pimai buabun Siquemnen jawen ainbu bake chutaxu yuiabu jawen juni bakebu bediabumaken Jacob ja mesti ja ikatsi ikama teneyunikiaki, jawa yuiamadan. ⁶⁻⁷Janua jawen puibu bexun Dinakidi ninkatan shinankin:

—Nukun pui Siquemnen chutakin nukun ibubube nuku ichakawashinakiaki. Tsua jaskatimajaidaki— itan jaskawen taea juinti nishma jaki sinatajaidaibun jabe janchanun ika Hamor jawen bake Siquembe Jacob anu kaxun ⁸⁻¹⁰jatu yuikin:

—En bake min bakewen kemukin bechipajaidaikiki. Jau ainwanun en mia yukaxuniyuaii, eskatian nun enanamenunbunan, yuda bestichai keskaidan. Eskaidan, nukun ainbu bakebu bixankanwen, matunadi nun bidiakubainunbunan. Nukube man jiweaya nukun mai pakea matunadi idiaxanikiki. Nenu jiwekanwen, janu jiwea dayakin mabu ichawakin ana mae ewawakubainxankanwen— jatu wa ¹¹⁻¹²januxun jawen bake Siquemnendi jatu yuikin:

—Matu daewakin jawada man ea yuka en matu inanxanaii. Inankuin jamapai shadabu man ea yuka en matu inantiduki. Jaskawen taexun matun bake chipash ea inankanwen, jau ea benewanunan— jatu wa ¹³⁻¹⁷jatun beyawen taexun jatun pui nawa inantiduma shinankin jatun pui ichakawashinawen taexun Jacobun juni bakebun jatu padankin Siquem inun jawen epa yuikin:

—Man jaskabu nukun pui nun matu inantidumajaidaki, man nukun beya keskamadan, matun jina kubichi mextekeumadan. Nun jaska matu inain nun dakekatsi ikamaki. Jaskawen taexun nun matu yunuamaki. Jakia jaskakatsidan, ja dukun nuku keskai juni tibi matun jina kubichi man mextekeaya nukun puibu matu inantan matunadi nun bitiduki. Jabias yudabu xukua keskai nun matube jiwetiduki. Jakia man nukun jancha ninkama matun jina kubichi mexteamaken nukun pui matu mebinbaini nun kainkainxanaii— akabu ¹⁸jatun jancha Hamor inun jawen bake Siquemnen ninkatan:

—Jaskadan, peki— ikaiibun ¹⁹⁻²⁰Jacobun ainbu bake bechipajaidaki mexteabu isinki dateama jawen jina kubichi Siquemnen jatu bimatan janua jawen epabe ichamisbu jemaintin anu Siquem kaxun xanen ibu keskakin jawenabu juni dasibi kena ichaibu jatu yuikin:

²¹⁻²³—Ja junibudan, nukuki sinatabumaki. Jaskawen taexun nukun mai pakea anu jatube jiwenankanwen, jabube biakanain nun dasikubainunbunan. Uian, jatun jancha ninkanankanwen, nun jaska jatu chibanyan nukube jiwexankanikikidan. Nukun mai pakea ewapawen taea nuku inun jatube nenu nun jiwetidubuki, jatun inabuya jatubetan

pimaidan, nukun ainbu bakebube nun jatube biananankubainunbunan. Jamen nukun jina kubichi nun mexteamaken yudabu bestichai keskai nukuki dasitan nukube jiwekatsi ikabumakiaki. Jakia nun jabu keskai juni tibitun nukun jina kubichi nun mexteaya jawenabui yuda xuku bestichai keskai nukube jiwexankanikiaki. Nun jaskaya jatun inabu inun jatun mabu nukuna ixanimenkain. Jatun jancha ninkanankanwen, nun jaska jatu chibanyan nukube jiwexankanikikidan— jatu wa ²⁴Hamor inun Siquemnen jancha jati badiyabu dasibi jabu detenamei butidubu keskabun jatu ninkatan jabun kemakin:

—Jaskakenan, peka— ikaibu januxun jabun jina kubichi mextebaunkin jatu keyushinabu ²⁵jatu jaska washinabu xaba dabe inun besti kaya juni dasibi isin tenejaidaibun Jacobun bake dabe Simeón inun Leví Dinan pui kayabibun nupe chaipaya ka ja maewan anu jikixun jiwe tibi june jikikunkaunkin juni dasibi jatu dete keyunibukiaki. ²⁶Hamor inun jawen bake Siquem detediatan jatun jiwe anua jatun pui Dina mebikinanbainkin iyuabu kaya ²⁷janua jatun pui Dina Siquemnen ichakawashinawen taea Jacobun juni bake betsabu ja jatun betsan jatu tenankanxu anu jabudi buxun jiwe tibi anua jatun mabu bianbaunkin ²⁸jiwe dapikea inun bai anua ina shadabu bamakin jatu ichawatan ²⁹jatun mabu dasibi biantan jatu tsuma wabainkin jatun bakebu inun jatun ainbuaibu dasibi jatu ichawabainkin ja maewan dasibi anua jatu iyukin jatu yumetsubainibukiaki.

³⁰Jawen bakebun jatu jaska waxuwen taea jatuki sinatakin Jacobun jawen bake Simeón inun Leví jatu ja akin yuikin:

—Ea chakabuwakin nawa betsa betsapa man ea jatu mesewamaxuki, Canaán nawabu inun Ferezeo nawabudan. Nukudan, nun eskadabeski. Jakia jabudan, ichapajaidabuki. Jabu dasitan nuku dete keyukin nuku yamawaxankanikiki, ea inun enabu nuku texe jeneamadan— jatu wa

³¹jawen bakebun ninkatan jatun ibu yuikin:

—Jaska wakin nukun pui dasibituna jininipa wakin beya wakin nuku bexpa bechitidubumaki— anibukiaki.

**Betel anuxun Diosun Jacob mai pakea ibuwamakatsi
yubakin kushipa wakin pepa wanikiaki, na janchadan**

35 ¹Januxun jatu jaska washianbun Diosun Jacob yunukin:

—Minabu pewatan Betel anu jiwei kawe. Janu jiwea min Esaú anua paxaya en miki nukua min namaya en mibe janchani anu ja mishki chi tapu januxun min ea kenwantidu axanwen— aka ²jaska wa datekin jawenabu inun jawen tsumabu Jacobun yuikin:

—Matu anua dami yushin tibi man jaya kainmakanwen. Janua nashi chuki petan pepanun, ika matun tadi betsa sawetan ³janu Dios jiwea mae Betel anu bunankanwen. En nuitapakaini kai janida en kapanan

Diosun ea unankin medabewakin ea jancha wani janida en kaya ebe kakunkainmiski, ea jaska wamiswen taexun Dios kenwankin mishki chi tapu wakin mishki ichawakin maspu watan en chaxuwan bake textexun en menu keyuxuni kaidan— jatu wa ⁴januxun jatun yushin dios dami tibi betsa betsapa kenwankin damiwamisbu inun, jatun dami oro mane pau Jacob inanbu mae Siquem dapi ji xukua naman pukinxun ana uintimawakin Jacobun dasibi maiwatan ⁵jatu jaska wamabaini taxnibainaibun mae tibi anua Diosun jatu datemabaunaiwen taexun Jacob jawenabube detekatsi ibiai datekin jawen bakebube chibanma inibukiaki.

⁶⁻⁷Janu jawen betsaki datei paxai kai uxaki janu Dios jaki nukuni ja mae Luz nawabun kenanibu anu Dios jaki nukua uinshinkin kena bena wakin: “Betelki”, ani anu ana Jacob jawenabuya jadi kai jikitan januxun chi tapu wakin mishki ichawakin maspu watan Dios kenwankin Jacobun chaxuwan bake tesenxun menu keyuxuntan ana jabiadidi kenakin: “Betelki”, anikiaki. ⁸Jabianuadi Jacobun ewa Rebeca jatun yumewani jawen tsuma Débora ma yuxabujaida mawaken Betel mae dapi ji xukua naman mai watan jabianuadi kaxa chakayamatan jawen taexun kenakin: “Nui pae ji xukuaki”, anikiaki.

⁹Padán-aram anua ana Jacob chintuinmaken Dios ana jaki nukuxun jau jaskanunbadinin Diosun jawen kushipawen duawakin pe yuikin ¹⁰eska wanikiaki:

“Ikis min kena Jacobki.

Ana Jacob kenama jakia: ‘Israelki’, akin jau jawen mia kenapakexanbunwen”,

iwanan, jaska wakin Diosun Jacob kena bena wanikiaki. ¹¹Ana yuikin:

“Eadan, en mekenika Dios kushipaki, en kushipawen dasibi en jatu binu keyuadan.

Ea ninkawe. Ichapai paxankanwen, minabu bake pawai midimajaidawaidan.

Mia anua minabu xukua betsa betsapa xanen ibu kayabi ixankanikiki.

¹²Na mai pakea min juchi Abraham

inun min epa Isaac yubakin en yununi jabiaskadi wakin en mia yunuaii.

Januxun chipudi minabudi pakubainaibu en jatu yunununbadaiai”, atan

¹³janua Dios Jacobube janchatan kaken ¹⁴jabianudi Jacobun mishkiwen unanti wakin dabekin nichintan jaska watan Dios kenwankin uva vino inun piti xeni jene inankuinkin jaki maxu akin maukanikiaki, ja mishki Diosuna wakinan. ¹⁵Jaska watan ma anixun ana jabiadidi kenakin: “Betelki”, anikiaki, nukun janchawen kenadan: “Diosun Jiwea Maeki”, akinan.

Raquel bake kaintan mawanikiaki, na janchadan

¹⁶⁻¹⁷Betel anua kainbaini mae betsa Efrata ma kemai buaibun Raquelin bake bima tuya kai bai namakia bake kainun ika kainchakai bika tenejaidaya jatun bake imaitun yuikin:

“Dateama iwe, min iki peaidan, juni bake betsa min kaiainan”, aka ¹⁸mawakatsis ikamabia ma mawai Raquelin shinankin yuikin: “En juni baken kenadan: ‘Ben-onfki’, nukun janchawenan: ‘En isin nui bakeki’, atan mawaken jakia jawen epa Jacobun jawen kena bechipaiama kena betsa wakín: ‘Benjamínki’, nukun janchawen: ‘Duapa bakeki’”, jatu wa ¹⁹⁻²⁰jaskatan Raquel mawa Efrata bai kexa maiwatan jawen tsumabubetan Jacobun mishki keyatapa jawen unanti wakín jawen mai mamaki nichinibukiaki. Na jabia eskatian Efrata mae jawen kena bena Belén wanibu chaima anu na unanti uindiatidubuki.

²¹Janua Jacob jawen kena bena Israel jawen ain jaska wabaini ana chipekekaini kakín janua manaundixun uinbaunti jawen kena Éder dainbaini kaxun jatun tadi jiwe jatu puntamatan ²²janua jiweyuaya jawen bake iyua Rubén kaxun jawen epan esclava ain Bilhá ati wakín june chutaken Israel banabimabu ninkatan jaki sinatajaidanikiaki.

Jacobun juni bakebudan, 12 inikiaki, na janchadan

Jacobdan, 12 juni bakeya inikiaki. ²³Jawen ain Lían juni bakebudan, jawen tue benadan, Rubén inun, Simeón inun, Leví inun, Judá inun, Isacar inun, Zabulón jati binikiaki. ²⁴Jamen jawen ain betsa Raquelin juni bake dabedan, José inun Benjamín inikiaki. ²⁵Raquelin esclava Bilhán juni bake dabedan, Dan inun Neftalí inikiaki. ²⁶Janua betsa Lían esclava Zilpá anua juni bake dabedan, Gad inun Aser inikiaki. Jacob Padán-aram anu kani jiwexun dasibi jatu bawadan, jadia kainibukiaki.

Isaac mestebujaidatan mawanikiaki, na janchadan

²⁷Mamré jawen kena betsa dabe Arbá inun Hebrónan, janua Abraham inun Isaac jiwea mapupaunibu anu Jacob jawen epa Isaacki ana nukutushinikiaki. ²⁸⁻²⁹Janua Isaac 180 badiya mestebujaida mawaken jawen yushin jawen xenipabuki dasishinken jawen bake dabe Esaú inun Jacobun jawen yuda mai wanibukiaki.

Esaún bababu xukua tibi tanakubainibukiaki, na janchadan

36 ¹Esaú, jawen kena betsa Edom, inun jawen bakebu inun, jawen bababu jiwea eskanibukiaki. ²Canaán anua Esaún ainbu dabe inun besti ainwankinan, ja dukun Hitita nawa Elónen ainbu bake Adá inun Heveo nawa Sibónen baba ja ainbu bake Anán bake Oholibamá

bitan ³Januxun jawenabu Ismaelin juni bake Nebaiotin pui Basmat bidianikiaki. ⁴Januxun Adáki Esaún bakewadan, Elifaz kainikiaki. Januxun Esaún jawen ain betsa Basematki bakewa Reuel kainikiaki. ⁵Janua ana jawen ain betsa Oholibamáki bakewa juni bakebu biadan, Jeús inun, Jaalam inun, Coré inibukiaki. Na jati Esaún juni bakebudan, maewan Canaán anu jiwexun jatu bawa janua kainibukiaki.

⁶⁻⁷Jaska jiwea shinan betsatán jawen ain dabe inun besti inun, jawen 7 juni bake inun, jawen ainbu bake tanama inun, jawen dayadu esclavo inun, jawen inabu inun, jawen mabu dasibiya Canaán anua Esaún jawen betsa Jacob dapaxkabainikiaki. Jacobun enabu inun, jawen tsumabu inun, jawen inabu midimaken Esaúna jabiaskadiken jabetan jania jatun inabu jatu pimatima ana jabe jiwekatsi ikama uintan medibi jiwetanun itan jaska Canaán anua dasibi betsa betsapa bishian jaya maei kanikiaki, jawen betsa Jacob jenebainidan.

⁸Janua surkidi kai Esaú, jawen kena betsa Edom mati matipa anu Seír anu jiwei kanikiaki. ⁹Jaskabaini jadia Esaún bakebun bakewa panibukiaki, Edom nawabuidan, mati matipa Seír anu jiwekubainidan. ¹⁰Esaún juni bakebun kenadan, jawen ain Adán juni bakedan, Elifaz inikiaki. Basematin juni bakedan, Reuel inikiaki. ¹¹Januxun Esaún bakebun babaya wadan, Elifazin juni bakebudan, Temán inun, Omar inun, Sefó inun, Gatam inun, Quenaz jatu bawanikiaki. ¹²Januadi Elifaz janubi jawen esclava ain Timnáki bakewadan, juni bake Amalec kainikiaki. Ja jabun bababudan, Esaún ain Adá anua inibukiaki. ¹³Janua Esaún juni bake Reuelin bakewa Náhat inun, Zérah inun, Samá inun, Mizá jati Basematin jawen juni bababu inibukiaki. ¹⁴Sibónen baba ja ainbu bake Anán bake Oholibamá bitan Esaún jati juni bakebu jatu bawa Jeús inun, Jaalam inun, Coré inibukiaki.

¹⁵⁻¹⁶Esaún ain Adán juni bake iyua Elifazin juni bake bawadan, jati Edom anu xanen ibu tibi inibukiaki, Temán inun, Omar inun, Sefó inun, Quenaz inun, Coré inun, Gatam inun, Amalecdan, jati Adán juni bababu inibukiaki. ¹⁷Esaún ain betsa Basematin juni bake Reuelin juni bakebudan, jati Edom anu xanen ibu idianibukiaki, Náhat inun, Zérah inun, Samá inun Mizádan. ¹⁸Anán ainbu bakedan, Oholibamá Esaún ain betsa jawen juni bakedan, jati Edom mai pakea anu xanen ibu inibukiaki, Jeús inun, Jaalam inun, Corédan. ¹⁹Ja ainbu tibiki Esaún, jawen kena betsa Edom jatu juni bake bawa jati jawen juni bakebu inun jatun bababu Edom anu xanen ibubu inibukiaki, jatunabu jiwemaidan.

²⁰Janua Horeo nawa Seír jabianudi jatube nashui ika jiweatun juni bakebudan, Lotán inun, Sobal inun, Sibón inun, Aná inun, ²¹Disón inun, Éser inun, Disán jatibudan, Edom mai pakea anu jabudi xanen ibui jiwenibukiaki. ²²Seírín juni bake Lotánen juni bakebudan, jati inibukiaki, Horí inun Hemamnan. Lotánen puidan, Timná inikiaki. ²³Janua Seírín juni bake betsa Sobalin juni bakebudan, jati inibukiaki, Alván inun,

Manáhat inun, Ebal inun, Sefó inun, Onamnan. ²⁴Janua Seírin juni bake betsa Sibónen juni bakebudan, Aía inun Aná inibukiaki. Ja Anánan, janu tsua jiweama anu kaxun jawen epan asno mekexun pimaxunkin unpax chacha betsa betsapa jabamis bechitanikiaki. ²⁵Ja Anán juni bake betsan kenadan, Disón inun jawen ainbu baken kenadan, Oholibamá inikiaki. ²⁶Janua Disónen juni bakebudan, Hemdán inun, Esbán inun, Itrán inun, Querán inibukiaki. ²⁷Seírin juni bake betsa Éserin juni bakebudan, Bilhán, inun, Zaaván inun, Acán inibukiaki. ²⁸Seír jawen jenea juni bake Disánen juni bakebudan, Us inun Arán inibukiaki.

²⁹Janua Seír mai pakea anu Horeo nawa xanen ibu tibidan, jati inibukiaki, Lotán inun, Sobal inun, Sibón inun, Aná inun, ³⁰Disón inun, Éser inun Disánan jawen betsabube jiwei xanen ibuidan.

³¹Jabu dukun Israelbu xanen ibudiabumaken ja nawabu xanen ibukin dasibibu yunukin taewanibukiaki, Edom mai pakea jidabi anudan. ³²Beorin juni bake Bela Edom mai pakea jidabi xanen ibu inikiaki, jawen mae Dinhaba anuxun jatu yunukubainidan. ³³Bela mawaken Zérahn juni bake Jobab xanen ibunikiaki, jawen mae Bosrá anuxun jatu yunukubainidan. ³⁴Janua Jobab mawaken mai pakea Temán anua jabianudi Husam xanen ibu inikiaki, dasibibu yunuidan. ³⁵Janua Husam mawaken Bedadnen juni bake Hadad jawen xantukun xanen ibuaya Madiánen detenamenikabu Moab mae anu beaibube detenamekin jawenabubetan jatu maemanikiaki, jawen mae Avit anuxun jatu yunukubainidan. ³⁶Janua Hadad mawaken jawen xanen anu xanen ibui Samlá inikiaki, jawen mae Masrecá anuadan. ³⁷Janua Samlá mawaken jawen xantukun xanen ibui Saúl inikiaki, jawen mae Rehobot, jene kexa jiweadan. ³⁸Janua Saúl mawaken jawen xantukun Acborin juni bake Baal-hanán xanen ibunikiaki. ³⁹Janua Baal-hanán mawaken jawen xantukun Hadad xanen ibunikiaki, jawen mae kenadan Pau anuadan. Hadaden ainan jawen kena Mehetabel inikiaki. Jawen epa Matred inun jawen juchi Mezaab inikiaki.

⁴⁰⁻⁴³Ja yudabu tibi Esaún enabu, jawen kena betsa Edomnan, pai eskanibukiaki, xukuabu tibi inun mae tibi inun kena tibidan. Jatun kena tibidan, Timnán enabu inun, Alván enabu inun, Jeteten enabu inun, Oholibamán enabu inun, Elán enabu inun, Pinónen enabu inun, Quenazin enabu inun, Temánen enabu inun, Mibsarin enabu inun, Magdielin enabu inun, Iramin enabudan, jati inibukiaki, Edomnen bababu xukua tibidan.

37 ¹Janua janu jawen epa Isaac jiweni anudi Jacob jiwedianikiaki, Canaán anudan. ²Jacob inun jawen bakebu jiwei jaskapaunibukiaki.

José namai eskakunkainikiaki, na janchadan

José 17 badiyatun jawen epan esclava ain dabe Bilhá inun Zilpán juni bakebube jawen epan jatu yunua jawen chaxuwan nimakin pimai

jadixun jawen betsabu mapuchakaxun chakabu akaibu José jawen epaki chanikidankidanikiaki.

³Israel anibukin José bawaimawen taexun ja besti bechipaijaidanikiaki, jawen juni bakebu betsa mawaida jatu bechipaiamadan. Jaskawen taexun tadi jawendua chaipa daya tadima Israelin José jatu wamaxuna ⁴jatun epan jaska waxunkin José bechipaijaidai jatu binujaida jawen betsabun uinkin José dananibukiaki, jaska wa nia uin jabe pe janchanameamadan.

⁵⁻⁸Janua ana betsatian José uxa namashinkin jawen betsabu yuikin:

—Uxa namaidan, en eska shinaiin. Matu yuinun, ninkakanwen. Bai anu nun dayakin xekiwán mextexun neaxun nun manchinkubainaya en xekiwán nea jamebi benikauan niken janua matun xekiwán neadi benibidan juxun kenwain ena daxukua icha ena naman tininbainbaina en uinshinaii— jatu wai ninkatan ana jaki sinatakin yuikin:

—¿Nuku binui xanen ibutan min nuku yunuxanai uinshinkin min nuku yui ikai?— akin José naman inun jawen jancha bechipaima José danankubainibukiaki, xaba tibidan.

⁹Janua ana betsatian José ana uxa namakin uintan bestenkauan jawen betsabu ana yuikin:

—Uian. En ana uxa namashinaii. Matu ana yuinun ea ninkakanwen. Badi inun uxe inun 11 bishi ea naman xukua ea kenwain tininbainbaina ea dasedea en uinshinaii— jatu wabidan ¹⁰janua jawen epa anudi juxun jabias jawen betsabu yuixu jawen epaki chaniaya jawen epan kunyan akin yuikin:

—¿Min nama min nuku yuikubainaidan, jaskaxanun ixun min nuku yui ikai? ¿Ea inun, min ewa inun, min betsabun mia kenwain nun daka beti ika dakaxankanai? ¿Min nukun xanen ibu daka ikunkainxanai?— akaya ¹¹jawen betsabun danain jaki sinataibun jakia jawen epan besti José jancha jakimama shinanxunkubainikiaki.

Jawen betsabun José peiwen nawa betsabu inanibukiaki, na janchadan

¹²Janua betsatian jatun epan chaxuwan pimanun ika basi pepa benai Siquem anu José betsabu bushianbun ¹³janua chipu jau José jatu uintanun Israelin yunukin:

—Siquem anu min betsabun nukun inabu pimai bushianbuki. Jatu uintanwen, jani jaskakanimenkainan— aka

—Peki. Jaskakenan, en jatu uin kaii— ikaya

¹⁴—Min betsabu inun nukun inabudan, ¿jaskadamenkain? Jatu uintanwen, juxun ea banabimayuxunan— iwanan, jaska janu Hebrón napanpa anuxun José yunua kai Siquem anu José jikitan ¹⁵jatu benakubauni jamakidi benui kaya juni betsa jaki nukuxun yukakin:

—¿Min jawa benakubaunai?— aka ¹⁶kemakin:

—En betsabu en benai ikaii. ¿Min jatu uinshinamen, janixun inabu pimakanimenkainan? Ea yuiwe— aka ¹⁷yuikin:

—Ma nenu ibainshinabuki. “Dotánkidi bunankanwen”, ikaibu en ninkashinaki— aka

jawen betsabu chibain Dotánkidi jatuki nukui kaya ¹⁸José jatuki kemadiama José chai juai jawen betsabun bechitan:

—¿Jaska watan nun tenain?— ika yubakatan ¹⁹⁻²⁰jatun shinan tibiwen yuinametan:

—Tua juaii, uxa namatan nukuki chanimisdan. Tenantan kini medan putanankanwen. Jawen epa yuikin: “Yuinaka piananbun José pishianki”, nun aki buxanunbunan. Januxun jawen nama nuku yuimis jaskaxanimenkain, nun uinxanunbunan— ikaibun ²¹⁻²²Rubénen jaskaibu jatu ninkatan José jatu nemaxunun, iwanan, yuikin:

—Tenankin jimi chakawama nenu na tsua jiweabumanu ua na kini medan putanankanwen, deteamadan— jaskatan José detepaiaibu jatu nemakin chipu jawen epanu iyuxunkatsi Rubénen jaska shinanikiaki.

²³Janua jawen betsabuki José nukutushiai jawa jancha wama achixun jawen tadi chaipa jawendua pekantan ²⁴kini keyatapa metu anu putabu ²⁵jawen betsa Rubén paxkakainken jawen betsabu pi manixun uinkin Ismael nawabun camellowen xeni ininipa jawen iti inun jawen puxati dau Egipto anu jatu inantanun ika Galaad anua beaibu jatu bechitan ²⁶⁻²⁷Judán jawen betsabu yuikin:

—José jamen detetanan, nun jawa bitidumaki. Jaskakenan ua Ismael nawa beaibu jatu inantan pei binankanwen, jau dayadu esclavo wabaintanunbunan. Josédan, nukun jimiwen taexun tenanyamanankanwen— iki yubakai maniabun ²⁸Ismael nawa xukua betsa mabu inanananmisbu Madián nawabu bei jatuki nukuaibun jatube janchatan kini medanua José metsunxun kainmabidan jatu inankin ²⁰pei jexe juxupa plata ewapa kadujaidawen taexun José jatu inanbu Egipto anu iyui buaibun

²⁹Rubén jatu dapaxkabaintani ana kini anu kemaxun uian José jayamaken nuijaidai juinti nishmajaidatan jawen beyawen taexun jawen tadi ushnitan ³⁰jawen betsabu anu kaxun jatu yuikin:

—José kini medan man putadan, ana jayamaki. ¿Man jaska waxumen? Jaskawen taea ¿eadan, jaskaxanpa?— jatu wa jaska wakanxu Rubén yuitan ³¹⁻³²januxun jatun epa jawen bepadankatsi chaxuwan bene pishta tesentan Josén tadi jawen jimiwen idumawatan jawaida nexebain jatun epanu buxun padankin yuikin:

—Na tadi nun bechishinaki, janu tsua jiweabuma anuadan. ¿Jabia min baken tadimenkain? Uinwen— akabu ³³uinkin unantan Jacobun yuikin:

—En bakenaki. Yuinaka piananbun pikin en bake José ea daki pianshinabuki— itan ³⁴juinti nishmajaidatan jawen tadi ushnitan pekaxun nishi tadi tima bexa sawea uxa ichapa jawen bakewen nuichakayamai kaxajaidaya ³⁵jawen juni bakebu dasibi inun jawen ainbu bakebu dasibitun nesewapaiaibu jatu ninkama yuikin:

—Ea nemakin nesewayamakanwen. En bake Joséwen nui sain isi en jaki nukui mawadiaidan— ika kaxa jeneyuama inikiaki.

³⁶Jabiatiandi Madián nawabu, jabias Ismael nawabudan, José iyui Egipto anu jikishinxun peiwen taexun jabundi pei bikatsi José Potifar inanibukiaki, jau jawen tsuma wakin esclavo wanunan. Egipto nawa xanen ibujaida Faraónen jiwe ewapa jawendua anua detenamenikabu xuku betsa mekemis Potifar jatun xanen ibu inikiaki.

**Jacobun juni bake Judá inun jawen babawan
Tamar eskanibukiaki, na janchadan**

38 ¹Ja jaskaitian Judán jawen betsabu jenebaini Adulam mae anu ka juni betsa Hirá anu jiwetushimaxun ²jadixun Canaán nawa juni betsa Súan ainbu bake bechipaikin bikin ainwantan ³bake bawa juni bake kainxuntan jawen ewan kenakin: “Erki”, akimaken ⁴ana bake bawa ana juni bake kainxundiatan jawen ewan ana kenakin: “Onánki”, adiaimaken ⁵Quezib anuxun ana bake bawa ana juni bake kainxuntan kenakin: “Seláki”, anikiaki.

⁶Judán bake iyua Er ewaken jawen epan ainbu betsa Tamar iwexun ainwanma ⁷Erin Diosun yunua chibanma jamebi jawen shinanen jiwe chakaiwen taea Jehová Diosun bechipaiaama tenanken ⁸januxun jawen juni bake betsa Onán Judán yuikin:

—Min betsa mawaimawen taexun nukun beya chibankin mian juni bake min betsa min bawaxuntiduki. Min betsan ain bitan juni bake bawaxunxanwen, min ja dabia jawenabu keyuama jau ipakexanunbunan— aka ⁹Onánen shinankin:

—En juni bakebu bawaxuna ena itidumaki— ikin jawen juchi bake bawaxunkatsi ikama jawen betsan ain Tamar ainwanbi axun chutabiakin juda juaya tsekaxun chakawakubainaya ¹⁰jaskai Onán jawen betsa debuima bake waxunkatsi ikama jaki dakekunkainaiwen taexun Jehová Diosun bechipaia majaida jadi tenanikiaki. ¹¹Ja jaskaimabun Judán shinankin:

—Selá en bake maxku Tamar janubi en ana ainwanma jawen betsabu keskai ana mawadiatiduki— ixun padankin Tamar yuikin:

—Min epan jiweanu kaxun en bake maxku Selá jau ewayunun beneuma jiwexun manayutanwen. En bake maxku Selá ewaya en mia inan min benewaxanaidan— aka jawen jancha ninkatan Tamar ka jawen epan jiwe anuxun manai jiweyuken ¹²jaska wa kayamaken Súan ainbu bake Judán ain bini ma mawaken Judá kaxai nesetan jawen chaxuwan dani mextei kanun ika Timnat anu jawen jaibu Adulam nawa Hirábe yubakaken ¹³bebunkidi ninkatan tsuanda Tamar yuikin:

—Uian, min kuka Judán Timnat anu jawen chaxuwan dani mextei kaikiaki— ixun yuia ¹⁴januxun ninkatan Tamarin shinankin:

—Selá ma ewabiaken en kuka Judán en benewanun ea ja bimama itiduki— itan jawen bene mawaima unanti jawen bachi pekatan bachi betsa sawekin bachi tuax betsawen mayabukutan betsawendi debepukutan jawaida jawen kuka kaikidi binukain Enaim mae jikiti xui anu Timnatkidi bai ka kexanu tsauxun manaya ¹⁵ Judá jawen jaibu Hirábe kakin ja ainbu jininipa chutamisbu keska debepukua tsaua uin:

—Ja ainbudan, mawa chutati pedukain— ikain shinanbain ¹⁶ jaki nukuxun jawen babawanma dabanen unanma jabe yubakakin yuikin:

—¿Min ea chutamatidumen?— aka

—¿Ea chutakatsidan, jawa min ea inantidumen?— aka

¹⁷—En inabu anua chaxuwan bake en mia bematiduki— aka

—Min ea yunudiamadan, ¿jawa unanti min ea bashixunai?— aka

¹⁸—¿Jawa unanti mia bashixunpa?— aka

—Min jawen unantiwamis sello teutiya inun min mestenti keneya min tsumamis ea bashixunyuwe— aka ja ea akin yuiyai inantan chutatan unanma bake bawatan kaken ¹⁹ jaska wabainaya benikaini kaxun jawen bachi tuax debepukukaina pekatan ana jawen bene mawaima unanti bachi ana sawetan jawen epan jiwe anu kaken

²⁰—Ja ainbun en mabu ea bian en jushianki. Jau ea inanun ea mebinxunkin chaxuwan bake buxuntanwen— iwanan, Judán jawen jaibu yunua ja mae anu ka ainbuki nukuama ²¹ Enaim mae anua junibu jatu yukakin:

—¿Na mae Enaim anua ainbu bai kexa tsaua chutamisbudan, jani kamen?— jatu wa kemakin:

—Nenu ainbu chutanamemisbudan, jayamaki— akabu ²² janua ana chintunkain Judá jawen jaibun yuikin:

—Ainbudan, en jaki nukuama itanaii. Jabianuxundi junibun ea yuikin: “Nenu ainbu chutanamemisbudan, jayamaki”, akin ea yuikanxuki— aka ²³ Judán yuikin:

—Chaxuwan bake en yunubia min jaki nukuama ixuki. Jau jabiaskanunwen, en mabu bishianyanaan, ana kaxun nun jatu yukabauna nuku kaxe watidubukidan. Mebinun ixun ja ainbu benayamananwen— akima ²⁴ janua 3 uxe kaken januxun betsabu bexun jaki chanikin Judá yuikin:

—Min babawan Tamar atiai chutanameima ma tuyaimaken chanikanikiki— akabu ninkatan sinatakin Judán yuikin:

—¿Jawakin ea jaska washinamen? Achixun kuakin tenantankanwen— jatu wa ²⁵ buxun jawen babawan achiabu jatu nemakin yuikin:

—Ja dukun jatun ea akima jawen unanti en jayaki. En kuka Judá uinmatankanwen. Ea yuixunkin: “Eska en jayaki, min jawen ea unanti watidudan, jawen mabudan. Na jawen unantiwamis sello teutiya inun jawen mestenti keneya tsumamis ea bashixunima tsuanada ibuan unantiduki, jatun ea akimadan”, ea axuntankanwen— jatu wa ²⁶ janua

jawen mabu buxun jawen jancha yuixunkin jawen unanti mabu buxuanbu uintan dakekin Judán yuikin:

—En bake Selá en Tamar bimamawen taexun ean en chakabuwaitaki. Jaskawen taexun en babawan Tamarin ea padainmaxun jatun pekainmaikiki— jatu wa menupananbun jatu nemaimaxun ana jabe jiwekin meama inikiaki.

²⁷⁻²⁸ Jaska waima jawen bake janu kaiaintian juni bake tsupibu dabe kainkatsi iki isin kaiin bake betsa ja dukun jawen meken dukun taxnima bake jatun kainmaitun ja dukun unantiwakatsi yumen tashipa menexkin yuikin:

—Na dukun kainwanxuki— atan ²⁹ jaska wabia janua ana mexekiken ja dukun ikama jawen betsa dukun taxniaya bakeishta jancha wakin:

—¡Jabaa! ¿Jaskai mian min betsa maemai dainbidan min taxniai?— aka jaskaxuwen taexun jawen ewan kenakin: “Fareski”, atan ³⁰ janua jawen betsa ja kachu taxnia yumen tashipaya menexekeya kaian kenakin: “Zérahki”, anikiaki.

Josékidi Potifarin ain chanichakanikiaki, na janchadan

39 ¹ Ismael nawabun José bibainkin Egipto anu iyuabu Egipto nawa Potifarin peiwen taexun jawen dayadu esclavo wakin José binikiaki. Egipto nawa xanen ibujaida Faraónen jiwe ewapa jawendua anu mekenikabu yunumis jatun xanen ibu Potifar jatun capitán inikiaki. ² José jawen tsuma Potifarin jiwe anu dayaxunaya Jehová medabewaya José jawama pe dayakunkainikiaki. ³ José dayai Jehová Diosun medabewakin pepawamaya jawen tsumapan chanima kaneama uin ⁴ jawen shinan chankankin jawen tsumapan José bechipaijaidakin duawakin jaki chiti ikatsi dasibi jawen tsumabu inun jawen jiwe anuadi mekexunika wakin jawen bai inun jawen inabu uinika wakin katunikiaki. ⁵ Januxun José jaska yunuimawen taexun Jehová Diosun Potifar duawakin dasibi jawen jiwe anua inun jawen bai anua pepawakin medabewakubainaya ⁶ jawen xanen ibu Potifarin jawen tsumabu betsa ana yunuama José bestitun jau jatu uinun yunuima jawada jayawen ana nuikin shinanma jawen pitiwen besti nuikunkainikiaki, ana jawa meama jiweadan.

José jawenduawen taexun dasibibun uinkin bechipaiaibun ⁷ betsatian jawen tsumapan ainen José jawendua uinkin jawen kemui bechipaikin chutamakatsi ikin yuikin:

—En mia bechipaiaii. ¿Mibe janchapa?— aka

⁸⁻⁹ José nemanin:

—Miwem kemukin en mia meamaki. Uian, ea uinika waxun en tsumapan jawen jiwe inun jawen bai ea yunuimaki, jawena dasibi en meke pewaxununan. Nenu ea inun en tsuma nun jabias keskaki. Jawena dasibi yaushiana ea mekemakin ea yunuyuimaki. Jakia mia

besti ea yunuamaki, min jawen ainan. Jaskai eiskauan emebi chakabui en daketapatidumaki, Dioskidi chakabuidan— aka ¹⁰jakia Josén ainbu jaska wabia jawen jancha ninkama jaki patapakin chutamanun ixun jawenchains xaba tibi bikawakubainbia jawa meama ikunkainaya ¹¹xaba betsatian jiwe medan janu tsua jayamaken José dayanun ika jikiaya ¹²jawen tsumapan ainen José jawen tadi chaipa saweawen tsumaxun yuikin:

—Natian en mia chutamakatsis ikaii. Ea chutawe— abia mekatsi ikama jawen tsuma datei kainkainkin jawen meken anu jawen tadi jenexunbaini taxnikainaya

¹³jawen tadi tsuma jenexunbaini ainbu naxuku paepakin ¹⁴⁻¹⁵jawen tsuma betsabu jemaintin anu dayadubu kenaxun jatu yuikin:

—Uinkanwen. En benen Hebreo nawa bikin dayadu esclavo waimatun ea dakewakin nukuki jatu kaxemaikiki. Ea chutanun ika jikikain jawen tadi pekaya en bis ichakayamaya datekin jawen tadi beama kainkidanxuki— jatu watan ¹⁶⁻¹⁷janua Josén tadi adua ibaikin jawen bene Potifar juai yuikin:

—Ja Hebreo nawa min peiwen bimatunan, ea chutanun ika en dintu medan jikiaya ebe jikikain ea mepaia ¹⁸⁻¹⁹datei en bis bis ikaya datekin jawen tadi benubidani jawaida kushikidanxuki— aka jawen ainin jancha ninkatan Joséki Potifar sinata chakayamakin ²⁰achixun bichiti jiwe anu jatu bichimaken Egipto xanen ibujaida Faraónen yunua axuanma kaneaibu jatu bichimisbu anu José jatube bichiti jiwe medan jiweyuken ²¹januxundi Jehová Diosun José ana medabewakin duawakin bichiti jiwe xanen ibu José pe uinmakin bechipaimaya ²²bichiti jiwe xanenibun José katukin jau medabewanun yunutan jaska washina ja jabe bichiabu dasibibu mekekin Joséni jatu yunuxunkubainikiaki. ²³Jehová Diosun José medabewakin jamapai Joséni jaska wakin pepawakubainwen taea bichiti jiwe xanen ibu jawen dayawen ana jawen nuiama jaki chiti ikunkainikiaki.

Juni dabetun nama Josén jatu unanxunikiaki, na janchadan

40 ¹Ana betsatian jatun xanen ibu uva vino dau jayamenkain ixun juxkexun metan peken amamis xanen ibu inun, betsadi misi wamis xanen ibudi ja dabetun jatun xanen ibujaida Faraón dayai pexunama ²⁻³jaskaiibun ja dabeki xanen ibu Faraón jatuki sinatakin bichiti jiwe capitánen jiwe janu jatu bichimis anu jatu yunua jatu bichimabu anudi José bichidiaimabu anu ⁴bichiti jiwe xanenibun jau Joséni jatu mekekubainun yunuima jatu medabewakubainaya xaba ichapa kaya

⁵janua vino juxkexun mexunmis xanen ibu inun misi wamis xanen ibu meshu medan ja dabe uxa namakin ja dabetun nama betsa dabe uinshinaya ⁶penaya José jikixun ja dabe shinan chankanma punu nukabu jatu uinkin ⁷yukakin:

—¿Jaskai man pes punu nukamen?— jatu wa
 8ja dabetun yuikin:

—Nun uxa namachakashinai shinain tsuan nuku unanxunkin xabakabi nuku yuitima nun tsaua ikaii— akabu

—Man namashinaidan, Diosun matu unanmatiduki. Jani man namashinai ea yuikanwen, ninkanunan— jatu wa 9-11ja dukun uva vino juxkexun mexunmis xanen ibun José yuikin:

—Ea en namashinaidan, mia yuinun ea ninkawe. Ea bebun uva taxu nishi ewashinaki. 3 mebi teshpa tibiki jawen jua tuei uva taxu nishi peketan ja jua anua jawen bimi ewai jushiain xanen ibujaida Faraónen kenchu tsumaxun bimi tsekatan kenchaki tsinixun en tsuma en inan akai uxa jaska namakin en uinshini ikaii— aka 12-15 Josén ja dukun yuikin:

—Ja 3 mebi teshpadan, 3 xabaki. Ja 3 xaba kaya min xanen ibu Faraónen na bichiti jiwe medanua mia kainmatan ana jawendi chintunwankin min ana xanen ibunun mia yunuxanikiki. Jawen uva vino ana juxkexuntan min ana mexunxanaai, uatian min axunkubainmis keska wakinan— atan —Faraónen mia ana bechipaiaya ekidi shinankin ewen nuikin xanen ibujaida Faraón ekidi ea yuixuindaxanwen, nenua jau eadi kainmadiaxanunan. Eadan, en nawa betsaki, Hebreodan. Enabun mai pakea anua ea june iwenixun en jawa chakabuwamabiaken ea jamen bichiyamabuki— akaya

16-17misi wamis xanen ibun Josén jaska wai ninkatan pewai jawen janca bechipaikin José yuikin:

—Enadi en uxa namakin uinshinai mia yuidianun— atan —3 chichan ewapaki misi betsa betsapa mata matsaumekidan en Faraón bexuanyan jabiatiani ja misi peiyabu bexun piaibun jaska uxa namakin en uinshinaii— aka 18-19 Josén jadi yuikin:

—Ja 3 chichan ewapadan, 3 xabaki. Ja 3 xaba kaya Faraónen min dayakidi ana shinantan mia danankin bechipaiama jatu yunua min yuda jiki tenextan mia duntanbu min mawa peiyabu bexun min nami mia pikin keyuxankanikiki— jatu wakin yuishinken

20-22ma 3 xaba kaya Faraónen baditian jawen tsumabu dasibi ichawatan nawamakin ja vino juxkexuntan mexunmis xanen ibu inun misi wamis xanen ibu bichiti jiwe anua kainmaxun Josén yuishina keska vino mexunmis xanen ibu Faraónen ana xanen ibu wa ana Faraón vino juxkexuntan mexuni ana xanen ibuaya janua Faraónen ja junin misi wamis xanen ibu jatu tenanmakin tenexmatan jatu duntanmanikiaki. 23 Jakia jaskaitian vino juxkexuntan mexunmis xanen ibun jaska Josén yuishina ana shinanma jakidi jakimanikiaki.

**Xanen ibujaida Faraón namakin uinshina Josén
 xabakabi unanmanikiaki, na janchadan**

41 1Badi dabe binukainaya janua Faraón uxa namakin Nilo jene kexa ka ja mesti nixun uianyan 27 ina awa xua jawenduajaida

jene medanua nexekebidan basi piaibun ³janua ja kachu jabiatidi ina awa atimapa imanajaida nexekediabidan ja xuabuki dasitan ⁴imanajaidabun ja xuadanwan jatu pikin keyuai Faraónen uinkubidan bestentan ⁵shinanshini ana uxa namakin uianyan ⁷xe kiwan jawen xai bestichaiki ewai jawen bimi ewapabui mexkan dakaken ⁶⁻⁷janua chipu xai betsa jabiatidi estekidia niwe ichapa bekin xana waya kainbidan jawen bimi xepan bimi ewapabu xeakin keyuaibun uinkubidan Faraón ana bestentan shinain: “Jaskakenan, en nama besti ikaii”, ibiatan ⁸penaya Faraón juinti nishma punu nuka jas shinanjaidakin Egipto anua jawen juni mukayabu dasibi inun juni unanepabu dasibi jatu kena bea ichabu uxa namakin uinshinai Faraónen jatu yuia tsuan jawa unanma jawen nama xabakabi yuikin unanmatidubumajaida inibukiaki. ⁹⁻¹³Januxun vino juxkexuntan mexunmis xanen ibun atimas Josékidi shinantan Faraón yuikin:

—En chakabuwen taexun min nuku aka en uinyama ja shinankin en mia yuiiai. Min tsumabuki sinatakin ea inun misi wanika xanen ibu nuku dabe mekenika capitánen jiwe anu min jatu nuku yunua nuku bichimabu ea inun misi wanika xanen ibudan, xaba betsatian jabias meshu medan uxa namakin nukun nama betsa tibi uinshinkin jawen shinan nun unanma xanen ibun mekenika dayadu esclavo Hebreo nawa bedunantun nukun nama tibi nun yuikin nukun nama tibi xabakabi yuikin nuku unanmashinken xaba dabe inun besti kaya jabias kadi Hebreo nawan nuku yuishina keska wakin min ana ea chintunwanyamaki, en namayama keska wakinan. Ja inun, misi wanika xanen ibu min jatu tenexmayamaki, jaska jawen nama yuiyama keska wakinan— aka

¹⁴jaska wa ninkatan Faraónen jawaida bichiti jiwe anu jatu yunua buxun José kainmabidan Faraón anu iyukatsi maxtekin kexniyabi maweden akin pewatan tadi bena sawematan Faraón anu uinmakin ja bebun iyuabu ¹⁵Faraónen José yuikin:

—En uxa namashinai en jatu yuka tsuan ea xabakabi yuitidubumaki. Mianan, namabu min jatu unantan yuitidukiaki. ¿Chanimamen?— aka ¹⁶Josén kemakin:

—Peki, jaska min ea yuiaidan. Emebi en unanmatidumaki. Jakia min nukun xanen ibujaida en mia yuinun en mekenika Dios kushipa dasibi binuatun ea unanma en miki chanitiduki, ewen taexun jau mia medabewanunan. Min jaskada uin namashini ikimenkain ea yuiwe— aka

¹⁷⁻²⁴—En uxa en namashinaidan, en eska shinaiin. Nilo jene kexa ka nixun en uianyan ⁷ina awa xua jawenduajaida jene medanua nexekebidan basi piaibun janua chipu jabiatidi jaska Egipto anua awa en uinsma atimapa imanajaida mapekediabidan ja ina awa xuajaida pikin keyubiatan jawa ana xuama dasibi jabiaskas imana atimapa mapuabu uinkubidan en bestean ishin janua ana uxakain ana nama betsa uinkin eska en uinshinaii. ⁷xe kiwan jawen xai bestichaiki ewai jawen bimi

ewapabu jawendua mexkan dakaken janua chipu xai betsa jabiatidi estekidia niwe ichapa bekin xana waya kainbidan jawen bimi xepan bimi ewapabu xeakin keyuaibun bestentan bika tenekin penaya juni mukayabu en jatu kena beabu en namashinai en jatuki chanibia tsuan taska unankin xabakabi ea yui pewabuma en iki ikai— aka

²⁵ninkatan Josén jawen xanen ibujaida Faraón kemakin yuikin:

—Ja nama dabe min uinshinaidan, jabias nama min uin ishiain. Eska min uin ishiain mia xabakabi yuinun ninkawe. Min mai pakea jidabi anua eska Dios kushipajaida dasibi binuatun mia axunkatsi mia unanmanun ika ishinkiki. Ninkawe, mia yuinunan. ²⁶Ja 7 ina awa xua jawenduadan, 7 badiki. Ja 7 xekiwan taxu ewapabudan, jabias badidiki. Ja nama dabedan, jabias namaki. ²⁷Jamen ja 7 ina awa atimapa imanadan, uatian 7 badi idixankanikiki. Jabiaskadi ja 7 xekiwan niwe estekidia bekin xana wadan, 7 badidiki. Ja badi jaskaitian 7 año piti beneamaken minabun buni tenekubainxankanikiki. ²⁸Na namapan mia uinma shinainan, jaska miki chanishinaki. Dios kushipajaida dasibi binuatun jaska uatian kainmaxanai min xanen ibuken mia unanmashina xabakabi en mia yuiaii. ²⁹Januxun mia xabakabi eska waxanikiki, mia yuinun ninkawe. Na Egipto mai pakea jidabi 7 año xekiwan midima jamen iyuxanikiki. ³⁰Janua 7 año kaken ana piti beneama buni paepa tenexankanikiki, dasibibun yunu keyukunkainidan. ³¹Jaska jiwekin jawa piti jayama buni tene chakayamaibuwen taexun ja 7 año jaskaitian man jiwexun xekiwan ichapawaxun pikubaini man ana shinanma ixanaii, bunidan. ³²Januxun Dios kushipajaida dasibi binuatun jaska wakatsis ikin mia uinmashina samama taewaxanaiwen taea mia dabeki namapan uinmashinaki. Uindawe.

³³—Na jabiatian min nukun xanen ibujaidawen taexun menan juni betsa unanepa anika benabaunkin bechitan yunudiwe, jau min mai pakea jidabi anu piti mekekin bebunkidi mia pewaxunkubainunan. ³⁴⁻³⁵Nukun xanen ibu Faraóneen, ja juni katutan min eska watiduki, mia yuinun. Xanen ibu bexmas tibidi katutan jatu yunuwe, mai pakea jidabi piti dayaibu tibi anua jau uinbaununbunan. Ja 7 año xekiwan bimichakayamaitian xekiwan xemekin ichawakin 5 maspuaibu tibi anua uinbaunkin bestichai tibi mina mia waxuntidubuki. Januxun mia aduxunkin janu piti meketi jiwe mia waxuntan ja medan ja xekiwan ikai bipakekin jau mia jatu mekemaxunkubainxanunbunwen, minabun pixanaidan. ³⁶Min jatu jaska wamaken Egipto anua ja 7 año yudabun buni tenechakayamaibutian unanepakin min bebunkidi jatu adumaimawen taea minabun ja piti pi mawama jiwexankanikiki— aka

José Egipto anua xanen ibu ja kachu yununika inikiaki, na janchadan

³⁷jaska wakin Josén jatu yuia Faraónen jawen xanen ibu bexmas yununikabubetan ninka pewatan ³⁸Faraónen jatu yuikin:

—Na juni keskadan, ¿jania jaska juni nun jaki nukutidumen, Diosun yushin jayadan?— jatu atan ³⁹José yuikin:

—Tsua mia keska unanepa jayamaki, Diosun dasibi unanmakin yuimamisan. ⁴⁰⁻⁴¹Jaskawen taexun Egipto mai pakea jidabi anuxun jabia mia en mia katuaii. Min en yunua akai enabun mia ninkatan en jiwe ewapa jawendua anu inun en mai pakea dasibi anuxun mia uinkin jau dasibibun min yunua chibankubainxanunbunwen, jamen eadan, en xanen ibujaida bestikidan, mia binuadan— atan

⁴²Januxun Faraón xanen ibujaidatun jatun besuubi jawen meichikiti metseketan José sawematan januxun jawen tsumabu yunukin jau tadi pe jawendua chaxa chaxa ikai sawemakin inun oro teuti teumakin jatu jawendua wamatan ⁴³Faraónen jatu jaska wamatan jatu yuikin:

—Ja caballo tadanti dabe en jaya ja jawendua bexmas en José ibuwamaii. Chipu jawena ixanikiki. Jaskaken na jabiatian jau uin taewabaunun en matu yunuaii. Man jaska taewamabaintanunbun ea ninkakanwen. José jawen tadantiki nia kaya bebun kushibainkin jui kushipawen jancha wakin yuda mapuabu jatu yuibainkin: “Bai tapinxunbaini ja kai bebun danti ixunbainkanwen, jau jadi kanunan. Jatu akubauntankanwen”— jatu wa jaska jatu yunua ninkatan José imabaunabu dasibi Egipto mai pakea anu xanen ibui taekin uinkubaunikiaki.

⁴⁴Jaskakauntani chintunkidanaya Faraónen José yuikin:

—Mia min jaskabia eadan, en xanen ibujaida Faraón bestiki. Jaskawen taexun jau mia chibankin kaneyamanunbun enabu jatu yunupakexanwen, Egipto jidabi anuabudan, min jatu yunuama tsuan jawa watidumakidan— atan

⁴⁵Egipto janchawen José kena benawakin: “Safenat-panéahki”, anikiaki, nukun janchawen yuiadan: “Dios Jiweatun Janchamamiski”, akin kenakinan. Jaska watan Egipto maewan betsa jawen kena On anuxun jatun mekenika dios jawenabu yukaxunmis Potiferan ainbu bake Asenat José bimakin ainwanmama jaskai José xanen ibukin Egipto mai pakea uinkubaini jiwekunkainikiaki.

⁴⁶Ja José jaskaidan, 30 badiya Egipto xanen ibujaida Faraón anu iyuabu xanen ibu washina januxun José Faraón yuikin: “Jaska min ea yunushinadan, natian mia taewaxunkin en ma aki kai, dasibi Egipto uinun ikadan”, ikaini ⁴⁷janua ja jaska chanima 7 año xekiwan midima jamen ikaya ⁴⁸7 año jatun mae tibi anu xekiwan dayai taekin ichawaibu anu José tsumabu buxun jatun mae anu xekiwan ichawakin año tibi manchin betsa bikubainkin januxun mae ewapa betsa betsapa anudi xekiwan jabiadi aduti jiwe medan ichawadiakin jatu mekemakeake mekekubainaibun ⁴⁹jati xekiwan ichawaibu tsuan jati tanatiduma mashiti keska adukin jatida adutan José ana tanatiduma jenenikiaki.

⁵⁰Janua buni tekidiamatian Josén juni bake dabe wanikiaki, jawen ain Asenatkidan. ⁵¹Ja dukun bakewaima kaian Josén yuikin: “En epa jakimai inun, jawenabu jakimai inun, jaska bika betsa betsapa en binukubidanshina Diosun ea jakimawaimawen taea en baken kenadan, Manasésiki”, akima ⁵²januxun ja kachu jawen bake kaian, shinankin yuikin: “Nenuxun ea ichakawabianibu anuxun Diosun ea pawaiwen taea en baken kenadan, Efraínki”, anikiaki.

⁵³Ma 7 año ka yunu midima jamen ishian Egipto anua binukainkidanaya ⁵⁴janua jaska Josén yuini keskai 7 año buni pakei taeaibun mai pakea betsa betsapa tibi jiwebaunabu buniaibun jakia Egipto anu besti piti adu jayaken ⁵⁵janua Egipto nawabudi buni taebaunkin jatiditun Faraón xekiwan adu yukabu xanen ibujaida Faraónen jawenabu dasibi jatu yuikin:

—Ea yukama José anu buxun jaska matu yunuai keska jabe janchakin yukatankanwen— jatu wa ⁵⁶⁻⁵⁷jatu jaska waimaken mae betsa betsapa anu buni pabauni pikuaya januxun Josén jawen piti aduti jiwe anua Egipto nawabu xekiwan peiwen jatu inankatsi bepeyan jawen tsumabun jatu inankin taewanibukiaki. Jatu jaska waya buni pikukunkainaya janua mai pakea tibi anuabudi jawa pitima Egipto anu besti piti jaya chaniaibu ninkatan yuda xukua betsa betsapatun janua binun ika José anu bebidan bebidanibukiaki, jatun mae anu jawa piti jayamawen taeadan.

Josén betsabu Egipto anu benibukiaki, na janchadan

42 ¹Jabiatiandi Egipto anu xekiwan jaya yuiaibu Jacobun ninkatan jawa pitima jawen bakebu ichawaxun jatu yuikin: “Nenua man jawawen jiwetimaki. Janua uinanan bestiama nun ja pi jiweyununbun ²Egipto anu xekiwan jaya ea yuaibu en ninkashinaki. Jadi buxun nukun peiwen bidiatankanwen”, jatu wa

³jatun epan jancha ninkatan xekiwan bitanun ika Egipto anu Josén 10 betsabu buaibun ⁴jakia Josén betsa maxku jabe nanea Benjamín jatun epa Jacob yaushikin jatube nichianma yuikin: “En jatuki dateaai. Benjamín jadi ea ichakawantidubuki”, inikiaki.

⁵Canaán mai pakea anudi dasibi bunidiaibube Israelin bakebun xekiwan jatubetan bi budiaibun ⁶José Egipto mai pakea jidabi xanen ibukin jatun besti peiwen taexun xekiwan jatu inanyan jawen betsabundi binun ixun yukai bua jaki nukutan jatun beya chibain José naman beti ikabu ⁷Josén jatu uinkin jawen betsabu jatu unanbiakin unanma itsakin inun jabun Hebreo jancha unanma itsadiakin jatun jancha mae wanikabetan Egipto jancha bestiwen jatube janchakin sinatai keskakin jatu yukakin:

—Matudan, ¿jania man bekanxumen?— jatu wa jabun kemakin:

—Nukudan, nukun mai pakea Canaán anua xekiwan binun ika nun mia anu juxuki— akabu

⁸Josén jatu unanbia jabun José unanbumaken ⁹jaska namani Josén jawen betsabukidi shinantan jatu datekin jatu unanti wakin yuikin:

—Jaskamaki. Man chanichakaii. Jadatuda mae babu nuku detexanun ixun nuku unanti wai man bekanxuki— jatu wa

¹⁰⁻¹¹—Jaskamaki, xanen ibuun. Matun xekiwan peiwen matu bianun ika besti nun juxuki, nun min tsumabudan. Nukudan, nun juni bestichaitun bakebuki. Nun juni pepaki, nun unanti naismadan, juni chakabumadan— abiabu ¹²Josén ana jatu yuikin:

—Man jaskakidi ea yuiaidan, jaskamajaidaki. Jadatuda nun mae babubu nuku detexanun ika nuku unanti wai man bekanxuki— jatu wa ¹³jabundi ana kemakin:

—Nun jaskamajaidaki, nukudan, nun ¹²betsabuki, junibusdan, Canaán anu juni bestichai jiweatun bakebudan. Uian, nukun betsa maxku jawen epa anuki. Jakia betsadan, ma nuku benuxuniki— akabu

¹⁴⁻¹⁶jaska wabiabu Josén ana jatu yuikin:

—Jaska en matu jancha wai keskadan, matudan, man unantinan nikabuki. Jaskakenan, jawen matu unanti wakatsidan, Faraónen kushipawen chanima en matu jancha waii. Nenuadan, man kayuamaki, jau matun betsa maxku man iyutanunbunan. Jaskawen taexun matu bestichai kaxun itanwen. Jakia matudan, na jiwe medan en matu bichiyuai januxun manayukanwen. Jaska chanima kaya man yui ikimenkain matun jancha en matu unanxanunan. Faraón xanen ibu kayabiwen taea matun betsa maxku juamaken man unantinan nikabu en matu unanxanaai— jatu watan

¹⁷ja bichiti jiwe anu jatu dasibi bichishina ma xaba dabe inun besti kaya ¹⁸⁻²⁰Josén ana jatu yuikin:

—Diosun kushipaki en meseaii. Jaska en matu yuiiai keska ikanwen, man jiwenunan, chanima man juni pepamenkain. Matu bestichai bichiti jiwe anu bashikukanwen. Jatidi xekiwanyan bukin jau matunabun pinunbun jatu buxundikanwen. Ana jukinan, matun betsa maxku ea uinmakin iwexankanwen, man jaska wabidanaya matun jancha en ikunwanxanaai. Jamen matun betsa maxku man iweamadan, ana piti biama man mawaxanaai— jatu wa jabun yuikin:

—Min nuku jaska waidan, peki— ikaibun ²¹jancha maewanika ma kaken jabu besti jatun jancha xabakabi yuinamei:

—Nukunan, nukun betsa José nun ichakawaniki. José: “Ea jaska wayamakanwen”, iki nuitapakin nuku jaska wabiaya nun ninkama iniki. Jaskawen taexun ikis nukundi nun bika tenediaai— ikaibun ²²januxun Rubén iyuatun jatu yuikin:

—Uinkanwen. En matu yuibia: “Ja bedunan ichakawayamanankanwen”, en matu wabia man ea ninkama iniki. Uian, José tenanibuwen taexun manakukin nukudi chakabuwakin Diosun nuku bika tenemaikiki— jatu waya

²³jatun Hebreo janchawen jawen betsabu Josén jatu jancha wama jatun jancha maewanikabetan José jawen betsabube janchakin jakia jatun jancha ninkajaidabiaya:

—Nukun jancha ninkamaki— ikaibun ²⁴jatu ninkatan ana jatu jancha wama nui José dabekekain dintu betsa medan jikia kaxai nesetan jatu anu ana jua jancha maewanikan medabewaya ana jatube janchakin Josén Simeón katutan jatu dapaxkamabainai uiainbun Josén Simeón jatu metaux amatan jawen jiwe medan jatu bichimatan ²⁵januxun Egipton janchawen jawen tsumabu yunukin yuikin:

—Jatun saku tibi xekiwan matawaxun june jaki jatun pei nanexun jatu tibi ana inanwen. Ja inun, bukin jau ja pikubaintanunbun pitidi jatu inankanwen— jatu wakin yunua jatu axuanbu ²⁶Jacobun bakebun jatun asnoki xekiwan saku katsauntan bexetan kainbaini bukin ²⁷janu niti itan uxai bu anuxun jatun asno pimakin betsan jawen saku depetan uinkin saku medan jawen pei bechitan ²⁸januxun jawen betsabu yuikin:

—¡Ejee, uian! En pei ea ana nanexuna en bechiadan, en saku medanuadan— jatu wa dasibi datejaidai saki saki iki yuinamei:

—¿Jaskada nuku wai ikimenkain, Diosunan?— ika ²⁹ana bui Canaán anu jatun epa Jacobki nukuxun Egipto anu jaska jatu washianbu ³⁰⁻³⁴chanikin:

—Ja juni Egipto xanen ibudan, nukuki sinatai keskakin yuikin: “Man unantinan nikabuki”, nuku wa: “Nun 12 juni bakebuki, juni bestichaitun nuku bawadan. Canaán anu nukun betsa maxku jawen epabe jiweaki. Betsadan, ma nuku debuwanibuki”, nun aka nuku ana yuikin: “En jancha ninkakanwen. Jaskawen taexun man juni pepabu en matu unanxanaii. Matudan, nenu bestichai bashikuyukanwen. Jakia jatiditun xekiwan buxun matunabu buniaibu pimayutankanwen. Janua matun betsa maxkudan, ea uinmakin iwetanxankanwen. Jaskawen taexun man juni pepabu unanti naisma en matu unanxanaii. Man ja iwei ana juaya matun betsa en jatu metaux amaima en matu taxnimaxunxanaii. En matu jaska waya na mai pakea anu bea jawama man nipakexanaii”, nuku washianki— akin jatun ibu yuiabu ³⁵jakimamadi jatun saku apatan pewakin depetan uian akeakebaunkin jatun pei tibi bechiaibu jatun epa dikabitun uin e iki dasibi datejaidaibun ³⁶jaska uinkin Jacobun shinankin jatu yuikin:

—Ea nuitapawakin man ea bakeuma wai. José yama inun Simeón jayamadiki. Ikis en jawen jenea bake Benjamín iyukatsi man yuixuki. Jaska wakin bakeuma wakin man ea nuitapawa chakayamaii. ¿Jawai ean besti en bika teneai?— ikaya

³⁷Rubénen jawen epa yuikin:

—Egipto anu Benjamín min ebe nichian mia mekexunbaintankin jadidixun en mia ana iwexunxanaii. Jakia en Benjamín

chintunwanmaken jawen taexun ea kupikatsi ikin en juni bake dabe min tenantiduki— aka ³⁸Jacobun yuikin:

—En bakedan, en matube nichianmajaidaki. Jawen betsa José mawaniwen taexun jawen ewan ja besti bitan jaya ea mawaxuniken jaskawen taea matube kai bai namakia yutekakenan, ¿eadan en jaskaxanai? Matun ibu mestebu man ea tenanxanai, nui paewenan— jatu waimaken

Benjamín jawen betsabun Egipto anu iyunibukiaki, na janchadan

43 ¹Canaán mai pakea anua piti keyuima jawa jayamai pikukunkainaya ²Egipto anua xekiwan bitanimabu ma pikin keyuaibu ana jayamaken jatun epa Jacobun ana jatu yunukin:

—Ana buxun xekiwan eskadabes nukun peiwen bitankanwen, nukunadan— jatu waya ³⁻⁵Judán yuikin:

—Jawen kushipawen ja junin nuku nemakin yuikin: “Matun betsa maxku man iweamadan, ea anu ana beyamaxankanwen. Jakia matun betsa maxku iwekin piti man ana biyutiduki”, akin nuku yuimaki. Min nukun betsa maxku nukube yunuama piti bi nun katidumaki. Jakia min nukube nichianyan nun katiduki— aka ⁶Jacobun ana jatu yuikin:

—Ea chakabuwakin ¿jaskakin man jadi yuimamen, ja juni: “Nun betsa maxkuyaki”, akinan?— jatu wa

⁷—Ja junin nuku unanti wakin nukunabukidi nuku yuka chakayamakin yuikin: “¿Matun epadan, jiweamen? ¿Matun betsa ana jayamen?” nuku wa jaska nuku yuka nun banabima bestimaki. Nun daka jaskatan bebunkidi unain nuku jadi yunuaidan: “Matun betsa iwexankanwen”, ikaidan, jamen jaska bebunkidi unantan nuku yukai nukun betsakidi nun jawa yuiama ikeanimaki— akabu

⁸⁻⁹jaska watan Judán jawen epa Israel ana yuikin:

—Jaska shinankin min nuku nichianan, nun jiweyunun ja nukun betsa maxku ebe nichinwen. Ean mekebaini nun jabe jawaida kaintiduki, jau mia inun, nukunabu inun, nukun bakebu man mawayamanunbunan. Benjamín ninkamas mia mebinbain en iyushina en mia chintunwanxuanmakenan, ea axanwen, jawen taexun kupikinan. ¹⁰Min bake nukuki yaushiana jawaida min nuku yunushinadan, nun ma dabeki katani jushian ikeanaai— aka ¹¹⁻¹⁴jatun epan ana jatu yuikin:

—Jaska en matu yunutidumabia en jawawen jaskatimaki. En matu jenexunai ea iyunditankanwen. Matun saku medan matun mabu pepa jamen inanti buxuntankanwen, isin puxati dau inun, buna bata inun, jawen nis wati inun, xeni jene jawen iti inun, tamawan dabe nuez inun almendradan. Ana pei betsa butankanwen. Saku medan matu inainma pei jexedan, jabiadi ana buxuntankanwen. “Min kaneimamenkain. Nukun pei biama min jakimaimamenkain”, atankanwen. Januxun matun

betsa maxku iyukin ja xanen ibu uinmatankanwen. Janua Dios kushipa dasibi binua matuwen nuiaya ja Egipto xanenibun Simeón inun Benjamín eanu ana chintunwanxanimenkain. Man en bake ea mebin keyubaina en bakeuma ixanimenkain. Jaska en shinainan, en jaskayuaidan— jatu wa ¹⁵janua Jacobun bakebun mabu pepa inun pei jatu ana inainma inun ana pei betsabu bukin jatun betsamaxku Benjamín iyui Egipto anu bui jikitan Josén besuudi mapuabu ¹⁶Josén Benjamín jatube nia uinkin jawen jiwe anu dayamisbu mekenika Egipton janchawen yuikin:

—En jiwe anu ja junibu iyuxun ina awa betsadetetan ea bawaxuntanwen, badi manananbi en jatu pimai kaidan— aka ¹⁷Josén yunua chibankin jawen jiwe anu jatu iyuaya ¹⁸jatu jaska wabaina Josén betsabu datekin shinain:

—Tsuanda nukun pei nukun saku medan ana nuku mistuxunimawen taexun nuku iyuxun yuikin: “Man yumetsukainimaki”, nuku akin jawen tsumabu nuku achimaxun nukun asno mebin nuku jawen dayadu esclavo watiduki— ikainkin ¹⁹Josén jiwe anu ma kene beputiki kemaxun Josén jiwe mekenika ²⁰⁻²²yuikin:

—Xanen ibuun, mia yuinun nuku ninkawe. Ja dukun piti nun biwanimatianan, chanima xekiwan nukun peiwen nun bimaki. Janua ana kai bai puchinin uxakin nukun saku depexun ja medanu nuku tibitun pei nun bechimaki. Tsuanda nukun saku medan pei nuku nanexuna nun unanma ikimaki. Jakia saku medanua pei dasibi bechimaxun nun mia ana bexunxuki— akabu ²³jaska wabu Josén jiwe mekenikan jatu yuikin:

—Ea jaska yui jawen dateyamakanwen. Eanan, matun peidan, en matu bixuinmaki. Jaskakenan, matun mekenika yushinen matun epa mekemistun matun saku medan pei matu mistuxunimamenkain— akin jatu jaska watan jawen jiwe mekexunmistun meketi jiwe anua jatun betsabu Simeón jatu kainmaxuntan ²⁴Josén jiwe ewapa anu jatu iyuxun unpax jatu inan juchukiaibun januxun jatun asno jatu pimaxunaya

²⁵—Xanen ibuun jawen jiwetanxun nuku pimaikiki— ikin bebunkidi unantan badi manananbi jabetan pikin ja mabu inankuin inankatsi beshinxun pewabun ²⁶José jikiaya inankuinti mabu buxuanbu ja naman beti ikabu ²⁷Josén jatu yukakin

—¿Man jaska pe juxumen? ¿Jamen matun ibu anibu man ea yuimadan, jadan jaskadamen? ¿Jiwediamen?— jatu wa ²⁸ja naman beti ixun yuikin:

—Min tsuma nukun epadan, pe nuku jiwexunyuaki— akabu ²⁹Josén jatu uinbaunkin jawen betsamaxku Benjamín jabe nanea uinkin jatu yukakin:

—Man ea yuimadan, matun betsamaxkudan, ¿jamen?— itan Benjamín besti yuikin: —¿Min miamen? Atimas en mia uiainan. Jau Diosun mia pepawakubainxanunwen— atan ³⁰jawen betsabu kayabiwen nuijaidai kaxakatsi iki jawaida jawen dintu medan jikikain kaxa chakayamai ³¹nesetan bechuki betekede ikidan jawen besu pekidan jawen tsumabu yunukin:

—Piti nexedikanwen, nun pinunan— jatu wa ³²Josén jatubetan pinun ika jamesti jawen tapu medibi ma pewaxuna inun, jawen betsabuna tapu betsa jaki tsauaibu ma jatu pewaxundia janua Egipto nawabu Josébetan pimisbu tapu betsadi jaya jabun beyawen taexun jabias tapukixuns Egipto nawabu Hebreo nawabubetan pisbuna tapu medibi tibi sedekin paxkaken ³³Josén besuudi jawen tsumabu jatu yunua jawen betsabu tsaunkin iyua dukun ja dapi tsaunxun ja kachu jatun badiwen betsabu tibi tsaundiabainkin jawen jenekin maxku tsaunkin keyuaya e iki keyutan unanxubida jabu besti yuinamei:

—¿Jaskatan iyua inun namakiabu inun maxku unankin nuku jaska waimenkain?— ikaibun ³⁴Josén jatu yunukin jau tapuki piti jatu inanbaununbun jawen tsumabu piti paxkamakin jawen betsabu tibi jatu inanmabaunkin januxun Benjamín besti nexa nexa amakin 5 kenchati piti matajaida wamaxun inan jatubetan pi mabex aki jabu Josébe benimaibun

**Josén jawen jatu unanmakatsi jawen kencha
jatu nanemanikiaki, na janchadan**

44 ¹⁻²Januxun Josén jawen jiwe mekenika xanen ibu yunukin: —Jatun saku tibi xekiwan matawaxun jabiabu tibikidi pei nuku inainbu jatu ana nanexunkin keyutan ja maxkun sakuki jawen peiyabi en plata mane kencha chaxakapa nanexuntanwen— aka jaska Josén yunua jatu nanexunshina ³penamajaida jatun asnoya jatu nichian ⁴⁻⁵mae anua kainbaini chaima buaibun Josén jawen jiwe mekenika xanen ibu ana yunukin:

—Buaibu chibanbain jatuki nukutan jatu yuikin: “Matu pewabia ¿jaskakin en xanen ibun plata mane kencha man yumetsukidanai? Jaki nuxumis inun jawen mukayakin jatu unanmis yumetsunkin man chakabujaidakidanxuki”, akin jaska jatu yuitanwen— aka ⁶chibanbain jatuki nukuxun jaska Josén yuia jabiaskadi jawen jiwe mekenika xanen ibun jatu yuia ⁷⁻⁹jabundi yuikin:

—Xanen ibuun, ¿jaskakin jadi min nuku jancha wai? Nun mia jaska watidumajaidaki, na min yuiyai keskadan. Nukun mae Canaán anua nukun saku medanua pei nun bechima nun ana mia bexunbiashinawen taexun min xanen ibun jiwe anua jawen kencha chaxakapa nun yumetsutidumajaidaki. Nun juni pepabuki— iwanan —Nuku jadatutunda jawen kencha nun yumetsukidanxudan, jatun nun bexu jawen sakukia man bechiadan, jadan, jau mawanunwen. Januxun nuku dasibi nuku dayadu esclavo wabainwen— akabu

¹⁰—Jaska man chaniaidan, en matu akaii. Jadatuda man kencha jayadan, ja besti en esclavo waii. Jamen matu jatididan, chakabuma man unanuma inun butidubuki— jatu wa ¹¹jawaida juni tibitun jabun saku

asno kamakia butetan tsaunxun depexunabu ¹²januxun Josén tsumapan jatu uinanbaunkin iyuatun saku anua dukun benabidankin jatun badi kaini pakea tibiwen tanakin jatu benanbidankin iyuaun saku anua dukun jatu uinankin keyutan januxun atimas maxkujaida Benjamínen saku anu mane kenchá chaxakapa bechitan sananbaunai ¹³jawen betsabun uin juinti metexekechakayamatan juni tibitun jatun tadi ushnitán asno kamaki jatun saku ana duntanxun neabaini ana mae ewapa anu ana chintunkaini bui jikitan ¹⁴Josén jiwe anu Judá inun jawen betsabu ana jikikain José kaindiamaken ja naman sapakain beti ika maniabun ¹⁵Josén jatu yukakin:

—¿Man jaska kainamen? ¿En juni mukaya unanepama dabanen man ea jaska wabainamen? Tsua ea keska jayamaki— jatu wa ¹⁶Judán kemakin:

—Xanen ibujaidatuun, jadakidi nun mia yuitima kaya min nuku waii. Jaska wakin nun jawa yumetsuama ixu jaskatan nukumebi nun petidumaki. Jaskaken nun chakabuwaníwen taexun Diosun nuku unanti waxuki, nuku kupinun ixunan. Min kenchá chaxakapa tsuanda saku anua min tsumapan bechixuwen taexun ja bestima nuku dasibidi min dayadu esclavo nuku wadiwe— aka

¹⁷Josén kemakin:

—En matu jaska wamajaidaki. Ja jatun sakukia kenchá en tsumapan bechixu ja besti en dayadu esclavo en waii. Jamen matudan, unanuma matun epan jiwe anu budikanwen, tsuan matu jawawamakidan— jatu wabia

Judá jawen betsa maxkuwen nui janchaxunikiaki, na janchadan

¹⁸Judá naxukukin Joséki kemaxun jancha mae wanikawen ana yuikin:

—Xanen ibuun, ¿eska nun mibe janchaima june en mia yuiái min ea ninkatidumen, eki sinatamadan? Faraón keska min xanen ibu kushipajaidakidan. ¹⁹Nukube janchai taekin mian nuku yukakin: “¿Man epa jayamen? ¿Man ana betsa jayamen?” akin min nuku yukaimaki. ²⁰Chanima mia yuikin: “Nukun epa inun nukun betsa maxku nun jayaki. Nukun betsa maxku jabias xankinki nanea mawaniken ja mesti jiweaki. Anibubiatun nukun epan nukun betsa maxku bawaniki. Jaskawen taexun nukun epan nukun betsa maxku bechipajaidaikiki”, akin nun mia yuiwanimaki. ²¹Nun mia jaska waiwen taexun: “Matun betsa maxku ea uinmakin eanu iwexankanwen”, akin min nuku yunuimaki. ²²Jakia nukun mia yuikin: “Ja nukun betsa maxkun jawen epa jenetidumaki. Jawen epa jenebaina jawen nui manui mawatiduki”, nun mia aka ²³“Matun betsa maxku nenu man iweamadan, man ana ea uin nenu jutidumaki”, min nuku waimaki. ²⁴Ka nukun epaki nukuxun min jancha nun yuia ²⁵ninkaimaxun nuku yuikin: “Ana piti eskadabes nuku bixuntankanwen”, nuku wa ²⁶“Nun katidumaki. Nukun betsa maxku nun iyuaama ja xanen ibube janchakin piti nun mia bixuntidumaki. Min

jaska shinainan, nukun betsa maxkube nuku nichinwen”, nun wa ²⁷en epan ana nuku yuikin: “En ain juni bake dabe besti ea kainxuni man unaiin. ²⁸Jawen iyua ea kaxuniken en ana uianma ean shinain: ‘Yuinaka piananbun ma ea pianimenkain’, ikin en shinanpakeaii. ²⁹Janua jawen maxkudi man iyua ichakawatidubuki. Jadi ea ichakanwanbun man ana ea iwexunamawen taea manujaidai ja dabewen nuikunkaini en mawaxanaii, matuwen taeadan”, nuku akimaki. ³⁰⁻³²Jaska bebunkidi jaska wakín en epa ean yuikin: “Min bake Benjamín en ana iweama en ea chakabu ixanaii, niti ikamadan”, akin en yubashinaki. Jawen bake nun ana iyuxunama nukun epa anu nun kaken unain nukun epa chanima mawaxanikiki, jawen bake ja bechipaijaidakin putaisma manuidan. Jaska wakín en epa en tenantiduki, juinti nishmajaidawenan. ³³Jaskawen taexun en betsa maxkuwen taeadan, ea awe, jawen xantukun bashikin dayadu esclavo wakinan. Janua en betsa maxku jawen betsabube ea yunuxunwen, jau jatube katanunan. ³⁴En betsa maxku jawen epa anu kamaken ja bestí en bashitidumaki, en epa nuitapajaidai en uinkatsi ikamaki— anikiaki, jancha mae wanikawen jancha wakinan.

Josén jawen betsabu unanmanikiaki, na janchadan

45 ¹José nui paewen kaxakatsis ichakayamai tenetiduma ja bebun mapuabu jawen tsumabu Egipton jancha kushipawen jatu yunukin: —¡Nenuadan, kainyubaintankanwen!— jatu wa dasibi taxniyubainabun jawen tsumabu jayamaken Josén jawen betsabu unanmanun itan ²jatuya kaxa bedukukaun kaxa chakayamaya jawen tsumabun ninkakin jatu yuibaunabu dasibi Egipto nawabun ninka keyuaibun ja kaka Faraónen jiwe anuxun ninkadiaibun ³Josén jawen betsabu xabakabi jatu unanmakin jabun janchawen jatu jancha wakín: —Eadan, en Joséki. ¿En epa jiweyuamen?— jatu waya jabun ichakawanibuwen taea jaki datechakayamai juinti metexekechakayamatan jawa yuiama jaxpa ja dapi mapuabun ⁴januxun jatu daewakin yuikin:

—Dateama nedi bekanwen— jatu wa beabu Josén ana jatu yuikin:

—Eadan, en matun betsa Joséki, ja man ea ichakawakin Egipto anu jau ea iyununbun peiwen man ea jatu inanidan. ⁵Eskaki, matu yuinun ninkakanwen. Man ea jaska waniwen taexun bebunkidi Diosun matu ea mekemakatsi jatun ea yunuai itsawakin matu ea amaniki, en matu jiwemaxanunan. Jaskawen taea bika tenebauni ibubis sinatanameyamakanwen, man ma ea jatun esclavo dayadu wamabianiwen taeadan. ⁶Na buni pakeimadan, ma 2 año keyuaki. Jaskabia 5 año dayakin man piti banabia jawa beneamaken jania man tsekatiduma iyukunkainxanikiki, buni pikuidan. ⁷Na mai pakea anu jiweyuxun jati texenixun nukun bababu nun pa waxanun bebunkidi jaska Diosun unankin

ea matu yunumakin itsawaniki, en matun jiwea medabewaxanunan, jaska nun shinantidumajaidabiakenan. ⁸Ea jaska wakinan, matun man ea akamaki, na mae anu nichinkinan. Jaska wakinan, nukun mekenika Diosun ea aniki. Januxun jabiatundi Faraónen yusinika inun jawen jiwe anu dayanika tsuma inun jawen xanen ibu Egipto jidabi yunuti mekenika Diosun besti ea jaska waniki. ⁹Ea jaska waniwen taexun ana nenu ebe mapuama jawaidabain nukun ibu yuitankanwen: “Min bake José jiweaki. Eska jawen jancha mia yunushinaki. Diosun nenu Egipto xanen ibujaida ea wani jawaidakidan ea uinyuwe”, mia washianki, akin ea jaska yuixuntandikanwen. ¹⁰Eskakididan, na nenu udama jiwei bekanwen, mae betsa Gosen anu ea dapi jiweidan, mia inun, min bakebu inun, min bababu inun, min inabu inun, minabube dasibi texeamadan. ¹¹Nenu man juama man nuitapatidubuki. Jaskaken matunabuya bekanwen. Nenuxun piti shadabu matunabuya matu pimakin en jawa matu nuitapawama ixanaii. Na bunidan, 5 año kayuikiaki, en epa akin yuikinan. ¹²Na jaska en matu yuiaidan en betsa Benjamín inun ibubis man ea uinkin ninkaii, jaska en matu jancha waidan. ¹³Na dasibi Egipto anu jaska en xanen ibui kushipai en matu yuii man uinxu nukun epa yuiditankanwen. Menan buxun en ibu ea iwexunditankanwen— jatu watan

¹⁴jaska jatu jancha wakin menetan jawen betsa kayabi Benjamín ikua kaxaya jabebis Benjamínbe teikukua kaxabukuntan ¹⁵januxun jawen betsa Benjamín jenebain betsabudi tantsu akubauni jatube ikukunan kaxai keyui nesetan ana dateama jawen betsabuya janchaibu

¹⁶Josén betsabu beabu Faraónen jiwe jawendua anua jaki chaniaibu ninkatan Faraónen jawen tsumabubetan ninkai benimaibu
¹⁷⁻²⁰Faraónen José kenaxun yunukin:

—Min betsabu yuiwe, jau pitiya besti jatun mai pakea Canaán anu chintunbainshinxun matun epa inun matunabu jau jatu itanunbunan. Jatun asnoki piti butidubuki. Janua nukun asno tadantiyadi buxun jaki jatun ainbuaibu inun jatun bakebu inun min ibudi jaki iwetidubuki. Jaskabidanaibu na Egipto mai pakea anu janu yunu jamen ikai mai pepa en jatu yunuxanaii. Jawa jatun mabuwen nuiama jau benunbunan, nenuxun jamapai shadabu en jatu yunuaidan, jabu ibu wamakin jabuna wamakinan— aka

²¹januxun Israelin bakebu jatu jaska wamakin José jawen betsabu jaska Faraónen yunuxu jawen asno tadantiya inun bai tanabainkin pikubainti jatu pewamaxuntan ²²januxun jawen betsabu tibi tadi chaipa bena bestibu tibi inankin januxun Benjamín besti 300 plata pei jexe inun 5 tadi chaipa inantan ²³januxun jawen ibu bumakin 10 asno mabu pepa jaki bexea inun 10 asno yuxan piti jaki bexea inun, misi inun piti betsa ja jukin pikubidanxanai jawen epa pewamaxuntan ²⁴januxun Josén jatu nichinkin nemakin:

—Buidan, bai tanabaini matunmebi ja iki detenameama butankanwen— jatu wa

jabu buaibun ²⁵Egipto anua kainbaini bui Canaán anu janu jatun epa jiweanu jikitushitan ²⁶jaska jatu washianbu jatun epa yuikin:

—José mawani dabanen nun imisdan, jiwea en bechitanaii. Ja min bakedan, dasibi Egipto mai pakea jidabi jatun xanen ibuki— akabu jaska shinantidumajaida e itan pes jawa yuiama tsaua jatun jancha besti jatu ikonwantidumaken ²⁷jaska jakidi janchashina jawen bakebun jaska Josén jatu yuishina inun yunushina banabimabu jawen asno tadantiya Josén yunua buxunshinabu uin chanima jatun jancha ikonwain benimai tse iki ²⁸jatun epan yuikin:

—Menan janun en mawanun en bake jiwea man ea yuiaidan, menan ea jaki nukumakin uinmadi bukanwen, janun en mawanunan— itan

**José Egipto anu jiwexun jawen ibu Jacob
kenashina kanikiaki, na janchadan**

46 ¹Israelin dasibi jawen mabu pewakin keyutan jawenabube tsekekaini kai Beerseba mae anu jikitan januxun chaxuwan bake kuakin jawen epa Isaacun Dios kenwanken ²jabianuxundi meshu medan nama keskawen Dios Israelbe janchakatsi kenakin:

—Jacobuun— aka

—¿Jawamen? en nenukidan, eadan— aka ³januxun Diosun yuikin:

—Eadan, en Dioski, min epa Isaacun mekenika Diosdan. Min Egiptokidi kaidan, dateama katanwen. Jadixun minabu en mia jatu pa waxunxanaii, midimajaida jatu wakinan. ⁴Eadan, en mibe kائي, Egipto anudan. Jabia ea kayabistundi minabu en jatu taxnimabidaxanaii. Min jadia mawayadan, min bake Josén mia putama min jaunbia mawaxanaii— aka ninka ishin

⁵Janua Beerseba anua Jacob bestentan kakatsi ikaya jawen bakebun pewakin jatun epa, inun jatun bakebu, inun jatun ainbuaibu ja jaki bexanunbun asno tadantiya Faraónen jatu yunushinaki jatu nanea ⁶Jacob dasibi jawenaya jawenabu inun jawen chaxuwan inun dasibi Canaán anu jiwexun mabu bimis jaya dasibiya Egiptokidi kakin ⁷jawen juni bakebu inun, jawen ainbu bakebu inun, jawen baba junibu inun ainbu jatu iyui jaska kainikiaki.

⁸Israelbu, Jacobun enabudan, jati kena bunibukiaki, Egiptokididan:

⁹Jacobun bake iyua Rubén inun jawen juni bakebudan, jati bunibukiaki, Hanoc inun, Falú inun, Hestrón inun, Carmídan.

¹⁰Janua ja kachu Simeón inun jawen juni bakebudan, jati bunibukiaki, Jemuel inun, Jamín inun, Óhad inun, Jaquín inun, Sóhar inun, Saúldan. Janua Saúlun ewadan, Canaán nawa ainbu inikiaki.

¹¹Janua Leví inun jawen juni bakebudan, jati bunibukiaki, Guersón inun, Quehat inun, Merarídan.

¹² Janua Judá inun jawen juni bakebudan, jati bunibukiaki, Er inun, Onán inun, Selá inun, Fares inun, Zérahdan. Janua na dabedan, Er inun Onán Canaán anua mawanikiaki. Jawen baba Faresin bakebudan, Hesrón inun Hamul budianibukiaki.

¹³ Janua Isacar inun, jawen juni bakebudan, jati bunibukiaki, Tolá inun, Puvá inun, Job inun, Simrónan.

¹⁴ Janua Zabulón inun jawen juni bakebudan, jati bunibukiaki, Séred inun, Elón inun, Jahleldan.

¹⁵ Jati juni bakebu inun jawen ainbu bake Dina Padán-aram anua Jacobun Líaki bawa jawenabudan, 33 bunibukiaki, junibu inun ainbuaibudan.

¹⁶ Janua Gad inun jawen juni bakebudan, jati bunibukiaki, Sefón inun, Haguí inun, Esbón inun, Suní inun, Erí inun, Arodí inun, Arelídan.

¹⁷ Janua Aser inun jawen juni bakebudan, jati bunibukiaki, Imná inun, Isvá inun, Isví inun, Beriá inun jatun pui Sérahdan. Jawen baba Berián bakebudan, Héber inun Malquiel budianibukiaki. ¹⁸ Janua Labánen jawen tsuma Zilpá jawen ainbu bake Lía jau dayaxunun inani janubi Lían jawen dayadu Zilpá Jacob yunua jaki bake waxuni Zilpán enabudan, 16 bunibukiaki.

¹⁹ Janua Jacobun ain Raquelin bakebudan, José inun Benjamín inibukiaki. ²⁰ Josén bakewakin jawen ain Asenatki bakewadan, Manasés inun Efraín Egipto anua kainibukiaki. Asenatin epadan, maewan On anua jatun mekenika yushin kenwanika Potifera inikiaki.

²¹ Janua Benjamín inun jawen juni bakebudan, jati bunibukiaki, Bela inun, Béquer inun, Asbel inun, Guerá inun, Naamán inun, Ehi inun, Ros inun, Mupim inun, Hupim inun, Arddan. ²² Jacob inun Raquelin bakebu inun jatun bababudan, 14 bunibukiaki.

²³ Janua Dan inun jawen juni bake Husim bunibukiaki.

²⁴ Janua Neftalí inun jawen juni bakebudan, jati bunibukiaki, Jahseel inun, Guní inun, Jezer inun, Silemnan. ²⁵ Janua Labánen jawen tsuma Bilhá jawen ainbu bake Raquel jau dayaxunun inani janubi Raquelin jawen dayadu Bilhá Jacob yunua jaki bake waxuni Bilhán enabudan, 7 bunibukiaki.

²⁶ Jacobun enabu juni betsama jati jawen yudabuyas Egipto anu jikidan, 66 jabe bunibukiaki, jawen bakebun ainbuaibu jatu tanamadan.

²⁷ Janua Egipto anuxun José ainyantan bakewadan, dabe inikiaki. Janua ja Jacobube Egipto anu bea Joséki dasitushiabu tanabu 70 jawenabu jabus inibukiaki.

²⁸ Gosen anu kakin José anu bebunkidi Jacobun chanimakin Judá yunukin yuikin:

—“En ma juai ¿jani jaskapa?” ea waxuntanwen— aka kaken Gosen anu jikiaibun ²⁹ José jawen betsan yuia unuxudi ninkatan jawen tsumabu

jatu yunua jawen asno tadantiya pewaxunabu jaki inatan Gosen anu jawen epaki jaki nukui kai jaki kemaxun bechimatushitan jawen epabe ikukunan jabe teikukudabetan nui kaxa chakayamai nesetan ³⁰januxun jawen epa Israelin José yuikin:

—Epaan, chanima min ea jiwexunyuaki, ea kayabis ma en miki nukutushiaidan. Janunkain min bedubi en mia mawaxunxanaii— aka ³¹ninkatan Josén jawen betsabu inun jawen epan enabu jatu yuikin:

—Jabianu iyukanwen. En matukidi Faraón chanixunyui kaidan. “Ma en epa inun en betsabu Canaán anua ma ebe jiweyui bekanxuki”, akin en matu yuixuni kaidan. ³²“Jatun chaxuwanyan inun jatun ina awaya inun jatun mabuya ma beabuki. Jatun dayadan, chaxuwan inun ina awa mekenika imisbuki”, en matu waxuin kaii. ³³Januxun Faraónen matu kenatan yukakin: “¿Jawa man dayamismen?” matu wa ³⁴unanumas yuiyamaxankanwen: “Nukudan, nun chaxuwan mekenikabuki, nukun xenipabu keskadan”, man wa matu ninkatan ja mae Gosen anu matu jiwemaxanikiki, Egipto nawabu chaxuwan mekenikabube man jusitan jiwetidubumawen taeadan— jatu watan

47 ¹Janua xanen ibujaida Faraón anu José kaxun ma jawen epa inun jawen betsabu ma Canaánkidia bei Gosen anu jikikin jatun chaxuwan inun jatun ina awa inun jatun mabu dasibiya bekanxu Faraónki chanitanxun ²januxun jawen betsabu 5 katubainkin iyuxun xanen ibujaida Faraónen jau jatu unanti wanun jatu uinmaya ³januxun Faraónen Josén betsabu jatu yukakin:

—Matun mae anua dayaidan, ¿jawa man imismen?— jatu wa januxun jabun Faraón kemakin:

—Xanen ibuun, min tsumabu nuku dayaidan, nun inabu mekenikabuki, nukun xenipabu ini keska dayaidan— atan

⁴—Eskawen taea min mae anu mibe jiweyui nun juxuki, nukun mai pakea Canaán anua buni tenejaidai nuku inun nukun inabubetan jania jawa pitimadan— iwanan, janubi jawaida yukakin: —Xanen ibu pepatuun, ¿nukuwen daban an ikin ja mae Gosen anu nun jiweyunun min nuku yunuyutidumen?— akabu

⁵jaska wabu Faraónen José beiskin yuikin:

—Uinwen. Min epa inun min betsabudan, mibe jiwei bekanxuki.

⁶Egipto jidabi min yunumiski. Jaskawen taexun Gosen mae pepa jatu yunuwe, jau jadi jiweyununbunan. Minabu juni ina awa mekea unain min ea jatu yunuxuntiduki, jabun jau en ina awa ea mekexununbunan— ikaya janua buaibun

⁷januxun Josén jawen epadi xanen ibujaida Faraón anu iyudixun jau unanti wanun jadi uinmaya Jacobun Faraónki mesekin kenwanyan ⁸januxun Faraónen yukakin:

—Anibuun, ¿min ma jati badi jayamen?— aka ⁹jatun yuikin:

—En badi ichapa tekikaindiamaki, natian 130 año na mai anu maea akeakekin bika betsa betsapa tenei en jiweyuiai, en xenipabu jiweniti en badi kemadiamadan— akin

¹⁰jaska yuitan ja bebunua kainkainkatsi Jacobun yuikin:

—Min xanen ibu pejaidaki. ¿Kayupa, en mabubu en pewayuyi kaidan?— aka

—Jaa, min katiduki— aka kainkainaya ¹¹januxun Josén jawen epa inun jawen betsabu jau janu jiweyununbun jaska Faraónen yunuxu keska wakin Egipto mai pepa jatu paxkaxunkin jatu yununikiaki, Ramsés pakeanuadan. ¹²Januxun jawenabu jiweaibu Josén piti shadabu jatu pimakin dasibi jatu paxkaxunkubainikiaki.

**Piti paxkakin jau jaska wapakenunbun Josén
jatu yununikiaki, na janchadan**

¹³Janua mai pakea Egipto inun Canaán jidabi anua jatun xekiwan keyui buni pikujaidai ana jawawen jiwetima yudabu buni paewen mawaibun ¹⁴januxun Josén xekiwan jatu inankin Egipto anua inun Canaán anua jatun daya pei ma jatu keyu biantan Faraónen jiwe ewapa medan adushinken ¹⁵janua Egipto anua inun Canaán anua jabun pei ma yamaken Egipto nawabu José anu buxun jaki chanikin:

—Ma nukun pei min nuku keyu bianshinaki. Nun buniwen mawaidan, pemaki. Mian nuku pimawe, nun ana pei jayamakidan— akabu

¹⁶Josén jatu yuikin:

—Aa, ¿jaskamen, man peiumahan? En jawen taexun xekiwan matube bianananunan, matun inabudi bexun bidiakubainkanwen— jatu wa

¹⁷jaska ninkabain Egipto nawabun jatun caballo inun, jatun chaxuwan inun, jatun ina awa inun, jatun asno bexunpakeaibuwen taexun Josén xekiwanwen taexun ina jatu biankubainkin badi bestichai nichintan ¹⁸januxun badi betsa binukainaya ana badi betsa taxniaya ana jaki chani bexun José yuikin:

—Ana nun mia daketapa wayuaki, nun ana jawawen jaskatimajaidadan. Nun mia padanmaki. Nukun pei inun nukun inabu mina wakin min ma keyushinaki, ana jawa betsawen nukun piti nun bitimakidan. Eska besti nun jayaki, ¿nukun yuda inun nukun bai nun ja mia inantidumamen? ¹⁹Nuku janubi biwe, nukun yuda inun nukun baidan, jawen taexun xekiwan nun pikubainunbunan. Faraónen tsumabu nuku wawe, nukun bai anuxun nun ja dayaxunkubainxanunbunan. Xekiwan min nuku inainwen jiwekin nukun bai anu banadi ai nun jiwekunkainyutiduki. Min nuku jaska waya nukun bai anu jamen chaka besti beneama idiatiduki. Min nuku jaska wamaken nun mawaya nukun baidi benuxanikiki— akabu

²⁰⁻²¹jaska yukaiibuwen taexun Egipto mai pakea jidabi Josén Faraón bixuanyan buniwen taexun jatun yuda inun jatun bai Faraón bixuntan jatu ibu wamanikiaki, Faraónen jawen dayadu esclavo wamakinan.

22 Jabun jawen yushin tibi Faraón kenwanxunmisbu mukayabu besti Faraónen jatu piti inankubaina pikubainaibuwen taexun jabun bai besti Josén jatu mebianma inikiaki.

23 Januxun Josén yudabu jatu yuikin:

—Eskatianan, matu inun matun baidan, man Faraónena bestiki. Ja bixunkin en jawena matu wamashinaki. Jaskawen taexun na xekiwani bimi janu ui ikaitian banaxankanwen. Ja benawati nun jayaki. 24 Januxun man ma pa wa tsekakin ichawakin 5 manchin jabatiubus watan manchin bestichai Faraónen tsumabu man jatu inan jabun mekexunkubainxankanikiki. Januxun 4 manchin ja benawati inun matu inun matun bakebu mekexuntan pimakin dasibibun pi jiweyukubainxankanwen— jatu wa

25 jabu jaki shinan chankankin yuikin:

—Xanen ibuun, ¿nuku jaska wai jaska min juni pepa medabenanmen, min nuku jiwemaidan? Nun ikaii, Faraónen tsumabuidan— akabu

26 Josén jaska wakin yunuti kushipa niti ikama Egipto jidabi anu wakin 5 manchin tibi anua bestichai jau Faraón inankubainun badinunbun jatu jaska yununikiaki. Jakia jatun yushin tibi Faraón kenwanxunmisbu mukayabun jatun bai tibi jawa Faraónen jatu meanmawen taexun jabun jawa pakama inibukiaki. Na jaska yununidan, na eskatian jabias keyuama chibandiakubainkanikiki.

Jacob jawen bake José yubamanikiaki, na janchadan

27 Israel jawenabuya Egipto anu jiwei buimabu janu Gosen mae ibu waima janu jiweyuxun jatun bakebu pa wai midimaibun 28 Jacob kaima jadi jiwea 17 año nichiiin jadia 147 año jaya

29-30 xaba betsatian Israel jawen yuda mei ma anibujaidai babui mawakatsis ikin januxun jawen bake José chanima yuixuntanabu jua yuikin:

—Epaan, en ma mia xununkatsis ikaii, en ibubuki nukui kaidan.

Chanima min ea medabewakatsis ikaidan, min mekenwen ea kishwakekin ea bakewe, nun yubakanunan— atan yuikin: —En matu mawaxuna ewen nuikin en yuda na Egipto anu ea mai wama jadi min juchi en mai wani anu jadidi ea maiwakin budixanwen— aka

—Dateyamawe, jaska min ea yuiyai keskadan, en mia axanaidan— abia 31 jawen epan ninkamas yuikin:

—Diosun nuku uianyan ea yubawe— akawan Josén yuikin:

—Min ea jaska yukayadan, en mia yubaii, Diosun nuku uinkin ninkayadan— aka janua Israelin Dios kenwain na tsaua ibai babutan jawen dakatiki dakashinken

Efraín inun Manasés Jacobun pepawakin duawanikiaki, na janchadan

48 1 jawen ibube José jaska jabe jancha wawanshinxun shinanyan jawen ibu ma isin teneaya Joséki chaniabu Josén uintanun ika

kakin jawen juni bake dabe iyua Manasés inun ja kachukea Efraín iyui jabe kaya ²Januxun jawen bake Josén uin kai jikitushiai Jacob yuiabu ninkatan yuda babubia jawen bake ninkatan benimai shinan chankain natsaukauan ³⁻⁴José uinkin yuikin:

—Epaan, en mia jancha waii. Unu Canaán mai pakea anu mae Luz anuxun Dios kushipajaida dasibi binua eki nukutan ea duawakin eska ea jancha wakin yuikin: “Uinwen. Eanan, en mia bake ichapa inanxanaii. Min bababu paibu jabiabus en jatu xukua tibi waxanaii. Na Canaán mai pakea en jabus yunununbadiaii, niti akamadan”, ea waniki. ⁵Eskaki, mia yuinun. Na min bakebu Efraín inun Manasés na Egipto anu en judiama min ea jatu bake bawaxuna kainyamabudan, ean en ibu waii. En bake Rubén inun Simeón keskai jabudi xukua tibi ixankanikiki. ⁶Jakia en miki nukuitian unudi min ea jatu bawaxunbainimadan, minaski. Jaskabia dasibi Diosun ea yubani jabun biama jakia jatun betsa Efraín inun Manasésin besti xukuabu anua jabun jatuna bixankanikiki— itan ⁷Jawen ain Raquelkidi shinankin yuikin: —Uian. Padán-aramkidia en chintunkidanaya bai puchinin mae Efrata kemayui ma Canaán anua min ewa Raquel mawaniki. Jabianudi en mai waniki, Efrata kemai anudan— anikiaki. Natianan, Efrata kena betsa wakin Belén wanixun kenamisbuki.

⁸Januxun Israelin Josén bakebu jatu uinkin José yukakin:

—¿Nadan, tsuabu ikimenkain?— aka

⁹—Nadan, en bakebuki, Egipto anuxun Diosun bebunkidi ja juni bake dabe ea jatu inanyamadan— aka jawen epan ana yuikin:

—Ja dabe nenu ea dapi jatu nichinwen, en duapa jancha en jatukidi janchakin yunuaidan— iki

¹⁰Israel ma anibujaidai bexuxkin ana uin peamaken Josén jawen bakebu jawen epa dapi nichian jatu ikutan tantsu atan ¹¹Jawen epan José yuikin:

—Min ma ea benuxuni dabanen en ikunkainmis en mia uiiaiin. Januxun min bakebudi Diosun ea jatube mia uinmaikiki— ikaya

¹²Januxun jawen ibuan jawen bakebu xanshui ika Josén jatu xekakin benanta jatu nichintan jantsidi jawen ibu kenwain jawen beya keskawen main beti ika ibai benitan ¹³benikauan jawen bake dabe metsuntan shinankin:

—Nukun beya chibankin en bake iyua en epan meken yusiudi bebun en nichiaiiin, jau iyua dukun pewakin duajaidawanunan. Januxun en bake maxku jawen meken yusmaudi bebun en nichindiaii, jau ea dua midin waxununan— iwanan jawen bake maxku Efraín yusiudi metsuan inun jawen bake iyua ja kachukea Manasés yusmaudi metsunxun jawen epaki kema watan januxun Efraín Jacobun meken yusmaudi bebun nichinkin Manasés jawen meken yusiudi bebun jatu nichintushia ¹⁴Janua Israel jawen meken pekishkubain Efraín maxkuki jawen meken

yusiudi mamepiaya janua Manasés iyuabiaken jawen meken yusmaudi mamepitan ¹⁵⁻¹⁶ Israelin José dukun pepawen duawakin eska wanikiaki.

—En xenipabu Abraham inun Isaacun chibankubainitun ja Diosundi en taxnini anua ea mekemis jabiatundi chakabu betsa betsapa ea binumamistun na bedunan dabe jau jatu duawakin pe jatu jiwemakubainxanunwen, jau jabuwen en kena inun en xenipabu Abraham inun Isaacun kena jau jakimama shinanpakexanunbunan. Jau Diosun jatu pa wapaxanunwen, bake midima jatu wamakinan. Jau mai jidabi anu jiwei yuda midima jabus jau ipaxanunbunwen— akaya

¹⁷Efraín jawen bake maxku Jacobun jawen meken yusiudi mamepia uinkin bechipaiama jawen ibuan meken yusiudi metsutan Manasés mamepinpaya ¹⁸ mestean dakaken Josén jawen epa yuikin:

—Jaskamaki, epaan. Min kaneaki. Na nekediaki iyuadan, Manasésdan, ja min meken yusiudiawen jaki mamepiwe— aka

¹⁹jawen epan jaska wakatsi ikama nemakin yuikin:

—En unaiin, epaan. En unaiin. Ja iyua Manasésdan, jabiadi yudabu kushipabu midimadi ixankanikiki. Jakia na maxkunan, jawen betsa iyua binujaidaxanikiki. Jawenabu ichai pai yudabu xuku tibi mae midima ixankanikiki— atan

²⁰jabiatiandi Jacobun José ana jancha wakun yuikin:

—Diosun matu jaska duawaxanaiwen taexun matuwen taea enabu Israelbu pe yuinameaibu yuikin: “Diosun Efraín inun Manasés axuni keska wakun jau miwen taexundi adiaxanunwen, Diosunan”— akin Israelin Josén bake Efraín jawen bake iyua Manasés maemaxanai jatu yuinikiaki. ²¹Januxun jawen bake José yuikin:

—Uian. En ma matu mawaxunkatsis ikaii. Jakia ewen dateyamaxankanwen. Chanima Diosun matu medabewapakekin ana nukun xenipabu jiwekubaunibu anu matu chintunwanxanikiki. ²²Miadan, min betsabu en mia jatu binumaii. Mae Siquem Amorreo nawabube yaushi detenamekin en bini en mia ja yunuaii— jatu atan

Jaskanunbadiaibu jawen jenekin Jacobun jawen bakebu jatu jancha wanikiaki, na janchadan

49 ¹Januxun ana betsatian Jacobun jawen juni bake dasibi kenaxun jatu yuikin: “Ea anu ichakanwen. Man jaskanunbadiiai matu bebunkidi yuinun ea ninkai bekanwen”, jatu wa ichabu ²januxun jatun epan jatu yuikin:

“En bakebuun, en matun epa Jacobki. En Israeldan, ea dapi ichaxun ea ninkakanwen”, ikin,

³ ja dukun jawen bake iyua Rubén yuikin:

- “Epaan, min en bake iyuaki.
 Ja dukun miki dukun dayai taekin
 en kushipa bedunantun mia bawai en miki jinin taeniki.
 Jaskawen taexun mia kushipawakin mia mekebaun en mia jatu
 binumaniki.
- 4 Jakia min ana jatu binui jaskatidumaki.
 Mia ikidan, eskatian min jene bai matatan kushipamis keskaki,
 tsuan mia nemapainun jaska shinanma
 en ainin dayadu esclavabe eunbi chutakin
 min ea dakejaidawaniwen taedan”, atan
- 5-6 januxun Simeón inun Leví ja dabe jatu yuikin:
 “Matudan, man jabias xankinki naneaki.
 Matun detetiya mapua shinan chakakin
 man jatu itimaska wabaunmiski.
 Pubein jatuki sinatakin
 junibu jatu tenantan
 jatun ina awa man jatu bishten bishten akaniki,
 man jatu jaska wain pe dabanenan.
 Man jaska waniwen taea matunabube man ichaxun shinain anu en
 matube nashui itidumaki, dabinan”, iwanan,
- 7 “Man chakabu puben sinatapabuki.
 Jaskawen taexun matunabu en sa axanaai,
 matun betsabu manibaunabube matu jusikinan.
 Matun chakabuwen taexun jau Diosun matu yupukin
 manakuxanunwen”, jatu atan
- 8-12 januxundi Judá yuikin:
 “Epaan, miadan, min en bakeki.
 Min betsabun mia duawakin
 mia kenwanxankanikiki.
 Miki sinataibu maemanun ixun min jatu temusxanaai.
 Inu leónen baken mibikin achixun pia keska wai inun,
 ana jawa bika teneama
 yani wa inu betsa león ewapa keska min dakayuxanaai,
 tsuan mia chikishwamadan.
 Judáan, tsuan taska min kushipa minabu anua jatu
 mebintidubumaki.
 Min mekenwen min xanen ibun mane mestenti min
 jayayukunkainxanaai.
 Jakia ja mestenti ibu kayabi juxun minabu anua jatu mebingen
 ja mae anuabun ja xanen ibu waxun kenwankin
 chibankubainxankanikiki.
 Uva taxuki jawen asno bake tenextan

jawen tadi uva bimi tsinia tashipa buspuaiwen chukaxanikiki.

Jawen bedu jawendua uva jene keska meshupa inun,

jawen xeta awa chuchu keska juxupajaida inunbadixanikiki”, atan

13 januxun Zabulón yuikin:

“Epaan, miadan, ianenwan kexa minabu jiwexankanikiki,

janu xaxu ewapabu keti ikai anudan.

Minabun mai pakea kesuadan, mae ewapa Sidón anu inunbadikiki”,
atan

14 januxun Isacar yuikin:

“Epaan, miadan, min dayakapaki,

yuinakapan xankama bumis keskadan.

15 Mae jawendua bechitan janu dayai

janu juindukunkatsi mabu xankama peubidankin

minabu jatu esclavo tsuma watan jatu yunua jawa yuiama minabun
jatu dayaxunkubainxanikiki”, atan

16 januxun Dan yuikin:

“Epaan, minabu ikidan, janubi jawenabu xanen ibuxunxankanikiki,
Israelin enabu xukua bestidan.

17 Dunu pianan bai kexa manixun

caballo tae chipun mextea keska wakin

ja juni jaki tsaua buaibu

minabun jatu pakexanikiki, jatu maemakinan”, akin

18 jawen mekenika Dios datan akin:

“Jehováan, min ea mekekubainxanai en mia manajaidai”, itan

19 januxun Gad yuikin:

“Epaan, minabudan, nawa kushipabu bexun

jatun mae anuxun yumetsukin minabu jatu detebainxankanikiki.

Jakia jatu manakukin

minabun jatu chibanbainxanikiki, jatu maemai bukinan”, atan

20 januxun Aser yuikin:

“Epaan, mianan, misi betsa betsapa kemutapa ichapa minabu
jayaxankanikiki.

Xanenibun piti pepa jawendua jaya

jaska besti bawatan pi minabu jiwexankanikiki”, atan

21 januxun Neftalí yuikin:

“Epaan, miadan, chaxu betsa gacela tsuan achitiduma keskai

jawama nixun bake pepa jawendua bawai minabu jiwexankanikiki”,
atan

22 januxun José yuikin:

“Epaan, miadan, miban jene kexa nia

min bimi paipaimaya keska

min punyan bukun ja kenekaunaki

- min puea bimi xankama dunua keskawen taea minabu
pajaidaxankanikiki.
- 23 Piayabun jatu danankin bechipaiama
minabuki pia bishkukin bikawabiabun
- 24 jakia jatun punyan punxukuama kushipakin
minabun jatu maemakubainxankanikiki.
¡Jacobun Dios kushipadan, pejaidaki!
Israelin mekenika kushipa en kenwaiin.
- 25 En mekenika Diosun mia ea medabewaxunmis en kenwaiin.
Dios kushipajaida dasibi binuatun
jau mia inun minabu duawakubainxanunwen.
Nai anua minabu jamapai inankin
jene medanua jatu inandiakin
bake ichapa jatu bawamakin
chuchu midima jatun bakebu amakin
jau minabu duawapakexanunwen”, akin
- 26 “Eanan, mia duawakinan,
en ibubun ea duawani keskama jatu
binumakin en mia pepawakin duajaidawaii.
Min betsabu anua mia katutan
Diosun mati jawa niti ikama bawanitun mia inun minabu
pakubainaibu
jau matu duawakubainxanunwen”, atan
- 27 januxun Benjamíndi jawen jenekin yuikin:
“Epaan, miadan, min pubenki, kaman inu keskadan.
Jaskai jatuki sinataibu penaya jatube detenamekin
jatu maematan badi kaya jatun mabu ichawatan
minabun paxkakubainxankainikiki”, akin jaska jatu jancha
wanikiaki.
- 28 Jatibuki, Israelin 12 juni bakebu xukua tibi jatun ibuan jabu tibi jau
jaskanunbadinunbun jatu jancha tibi yuikin yunua akeakenidan.

Jacob mawashina mai wanibukiaki, na janchadan

29-32 Ana betsatian Jacobun jawen bakebu jancha wakin jatu yunukin:
“Matu xunubaini ma enabuki en nukui kakatsi ikaii. En mawaya mishki
kini tanpe medan en epabe ea mai wai buxankanwen. Canaán mai pakea
anu Mamré dapi Macpelá bai depi mishki kini tanpe medan ea mai wai
buxankanwen, mai wati bai bikatsi ikin peiwen taexun Hitita nawa
Efrón anua en juchi Abrahamnen bini anudan, janu jawenabu mawa mai
wapaketi bini anudan. Ja mai bikin taewaxun janu dukun jawen ain Sara
mawa mai waniki. Janua jadi mawa jabanudi mai wadianibuki. Januxun
en ibubu Isaac inun Rebeca mawa jabanudi en jatu mai waniki. Eandi en

ain Lía mawa jabianudi en mai wadianiki. Ja mai wati anudan, jabianudi jatube ea mai wai buxankanwen”, jatu watan

³³janua Jacob jawen bakebu jancha wakín menetan ana dakai petan mawaya

50 ¹jawen bake Josén ikutan tantsu atan jaya kaxai ²nesetan jawen tsuma Egipto nawa juni dauyabun jau jawen yuda chaputima wakín mekekin jau dapuxtan tadiwen dayabuxununbun Josén jatu yunua jaska jatu yunuxu keska waxunibukiaki. ³Egipto nawabun dau chaputimawen dapuxxunkin 40 xaba yuda meketi amisbu keska wakín axuntan Egipto nawabu dasibi Joséwen nuikin jawen epa Israel shinain 70 día xaba uinkubainaibun ⁴José kaxa nesetan Faraónen jiwe anu mekenikabu jatu uikin:

—Matu medabewakubainkin en matu jawa chakabuwaismawen taexun ekidi shinankanwen, Faraón ea yuixunkinan. ⁵En epabe en jabe yubakaima ma ea jenebainshina Canaán anu en mai wai kakatsis ikaii, jadi jawenabu mai wamisbu anudan, mai watani en ana chintunkatsis ikaidan— jatu wa jaska Faraón yuixunabu ⁶januxun Faraónen José kemakin:

—Chanima peki. Kaxun min epa mai watanwen, jaska min epan mia yubashina keskadan— aka

⁷jaska ninkatan Josén jawen epa mai wai kai jabun medabewai kakín chibanbaini Faraónen xanen ibu bexmas jawen jiwe anu jabe dayamisbu inun, xanen ibu bexmas Egipto anuabu jabe bui ⁸Josén enabu inun jawen betsabu inun dasibi jawen epan enabu bukin Gosen anu jatun bakebu inun, jatun inabu besti bashiyubainaibun ⁹jabiatiandi caballo tadantiyaki yuda midima inun caballoki katsaumeabu yudan kaian midimabun José chibain bui ¹⁰mae Goren-ha-atad anu Jene Jordán anu badi juaikidi jikitan jadia Joséwen nuijaidai jabe icha kaxajaidakunkaini Josén jawen epa Jacob mai wabaintanxanun ika ⁷xaba jawen epawen nui shinain kaxanikiaki.

¹¹Jaskaibun ja Canaán anu jiweabu jabun uinkin shinankin: “¿Jaskaida Egipto nawabu jawenabu mawa mai wai beshianbu nuichakatidubumadaka?” iwanan, janudan, Jene Jordán badi juaikidi ja mae kenakin: “Abel-misraimki”, anibukiaki, nukun janchawenan, “Egipto nawabu Nui Kaxachakatidubumaki”, akinan.

¹²⁻¹³Jaska jatun epan jatu yunuima akin Jene Jordán pukebain Israelin yuda Canaán anu buxun Mamré badi juaikidi dapi Macpelá bai Hitita nawa Efrón anua jawenabu mawa janu mai wati tanpe Abrahamnen bini anu Israel jawen bakebun mai wanibukiaki, ja mai wati mishki tanpe kini medan. ¹⁴Jadi Josén jawen epa mai watani Egipto anu chintunkidani jawen betsabu inun ja jatibun chibanshinabuya jatun mae anu chintunibukiaki.

Joséki jawen betsabu dateaibu jatu daewanikiaki, na janchadan

¹⁵Janua jatun epa mawaimaken José betsabun shinan chakai uinamekin: “Eskatianan, José nun ichakajaidawaniwen taexunan, nuku danankin nukudi kupijaidaxanikiki”, ikin ¹⁶jawen betsabun juni betsa yunua kaxun José jabun yuixunkin: “Nukun epa ma mawa kemaxun nuku yunushinadan, ¹⁷znukun epan jancha ana mia xabakabi yuipa? akin eska mia yuikanxuki. ‘Min betsabun mia nuitapawakin mia ichakawanidan, jatuwen nuikin jatun chakabukidi en mia yui ai ana shinaryamaxanwen’, akin Jacobun nuku mia yuixunimawen taexun chanima nun mia ichakawabianiken nun mia yukai nukun chakabu ana shinaryamawe, nun min epan mekenika Diosun tsumabukidan”, ikanxu jaska yuiabu José ninkatan jatuwen nui kaxaya ¹⁸janua jakimamadi jawen betsabu kayabi bua ja bebun daxka ikain beua beti ika manixun yuikin:

—Nukudan, nun min esclavoki. Nuku jaskada wadiwe— akabu

¹⁹januxun José jatukidi jawa chakabu shinanma jatu yuikin:

—Eadan, en Dios keskamaki. Ewen taea datei meseyamakanwen. En matu kupiamaki. ²⁰Jakia matunan, chakabu shinankin man ea ichakawaniki. Jaskawen taexun Diosun ja chakabu mae wakin matu pepawaxuniki, natian man uiinan. Jati yudabu ewen taea mawama jiwekanimenkainan. ²¹Jaskawen taea eki mesei dateyamakanwen, matuki pe shinankin matu inun matun bakebu en matu pimakin jiwemaidan— akin jancha pepawen jatu duawakin jawen betsabu José jatu daewanikiaki.

Jaskai jiwea José mawanikiaki, na janchadan

²²José inun jawen epan enabu Egipto anu jiweyukubainaibun José ¹¹⁰badiyatun ²³jawen bake Efraínen bakebun bababu uinyukin jawen bake betsa Manasésin bake Maquirin bakebu uindianikiaki.

²⁴Januxun José jawen betsabu yuikin: “Mawakin en ma matu xunukatsis ikai. En jaskabiaya Diosun matu medabewakin Egipto anua matunabu taxnimabainkin janu nukun xenipabu Abraham inun Isaac inun Jacob ja mai Diosun jatu yubani anu matunabu iyuxanikiki”, iwanan, ²⁵jawen betsabu inun jatunabu jatu yubakin: “Chanima jatianda Diosun matu medabewakin matu taxnimabainaya nenua en xau ea jeneama ea jadi bununbadikanwen”, jatu wa ninkaimabun jatube jiwea

²⁶janua José ¹¹⁰badiya Egipto anua mawa jawen yuda chaputimawakin dauwen puxa keyutan yabu pewatan ji bauki jawen yuda nanenibu jawenabun jawen xau mekekubainibukiaki.